

# **ЮҲАННО**

## **БАЁН ЭТГАН МУҚАДДАС**

## **ХУШХАБАР**

### **Кириш**

Мазкур китоб Янги Аҳд таркибидаги тўртта Хушхабарнинг тўртинчисидир. Китобнинг муаллифи Забадиёнинг ўғли балиқчи Юҳаннодир. Юҳанно, Бутрус ва Юҳаннонинг акаси Ёқуб Исо Масиҳнинг энг яқин шогирдлари ҳисобланади. Юҳанно бу китобда ўз исмини ишлатмай, ўзини Исо Масиҳнинг севикли шогирди деб тилга олади (масалан, 13:23 га қаранг).

Мазкур китоб замира Исо Масиҳнинг шахсияти, илоҳий Калом инсон бўлиб келгани, Масиҳнинг Ўз самовий Отаси — Худо билан бўлган муносабати ва Исо Масиҳга эътиқод қилиш каби мавзулар ётади. Исо Масиҳ одамларга Ўзининг кимлигини тушунтироқчи бўлиб, турли образлардан фойдаланади. У Ўзини “ҳаёт нони”, “ҳаётбахш сув манбаи”, “оламнинг нури”, “яхши чўпон”, “йўл, ҳақиқат ва ҳаёт”, “ҳақиқий ток” ва “одамларни охиратда тирилтирувчи, уларга ҳаёт берувчи Зот” деб атайди.

Бу Хушхабар нима мақсадда ёзилгани 20:31 да айтиб ўтилган: “Токи сизлар Исонинг Масиҳ, Худонинг Ўғли\* эканлигига ишониб, бу имонингиз туфайли ҳаётга эга бўлинглар.” Муаллиф Исонинг таълимотини қизиқарли мантиқий мулоҳазалар орқали тақдим этади, у нур ва зулмат, имон ва имонсизлик, севги ва нафрат, осмон ва бу дунё борасида сўз юритади.

Ушбу китоб азалдан мавжуд бўлган Калом ҳақидаги маълумот билан бошланади. Илоҳий Калом дунё яратилишидан олдин мавжуд бўлган. Нимаики яратилган бўлса, ўша Калом орқали вужудга келган. Худонинг Каломи инсон бўлиб туғилди, У Исо Масиҳ эди. Исо Масиҳ зулматга ғарқ бўлган бу дунёга ҳаёт нурини олиб келди. Масиҳга ишонган ҳар бир киши самовий Отани таниб олади ва абадий ҳаётдан баҳраманд бўлади.

Китобнинг биринчи қисмидан (1-12-боблар) Исонинг қилган мўъжизалари ўрин олган, муаллиф Исони Худонинг Ўғли, Худо ваъда қилган Нажоткор эканлигини эътироф этади. Кўп одамлар Исога ишониб, Унга эргашадилар. Баъзилар эса Унга қарши бўладилар.

Китобнинг 13-17-бобларида Исонинг Ўз шогирдларига қилган ғамхўрлигига, Устоз ва шогирдлари орасидаги муносабатга эътибор берилади. Исо хочдаги ўлимидан олдин, Кутлуғ зиёфатда шогирдларини огоҳлантириб, яқинлашаётган фожиадан қўрқмасликларини айтади ва уларга далда беради.

Исонинг ҳибсга олиниши, калтакланиши, ўлдирилиши ва тирилиши ҳақидаги ҳодисалар китобнинг сўнгги қисмидан ўрин олган (18-21-боблар). Исо тирилгандан кейин бир неча марта шогирдларига зоҳир бўлгани ҳақидаги воқеалар китобга якун ясади.

### **1-БОБ**

#### **Калом ва Нур**

<sup>1</sup> Азалда Калом\* бор эди.

Калом Худо билан бирга эди,  
Калом Худо эди.

<sup>2</sup> Азалда У Худо билан бирга эди.

<sup>3</sup> Бутун борлиқ Калом орқали яратилган\*,  
Усиз яратилган бирон нарса мавжуд эмас.

<sup>4</sup> Калом ҳаёт манбаи эди,  
Бу ҳаёт инсонларнинг Нури эди.

<sup>5</sup> Нур зулматда порлайди,  
Ахир, зулмат Нурни енголмади.

<sup>6</sup> Худо Яхё исмли бир одамни юборди. <sup>7</sup> Яхё Нур ҳақида шаҳодат қилгани келган эди, токи ҳамма унинг шаҳодати орқали имон келтирсин. <sup>8</sup> Яхёнинг ўзи Нур эмас эди, у фақат Нур ҳақида шаҳодат қилгани келганди. <sup>9</sup> Ҳар бир одамни ёритадиган ҳақиқий Нур дунёга келаётган эди\*.

<sup>10</sup> Ҳа, Калом дунёда эди,  
Дунё У орқали яратилганди,  
Бироқ дунё Уни танимади.

<sup>11</sup> У Ўз юртига келди,  
Лекин Ўз халқи Уни қабул қилмади.

<sup>12</sup> Аммо Уни қабул қилганларнинг ҳаммасига,  
Унга имон келтирганларга,  
У Худонинг фарзанди бўлиш хуқуқини берди.

<sup>13</sup> Улар тана хоҳишидан эмас,  
Эр хоҳишидан ҳам эмас,  
Табиий йўл билан эмас\*,  
Балки Худодан туғилган фарзандлардир.

<sup>14</sup> Калом инсон бўлди,  
Орамизда яшади\*.  
У иноят ва ҳақиқатга тўлганди.  
Биз эса Унинг улуғворлигини кўрдик.  
Бу улуғворлик Отадан\* келган ягона Ўғилга\* мансуб эди.

<sup>15</sup> Яхё У ҳақда гувоҳлик бериб, баланд овозда деди: “Менинг кетимдан келаётган Зот мендан улуғdir, чунки У мендан олдин мавжуд бўлган, деб мана шу Киши ҳақида айтган эдим.”

<sup>16</sup> Унинг чексиз инояти туфайли  
Биз ҳаммамиз барака устига барака олдик.

<sup>17</sup> Худо қонунни Мусо орқали берди,  
Иноят ва ҳақиқатни эса  
У Исо Масих орқали кўрсатди.

<sup>18</sup> Ҳеч ким ҳеч қачон Худони кўрган эмас,  
Самовий Отанинг бағридаги,  
Аслида Худо бўлган ягона Ўғил\*  
Уни бизга танитди.

### Яхё чўмдирувчининг гувоҳлиги

<sup>19-20</sup> Қуддусдаги яхудийлар Яхёнинг олдига руҳонийларни\* ва левиларни\* юбордилар. Улар келиб, Яхёдан:

— Сен кимсан? — деб сўрадилар. Яхё жавоб беришдан бош тортмади. У шаҳодат бериб, очиқ-ойдин:

— Мен Масиҳ\* эмасман, — деб айтди. <sup>21</sup> Яна ундан:

— Бўлмаса кимсан? Илёсмисан?\* — деб сўрадилар.

— Йўқ! — деди у.

— Биз кутаётган пайғамбармисан?\* — деб савол бердилар. У яна:

— Йўқ! — деб жавоб берди.

<sup>22</sup> — Унда кимсан? Бизни юборгандарга жавоб беришимиз керак. Сен ўзинг ҳақингда нима дейсан? — деб сўрадилар.

<sup>23</sup> — Ишаё пайғамбар айтганидай\*: “Эгамизга тўғри йўл очинг”, деб чўлда янграётган овоз менман, — деди Яхё.

<sup>24</sup> Фарзийлар\* томонидан юборилган бу одамлар\* <sup>25</sup> Яхёга дедилар:

— Модомики, сен Масиҳ ҳам, Илёс ҳам, биз кутган пайғамбар ҳам эмас экансан, нега халқни сувга чўмдириб юрибсан?

<sup>26</sup> Яхё уларга жавобан шундай деди:

— Мен одамларни сувга чўмдирияпман, холос. Лекин орангизда сизлар танимайдиган бир Зот бор. <sup>27</sup> У менинг ортимдан келяпти\*, шундай бўлса-да, мен Унинг чориқ ипларини ечишга ҳам арзимайман.

<sup>28</sup> Бу ҳодиса Иордан дарёсининг шарқий қирғоғидаги Байтания\* қишлоғида юз берган эди. Яхё ўша ерда одамларни сувга чўмдириб юради.

### Исо — Худонинг қурбонлик Қўзиси

<sup>29</sup> Эртаси куни Яхё Исонинг яқинлашиб келаётганини кўриб, шундай деди:

— Ана, Худонинг Қўзиси! У дунёни гуноҳдан поклайди! <sup>30</sup> Мен ана шу Киши ҳақида: “Менинг кетимдан келаётган Зот мендан улуғdir, чунки У мендан олдин мавжуд бўлган”, деб айтган эдим. <sup>31</sup> Мен Унинг кимлигини билмас эдим. Лекин Уни Исроил халқига танитиш мақсадида, мен одамларни сувга чўмдиргани келдим.

<sup>32</sup> Яхё яна шундай шаҳодат берди:

— Мен Руҳнинг осмондан капитардай учиб келганини ва Унинг устига қўнганини кўрдим. <sup>33</sup> Ўша пайтгача мен Унинг кимлигини билмас эдим. Лекин “Одамларни сувга чўмдирасан”, деб мени юборган Худо менга шундай деган эди: “Муқаддас Руҳ кимнинг устига тушиб қўнганини кўрсанг, билки, Муқаддас Руҳга Чўмдирувчи Ўшадир.” <sup>34</sup> Мен буни кўрдим ва сизларга: “Бу Худонинг Ўғлидир\*”, деб айтяпман.

### Исонинг дастлабки шогирдлари

<sup>35</sup> Эртаси куни Яхё шогирдларининг иккитаси билан яна кечаги жойда эди. <sup>36</sup> У ўтиб кетаётган Исота қараб:

— Ана, Худонинг Қўзиси! — деди.

<sup>37</sup> Иккала шогирд Яхёнинг бу сўзларини эшитиб, Исонинг орқасидан эргашиб боришиди. <sup>38</sup> Исо ўгирилиб, уларнинг эргашиб келаётганини кўрди-да, улардан:

— Сизларга бирон нарса керакми? — деб сўради.

— Раввий\*, Сиз қаерда турасиз? — дейишиди улар. (Раввий “устоз” демакдир.)

<sup>39</sup> — Юринглар, кўрасизлар, — деди Исо.

Улар бориб, Исонинг тураг жойини кўрганларида, соат тўрт\* бўлиб қолган эди. Шунинг учун улар ўша куни Исо билан қолишиди. <sup>40</sup> Яхёдан Исо ҳақида эшитиб, Унга эргашганлардан бири Эндрус эди. Эндрус Шимўннинг\* укаси эди.

<sup>41</sup> У дарров акаси Шимўнни топди-да, унга:

— Биз Масиҳни топдик, — деди. (Масиҳ “Худонинг танлагани” демакдир.)

<sup>42</sup> Эндрус акасини Исонинг олдига олиб келди. Исо унга қараб:

— Сен Юҳанно\* ўғли Шимўнсан. Сенинг исминг Кифас\* бўлади, — деди.  
(Кифас юнончада Бутрус, яъни “тош” демакдир.)

<sup>43</sup> Эртаси куни Исо Жалила ҳудудига бормоқчи бўлди. У Филипни учратиб, унга:

— Ортимдан юр! — деди.

<sup>44</sup> Филип Байтсайда шахридан бўлиб, Эндрус ва Бутруснинг ҳамشاҳари эди.

<sup>45</sup> Филип Натанилни\* топиб, унга деди:

— Мусо Таврот китобида, бошқа пайғамбарлар ҳам ўзларининг битикларида\* бир Зот тўғрисида ёзишган эди. Биз ўша Зотни топдик. У Носира шахридан, Юсуф ўғли Исо экан!

<sup>46</sup> — Носира шахридан? У ердан бирон яхшилик чиқармиди?! — деди Натанил унга.

— Юр, кўрасан! — деди унга Филип.

<sup>47</sup> Исо яқинлашиб келаётган Натанилни кўриб, у ҳақда шундай деди:

— Ана Исройлнинг ҳақиқий авлоди. У ҳийла деган нарсани билмайди\*.

<sup>48</sup> Натанил Исодан сўради:

— Сиз мени қаердан танийсиз?

— Филип сени чақирмасдан олдин, сен анжир дараҳтининг тагида эдинг. Мен сени ўша ерда кўрган эдим, — деб жавоб берди Исо. <sup>49</sup> Шунда Натанил деди:

— Устоз, Сиз Худонинг Ўғлисиз! Исройлнинг Шоҳисиз!

<sup>50</sup> Исо унга жавобан деди:

— Мен сенга: “Сени анжир дараҳти тагида кўрдим” деганим учунгина ишоняпсан. Сен бундан ҳам буюк ишларни кўрасан!

<sup>51</sup> Сўнг яна шундай деб қўшиб қўйди:

— Сизларга чинини айтайн: сизлар осмон очилганини ва Худонинг фаришталари Инсон Ўғли\* олдига тушиб-чиқаётганини кўрасизлар\*.

## 2-БОБ

### Исонинг дастлабки мўъжизаси

<sup>1</sup> Икки кундан кейин Жалиладаги Каъна қишлоғида никоҳ тўйи бўлди.

Исонинг онаси ўша ерда эди. <sup>2</sup> Исо билан шогирдлари ҳам тўйга таклиф қилинган эдилар.

<sup>3</sup> Шароб тугай деб қолганда, онаси Исога:

— Уларда шароб қолмабди, — деди.

<sup>4</sup> — Бунинг Менга нима дахли бор?! Менинг вақт-соатим ҳали келгани йўқ, — деди Исо. <sup>5</sup> Шунда онаси хизматкорларга:

— У сизларга нима деса, шуни қилинглар, — деди.

<sup>6</sup> Ўша ерда яхудийларнинг покланиш маросимларида ишлатиладиган олтита тош хум бор эди. Ҳар бир хум ичига ўн-ўн икки челак\* сув сиғарди.

<sup>7</sup> Исо хизматкорларга:

— Хумларни сувга тўлдиринглар, — деди. Улар хумларни лиммо-лим қилиб сувга тўлдиришиди. <sup>8</sup> Исо уларга:

— Энди хумдаги сувдан озгина олиб, тўйбошига олиб боринглар, — деди. Улар олиб боришиди.

<sup>9</sup> Тўйбоши шаробга айланган сувни татиб кўрди. Бу шаробнинг қаердан келганлигини у билмас эди, фақат олиб келган хизматкорлар билишар эди.

Тўйбоши куёвни чақиртириб, <sup>10</sup> унга деди:

— Дастанхонга аввал яхши шароб тортилади. Меҳмонлар ичиб тўйғанларидан кейин, ёмонроғи тортилади. Сен эса яхши шаробни шу пайтгача сақлаб келибсан!

<sup>11</sup> Бу Исонинг қилган биринчи мўъжизаси эди. Исо бу мўъжизали аломатни Жалиладаги Каъна қишлоғида намойиш этиб, Ўзининг улуғворлигини зоҳир қилди. Шогирдлари Унга ишондилар.

<sup>12</sup> Шундан кейин Исо, онаси, укалари ва шогирдлари Кафарнаҳум шаҳрига бордилар ва у ерда бир неча кун турдилар.

### Исо савдогарларни Маъбаддан қувади

<sup>13</sup> Яхудийларнинг Фисиҳ байрами\* яқинлашиб қолгани учун Исо Қуддус шаҳрига борди. <sup>14</sup> Маъбад ҳовлисига кирганда, у ерда мол-қўй, капитар сатаётганларни ва хонтахталар ёнида ўтирган саррофларни\* кўрди. <sup>15</sup> Исо арқондан қамчи ясади-да, Маъбаддан ҳаммани мол-қўйлари билан бирга қувиб чиқарди. Саррофларнинг хонтахталарини ағдариб, пулларини сочиб юборди.

<sup>16</sup> Каптар сотувчиларга:

— Буларни йўқотинглар бу ердан! Отамнинг уйини бозор қилманглар! — деди. <sup>17</sup> Шунда Унинг шогирдлари Муқаддас битиклардаги: “Сенинг уйингга бўлган севгим ичимни ёндирап”\* деган сўзларни эсладилар.

<sup>18</sup> — Бундай қилишга нима ҳақинг бор?! Борди-ю, ҳақинг бўлса, биронта аломат кўрсатиб, буни исботла! — деб талаб қила бошлади яхудийлар.

<sup>19</sup> Исо шундай жавоб берди:

— Мана бу Маъбадни бузинглар, Мен уч кун ичида уни тиклайман.

<sup>20</sup> Бунга жавобан яхудийлар дедилар:

— Бу Маъбад қирқ олти йилдан бери қуриляпти\*, Сен эса уни уч кунда тикламоқчимисан-а?!

<sup>21</sup> Ҳолбуки, Исо Маъбад деб Ўзининг баданини назарда тутган эди. <sup>22</sup> Исо ўлиб тирилгандан кейин, шогирдлари Унинг бу гапини эсладилар. Шунда Муқаддас битикларга ва Исонинг сўзларига ишондилар.

<sup>23</sup> Исо Қуддусда Фисиҳ байрамида бўлганда, кўп одамлар Унинг қилаётган мўъжизали аломатларини кўриб, Унга имон келтирдилар. <sup>24</sup> Аммо Исо одамларнинг қанақалигини билгани учун Ўзини уларга ишонмас эди. <sup>25</sup> Инсон ҳақида Унга бирон гап айтишнинг ҳожати йўқ эди. Чунки инсон дилида нима борлигини У билар эди.

## 3-БОБ

### Исо ва Никодим

<sup>1</sup> Яхудий йўлбошчиларидан Никодим исмли бир одам бор эди, у фарзийлар мазҳабида эди. <sup>2</sup> Бу одам бир куни кечаси Исонинг олдига келиб, Унга деди:

— Устоз, Сиз Худодан келган бир муаллим эканлигингизни биз биламиз. Агар Худо Сиз билан бўлмаганда эди, Сиз бундай мўъжизали аломатларни қила олмас эдингиз.

<sup>3</sup> Исо унга шундай жавоб берди:

— Сизга чинини айтай: қайтадан\* туғилмаган биронта одам Худонинг Шоҳлигини\* кўролмайди.

<sup>4</sup> — Кекса одам туғила оларми?! У онасининг қорнига қайта кириб, яна туғила олмайди-ку! — деди Никодим. <sup>5</sup> Исо шундай жавоб берди:

— Сизга чинини айтай: сувдан ва Руҳдан туғилмаган биронта одам Худонинг Шоҳлигига киролмайди. <sup>6</sup> Одам жисмонан ота-онадан туғилади, руҳан эса Муқаддас Руҳдан туғилади. <sup>7</sup> “Сизлар қайтадан туғилишингиз керак” деганимга

таажжубланманг.<sup>8</sup> Рух худди шамолга ўхшайди. Шамол истаган жойда эсаверади. Унинг товушини эшитасиз-у, лекин қайси томондан келиб, қайси томонга кетишини билмайсиз. Руҳдан туғилган ҳар бир кишида ҳам шундай бўлади.

<sup>9</sup> — Бу қандай бўлиши мумкин? — деб сўради Никодим.<sup>10</sup> Исо унга шундай жавоб берди:

— Сиз Исройлнинг устозисиз-ку! Наҳотки шуни билмасангиз?<sup>11</sup> Сизга чинини айтай: биз билганимизни сўзлаймиз, кўрганимиз ҳақида шаҳодат берамиз. Лекин сизлар бизнинг шаҳодатимизни қабул қилмаяпсизлар.<sup>12</sup> Агар сизлар ердаги нарсалар ҳақида айтганларимга ишонмасангизлар, самовий нарсалар тўғрисида гапирганларимга қандай ишонасизлар?<sup>13</sup> Осмондан тушган\* Инсон Ўғлидан бошқа ҳеч ким осмонга чиққан эмас.<sup>14</sup> Мусо саҳрода бронза илонни\* ходага маҳкамлаб, қандай юқорига кўтарган бўлса, Инсон Ўғли ҳам худди шундай юқорига кўтарилиши керак\*.<sup>15</sup> Шу тариқа имонга келган ҳар бир киши У орқали абадий ҳаётга эга бўлади\*.

<sup>16</sup> Зоро\*, Худо оламни шунчалик севдики, Ўзининг ягона Ўғлини берди. Токи Унга ишонгандардан биронтаси ҳалок бўлмасин, балки абадий ҳаётга эга бўлсин.

<sup>17</sup> Худо дунёни хукм қилиш учун эмас, балки Ўғли орқали қутқариш учун Уни дунёга юборди.<sup>18</sup> Унга ишонган одам хукм қилинмайди. Унга ишонмаган одам эса аллақачон маҳкум бўлган, чунки у Худонинг ягона Ўғлига ишонмади.

<sup>19</sup> Хукм шундай далилга асосланган: дунёга нур келди, аммо одамлар нурдан кўра, зулматни яхши кўрдилар, чунки уларнинг қилмишлари ёвуз эди.

<sup>20</sup> Қабиҳлик қилган одам нурдан нафратланади. Қилмишлари фош бўлмаслиги учун у нурдан қочади.<sup>21</sup> Ҳақиқат йўлини тутган одам эса нурга келади. Бундай одамнинг ишлари Худо орқали қилингандигини нур ҳаммага аён қиласиди.

### Яҳе чўмдирувчи Исо Масих ҳақида гувоҳлик беради

<sup>22</sup> Шундан кейин Исо шогирдлари билан Яхудия ўлкасига борди. Исо улар билан бир қанча вақт у ерда қолиб, одамларни сувга чўмдирди.<sup>23</sup> Яҳе ҳам Салейм деган жойнинг яқинидаги Эйнон ерида\* халқни сувга чўмдирарди. У ер ниҳоятда серсув эди. Одамлар доим Яҳёнинг олдига келиб, сувга чўмдирilarди.<sup>24</sup> Бу ҳодисалар Яҳе зинданга ташланишдан\* олдин юз берган эди.

<sup>25</sup> Шу маҳал Яҳёнинг шогирдлари билан бир яхудий киши орасида таҳорат ҳақида баҳс бўлди.<sup>26</sup> Улар Яҳёнинг олдига бориб дедилар:

— Устоз! Иордан дарёсининг шарқий қирғоғида ёнингиздаги бир Одам ҳақида гувоҳлик берган эдингиз-ку, ўша Одам халқни сувга чўмдирарб юрибди, ҳамма Унинг олдига боряпти.

<sup>27</sup> Бунга жавобан Яҳе деди:

— Агар осмондан берилмаса, инсон ҳеч нарса қила олмайди.<sup>28</sup> “Мен Масих эмасман, фақат Унинг олдидан юборилганман”, деб айтган сўзларимга ўзларингиз гувоҳсизлар.<sup>29</sup> Келин куёвга тегишлидир. Куёв жўра эса куёв ёнида туриб, унинг овозини эшитганидан севиниб хурсанд бўлади. Худди шундай мен ҳам бугун бениҳоят шодман.<sup>30</sup> Масих юксалиши, мен эса пасайишим керак.

<sup>31</sup> Юқоридан\* келган Зот ҳаммадан устундир. Ердан бўлган одам ерга мансубдир ва ерга хос масалалар тўғрисида гапиради. Осмондан Келган эса ҳаммадан устундир.<sup>32</sup> У кўргани ва эшитгани ҳақида гувоҳлик беради, аммо ҳеч ким Унинг гувоҳлигини қабул қилмайди.<sup>33</sup> Унинг гувоҳлигини қабул қилган киши эса Худонинг ҳақлигини тасдиқлади.<sup>34</sup> Худо юборган Зот Худонинг сўзларини гапиради. Зоро, Худо Ўз Руҳини Унга чексиз-ўлчовсиз беради.<sup>35</sup> Ота Ўғлини яхши кўради, У ҳамма нарсани Ўғлининг қўлига топширган.<sup>36</sup> Худонинг Ўғлига\* ишонган ҳар бир одам абадий ҳаётга эга бўлади. Ўғилни рад этган одам

эса ҳаёт күрмай, Худонинг ғазаби остида қолади.

## 4-БОБ

### Исо ва Самариялик аёл

<sup>1-3</sup> Исо Яхёдан кўра, кўпроқ шогирд орттириб, сувга чўмдиряпти деган хабар фарзийларнинг қулофига етиб борди. Ваҳоланки, халқни Исонинг Ўзи эмас, шогирдлари сувга чўмдираётган эдилар. Бу хабар фарзийларнинг қулофига етиб борганини Исо эшитгач, Яхудияни тарқ этиб, яна Жалилага йўл олди. <sup>4</sup> Йўлда У Самариядан ўтиши керак эди. <sup>5</sup> Шундай қилиб, У Самариянинг Сихар деган шаҳрига келди. Бу шаҳар Ёқуб\* ўз ўғли Юсуфга берган ерга яқин эди. <sup>6</sup> Ёқубнинг қудуғи ҳам ўша ерда эди.

Йўл юриб чарчаган Исо қудуқнинг ёнига ўтирди. Тахминан туш пайти\* эди.

<sup>7</sup> Шу вақт Самариялик бир аёл сув олгани келиб қолди. Исо унга:

— Менга ичгани сув бер, — деди. <sup>8</sup> Исонинг шогирдлари эса овқат сотиб олиш учун шаҳарга кеттган эдилар.

<sup>9</sup> Самариялик аёл Унга шундай деди:

— Сиз яхудий бўлсангиз, мен эса Самариялик аёл бўлсам, қандай қилиб мендан сув сўрашга журъят этдингиз?!\*

Нега десангиз, яхудийлар Самарияликлар билан алоқа қилмайдилар.

<sup>10</sup> Исо аёлга деди:

— Худо сенга қандай инъом бермоқчи эканлигини ва сендан сув сўраган Одам ким эканлигини сен билмайсан. Билганингда эди, ўзинг Ундан сув сўраган бўлар эдинг ва У сенга ҳаётбахш сувни берган бўларди.

<sup>11</sup> — Тақсир! — деди аёл, — Сизда сув оладиган ҳеч нарсангиз йўқ-ку, қудуқ эса чуқур. Ҳаётбахш сувингизни қаердан оласиз? <sup>12</sup> Бу қудуқни бизга бобокалонимиз Ёқуб берган. Унинг ўзи ҳам, болалари ҳам, чорваси ҳам бу қудуқдан сув ичган. Наҳотки Сиз Ёқубдан ҳам устун бўлсангиз?!

<sup>13</sup> Исо аёлга шундай жавоб берди:

— Бу сувдан ким ичса, яна чанқаб қолади. <sup>14</sup> Лекин Мен берадиган сувдан ким ичса, абадий чанқамайди. Мен берадиган сув ўша одамнинг вужудида булоқقا айланиб, то абад ҳаёт сари жўшиб оқади.

<sup>15</sup> — Тақсир, бу сувдан менга ҳам беринг. Мен ҳам ҳеч қачон чанқамайин, сув олгани бу ерга келавермайин, — деди аёл.

<sup>16</sup> — Бориб, эрингни бу ерга чақириб кел, — деди Исо.

<sup>17</sup> — Менинг эрим йўқ, — деди аёл.

— Эрим йўқ, деб сен тўғрисини айтдинг, — деди Исо. <sup>18</sup> — Сенинг беш нафар эринг бўлган, ҳозиргиси ҳам эринг эмас. Сен тўғрисини айтдинг!

<sup>19</sup> — Ҳазрат\*, Сиз пайғамбар эканингизни кўриб турибман, — деди аёл. <sup>20</sup> — Ота-боболаримиз Худога бу тоғда\* сажда қиласизлар. Аммо сизлар — яхудийлар эса Худога сажда қилинадиган жой Куддусда, дейсизлар.

<sup>21</sup> Исо унга деди:

— Эй аёл, Менга ишонгин, шундай вақт келадики, ўшанда осмондаги Отага на бу тоғда, на Қуддусда сажда қиласизлар. <sup>22</sup> Сизлар — Самарияликлар кимга сажда қилаётганингизни билмайсизлар\*, биз эса кимга сажда қилаётганимизни биламиз. Чунки нажот яхудийлардан келади. <sup>23</sup> Аммо шундай вақтлар келадики, ҳақиқий сажда қилувчилар Отага Руҳда ва ҳақиқатда сажда қиладилар. Бундай вақт келди ҳам! Ота шу йўсинда Ўзига сажда қилувчиларни излайди. <sup>24</sup> Худо Руҳdir, Унга сажда қилувчилар ҳам Муқаддас Руҳ бошлигигида, ҳақиқатни

билган ҳолда сажда қилишлари лозим.

<sup>25</sup> Аёл Исога:

— Мен Масиҳ келишини биламан. У келганды, ҳамма нарсани бизга тушунтиради, — деди. (Масиҳ “Худонинг танлагани” демакдир.)

<sup>26</sup> Исо аёлга деди:

— Ўша Менман. Сен билан гаплашиб турибман.

<sup>27</sup> Шу пайтда Исонинг шогирдлари келиб қолишиди. Унинг бир аёл билан гаплашаётганини кўриб ҳайрон бўлишиди. Лекин бирортаси ҳам: “Нима хоҳлайсиз?” ёки: “Нимага бу аёл билан гаплашяпсиз?” деб сўрамади.

<sup>28</sup> Аёл кўзасини ўша ерда қолдирди-да, шаҳарга бориб, одамларга деди:

<sup>29</sup> — Юринглар, бир Одамни кўринглар. У менинг қилган ҳамма ишларимни айтиб берди! Ўша Масиҳ эмасмикин?

<sup>30</sup> Одамлар шаҳардан чиқиб, Исонинг олдига бордилар.

<sup>31</sup> Шу орада шогирдлари Исога:

— Устоз, овқат еб олинг, — деб таклиф қилдилар. <sup>32</sup> Аммо Исо уларга деди:

— Менинг ейдиган овқатим бор, сизлар бу овқат тўғрисида билмайсизлар.

<sup>33</sup> Шогирдлари ўзаро гаплашиб: “Бирон киши Унга овқат келтирганмикин?” деб айтишарди. <sup>34</sup> Исо уларга деди:

— Менинг овқатим — Мени Юборганинг иродасини адо этиш, Унинг ишини тугатишdir. <sup>35</sup> Сизлар: “Экинлар тўрт ойда етилади” деган иборани ишлатаисизлар. Мен эса сизларга айтаман: кўзларингизни очинглар! Экинзорларга қаранглар! Ҳосил етилган, ўрим-ийғимга тайёр бўлган. <sup>36</sup> Ўроқчи ҳозирдан яхши даромад олмоқда, абадий ҳаёт учун ҳосил йиғмоқда. Токи ҳосилни эккан ва ўрган бирга қувонишин. <sup>37</sup> “Бири экади, бошқаси ўради” деган мақол шу вазиятга тўғри келади. <sup>38</sup> Мен сизларни ўзингиз меҳнат қилиб экмаган ҳосилни ўргани юбордим. Бошқалар меҳнат қилган эдилар, сизлар эса уларнинг меҳнатидан фойдаланасизлар.

<sup>39</sup> Шундан кейин ўша шаҳарда яшовчи талай Самарияликлар Исога имон келтиришиди. Улар ҳалиги аёлнинг “У менинг қилган ҳамма ишларимни айтиб берди” деган гувоҳлигига ишонган эдилар. <sup>40</sup> Шундай қилиб, Самарияликлар Исонинг олдига келиб: “Биз билан қолинг”, деб Исога ёлворишиди. Исо икки кун ўша ерда қолди. <sup>41</sup> Исонинг айтган сўзлари туфайли кўп одамлар имон келтирди.

<sup>42</sup> Шунда улар аёлга дедилар:

— Энди сенинг сўзларинг туфайлигина ишонаётганимиз йўқ. Уни ўзимиз ҳам эшиитдик. У ҳақиқатан ҳам оламнинг Нажоткори эканлигига амин бўлдик\*.

### Исо амалдорнинг ўғлини соғайтиради

<sup>43</sup> Икки кундан кейин Исога у ердан Жалила ҳудудига жўнаб кетди. <sup>44</sup> У: “Пайғамбар ўз юртида эътибор топмайди”, деб таъкидлаганди. <sup>45</sup> Жалилага келганда эса, аҳоли Уни очиқ чехра билан кутиб олди. Чунки улар Фисиҳ байрами учун Куддусга боргандарида, у ерда Исонинг қилган ҳамма ишларини кўрган эдилар.

<sup>46</sup> Шундай қилиб, Исога яна Жалиладаги Каъна қишлоғига келди. Бу ерда У сувни шаробга айлантирган эди. Ўша пайтда Кафарнаҳум шахрида бир сарой амалдорининг\* ўғли касал бўлиб ётган эди. <sup>47</sup> Бу одам Исонинг Яхудиядан Жалилага келганлигини эшитиб, Унинг олдига борди. Исога:

— Юринг, ўлим тўшагида ётган ўғлимга шифо беринг, — деб ёлворди.

<sup>48</sup> — Сизлар аломумату мўъжизалар кўрмагунча ишонмайсизлар! — деди унга Исога.

<sup>49</sup> — Юра қолинг Ҳазрат, ўғилгинам ўлиб қолмасин! — деди сарой амалдори

Унга.

<sup>50</sup> — Сиз бораверинг. Ўғлингиз соғ-саломат, — деди Исо.

У одам Исонинг айтганига ишониб, жўнаб кетди. <sup>51</sup> У ҳамон йўлда экан, хизматкорлари унга пешвоз чиқиб:

— Ўғлингиз соғ-саломат, — деган хабар келтирдилар.

<sup>52</sup> — Қайси соатда аҳволи енгиллашди? — дея сўради у.

— Кеча тушда, соат бирларда\* иситмаси тушди, — дейишиди хизматкорлар.

<sup>53</sup> “Ўғлингиз соғ-саломат” деган сўзларни Исо айнан ўша вақтда айтганини боланинг отаси англади. Шунда ўзи ва бутун хонадони Исога имон келтирди.

<sup>54</sup> Бу эса Исонинг Яхудиядан Жалилага келиб кўрсатган иккинчи мўъжизали аломати эди.

## 5-БОБ

### Исо шолни соғайтиради

<sup>1</sup> Бу ҳодисалардан кейин Исо яхудийларнинг байрамини нишонлаш учун Куддусга борди. <sup>2</sup> Қуддуснинг Қўй дарвозаси ёнида бир ҳовуз бор эди. Бу ҳовузнинг орамийча\* номи Байтзада\* бўлиб, бешта айвони бор эди. <sup>3-4</sup> Бу айвонларда кўр, чўлоқ ва шол бўлган кўп ногиронлар ётар эди\*. <sup>5</sup> Бу ерда ўттиз саккиз йилдан бери ногирон бўлиб ётган бир киши бор эди. <sup>6</sup> Исо унинг ётганини кўрди, у узоқ вақтдан бери хаста эканлигини Исо биларди. Шунинг учун ундан:

— Соғайишни истайсанми? — деб сўради. <sup>7</sup> Ногирон одам Исога шундай жавоб берди:

— Тақсир, сув қимирилаганда мени ҳовузга туширадиган одам йўқ. Мен боргунимча, бошқаси мендан олдин тушиб олади.

<sup>8</sup> Исо унга шундай деди:

— Ўрнингдан тур! Тўшагингни олиб, юр!

<sup>9</sup> Ўша одам шу заҳоти соғайиб кетди. Тўшагини олиб, юра бошлади.

Бу ҳодиса Шаббат куни содир бўлди. <sup>10</sup> Шунинг учун яхудийлар соғайиб кетган одамга дейишиди:

— Бугун Шаббат куни! Шу куни тўшакни кўтариб юриш қонунда ман этилган!\*

<sup>11</sup> У одам эса шундай жавоб берди:

— Мени соғайтирган Киши менга: “Тўшагингни олиб, юр”, деб айтди.

<sup>12</sup> — “Тўшагингни олиб, юр”, деб айтган Одам ким? — деб сўрадилар. <sup>13</sup> Шифо топган одам эса Унинг кимлигини билмас эди, у ерда халқ кўплигидан Исо Ўзини четга олган эди.

<sup>14</sup> Кейинроқ Исо у одамни Маъбадда учратиб қолиб, унга деди:

— Мана, сен соғайдинг. Энди гуноҳ қилма, тағин бошингга бундан баттар кунлар келмасин.

<sup>15</sup> Бу одам бориб, уни соғайтирган Исо эканлигини яхудийларга айтди. <sup>16</sup> Улар эса, Исони Шаббат кунидан бундай ишлар қилиб юргани учун қувғин қила бошладилар\*. <sup>17</sup> Аммо Исо уларга шундай деди:

— Менинг Отам шу кунгача Ўз ишини қилиб келяпти, Мен ҳам Ўз ишимни қиляпман, — деди.

<sup>18</sup> Ана шу сўзи учун яхудийлар Исони ўлдиришга янада кўпроқ ҳаракат қилишди. Чунки У нафақат Шаббат қоидаларини бузди, балки Худони Отам деб, Ўзини Худога тенглаштирган эди.

### Ўғилнинг ҳокимиияти

<sup>19</sup> Исо яхудийларга шундай деди: “Сизларга чинини айтай: Ўғил Ўзидан-Ўзи

ҳеч нарса қила олмайди. Фақат Отасидан кўрган ишларни қилади. Осмондаги Ота нималарни қилса, Ўғил ҳам худди шуларни қилади.<sup>20</sup> Ахир, Ота Ўғлини яхши кўради, Ўзи қилган ҳамма ишларни Ўғлига кўрсатади. У Ўғлига бундан ҳам буюкроқ ишларни кўрсатади, шунда ҳаммангиз ҳайрон қоласизлар.<sup>21</sup> Ота ўликларни тирилтириб, уларга ҳаёт бахшида этгандай, Ўғил ҳам истаган одамига ҳаёт бахш этади.<sup>22</sup> Шунингдек, Ота ҳеч кимни ҳукм қилмайди, балки ҳукм қилиш ҳуқуқини Ўғлига берган,<sup>23</sup> токи ҳамма осмондаги Отани ҳурмат қилгандай, Ўғлини ҳам ҳурмат қилсинлар. Ким Ўғилни ҳурмат қилмаса, Уни юборган Отани ҳам ҳурмат қилмаган бўлади.

<sup>24</sup> Сизларга чинини айтай: Менинг сўзларимни тинглаган ва Мени Юборганга ишонган киши абадий ҳаётга эгадир. У ҳукм қилинмайди. Зотан, у ўлимдан ҳаётга ўтган.<sup>25</sup> Сизларга чинини айтай: ўликлар Худо Ўғлининг\* овозини эшитадиган вақт келади, келиб қолди ҳам. Ўғилнинг овозига қулоқ солганлар тирилади.

<sup>26</sup> Зеро, Отанинг Ўзи ҳаёт манбаи бўлгани каби, Ўғлига ҳам ҳаёт манбаи бўлиш қудратини ато қилди.<sup>27</sup> Бундан ташқари, самовий Ота инсонларни ҳукм қилиш ҳокимиятини Ўғлига берди, чунки У Инсон Ўғлидир.<sup>28</sup> Бунга ҳайрон қолманглар! Қабрда ётган марҳумларнинг ҳаммаси Инсон Ўғлининг овозини эшитадиган вақт келади.<sup>29</sup> Шунда ўликлар қабрларидан чиқадилар: яхшилик қилганлар яшаш учун тирилади, ёмонлик қилганлар эса маҳкум бўлиш учун тирилади.

### Исо ҳақида Худонинг берган гувоҳлиги

<sup>30</sup> Мен Ўзимдан Ўзим ҳеч нарса қилолмайман. Осмондаги Отам Менга қандай айтса, шундай ҳукм қиласман, шунинг учун ҳукмим тўғридир. Зотан, Мен Ўз иродамни эмас, балки Мени юборган Отамнинг иродасини бажо келтиришни истайман.<sup>31</sup> Агар Мен Ўзим ҳақимда Ўзим гувоҳлик берсам, Менинг гувоҳлигим ҳақиқий бўлмайди.<sup>32</sup> Аммо Мен ҳақимда гувоҳлик берувчи бошқаси бор. Унинг берган гувоҳлиги ҳақиқат эканлигини биламан.

<sup>33</sup> Сизлар Яҳёning олдига одам юбордингизлар, у ҳақиқат тўғрисида гувоҳлик берди.<sup>34</sup> Гарчи Мен инсоннинг гувоҳлигига муҳтоҷ бўлмасам-да, лекин буларни сизлар нажот топишингиз учун айтяпман.<sup>35</sup> Яхё гўё ёниб туриб, нур сочган бир чироқдай эди. Сизлар эса унинг нурида бирпас қувонмоқчи бўлдингизлар.

<sup>36</sup> Бироқ Мен Яҳёдан кўра, каттароқ гувоҳликка эгаман. Гувоҳлик деб, Мен тугатишим учун осмондаги Отам берган ишларни назарда тутяпман. Буларнинг ҳаммаси Мени Отам юборганидан далолат беради.

<sup>37</sup> Мени юборган Отамнинг Ўзи ҳам Мен ҳақимда гувоҳлик бериб турибди. Сизлар эса ҳеч қачон Унинг овозини эшитмагансиз, қиёфасини ҳам кўрмагансиз.<sup>38</sup> Унинг каломи ҳам кўнглингиздан жой олмади, чунки сизлар У юборган Зотга ишонмаяпсизлар.<sup>39</sup> Сизлар Муқаддас битикларни\* текширасизлар, чунки улар орқали абадий ҳаётга эга бўламиз, деб ўйлайсизлар. Аммо ўша Ёзувлар Мен тўғримда гувоҳлик беради-ку!<sup>40</sup> Сизлар эса ҳаётга эга бўлиш учун олдимга келишни истамайсизлар.

<sup>41</sup> Мен инсонлардан таҳсин кутмайман.<sup>42</sup> Лекин сизларни биламан, қалбингизда Худонинг севгиси йўқ.<sup>43</sup> Мен Отамнинг номидан келдим, аммо сизлар Мени қабул қилмаяпсизлар. Агар кимдир ўз номидан келса, уни қабул қиласверасизлар.<sup>44</sup> Сизлар бир-бирингиздан таҳсинлар олишни яхши кўрасизлар, лекин ягона Худонинг таҳсинига сазовор бўлишга ҳаракат қилмайсизлар. Қандай қилиб ҳам Менга ишона олардингиз?!<sup>45</sup> Мен сизларни Ота олдида айблайман, деб ўйламанглар. Сизлар Мусога умид боғлагансизлар. Мусонинг ўзи сизларни айблайди.<sup>46</sup> Агар Мусога ишонганингизда эди, Менга ҳам ишонган бўлар эдингизлар. Ахир, у Мен ҳақимда ёзган эди.<sup>47</sup> Мусонинг ёзувларига ишонмаган

бўлсангиз, Менинг сўзларимга қандай ишонасизлар?!"

## 6-БОБ

### Исо 5000 кишини тўйдиради

<sup>1</sup> Шундан кейин Исо қайиқда Жалила кўлининг нариги қирғоғига сузид ўтди\* (Жалила кўлини Тибериас кўли деб ҳам аташарди). <sup>2</sup> Бир талай халойиқ Исонинг орқасидан эргашиб борарди. Чунки Исо мўъжизали аломатлар орқали хасталарни соғайтирганини улар кўрган эдилар. <sup>3</sup> У шогирдлари билан тоқقا чиқиб ўтирди.

<sup>4</sup> Яхудийларнинг Фисих байрами яқинлашаётган эди.

<sup>5</sup> Исо қараса, бир талай халойиқ У томонга келаётган экан. Исо Филипдан:

— Бу одамларни тўйғазиш учун қаердан нон сотиб оламиз? — деб сўради.

<sup>6</sup> Исо бу гапни Филипни синаб кўриш учун айтаётган эди, аслида нима қилишни Ўзи билар эди.

<sup>7</sup> Филип шундай жавоб берди:

— Буларнинг ҳар бирига бир бурда нон бериш учун икки юз кумуш тангага\* нон сотиб олсак ҳам етмайди!

<sup>8</sup> Шунда шогирдларидан бири, Бутруснинг\* укаси Эндрус Исота деди:

<sup>9</sup> — Бу ердаги бир болада бешта арпа нон билан иккита балиқ бор экан. Лекин шунча одамга бу нима ҳам бўлар эди.

<sup>10</sup> — Одамларни ерга ўтқазинглар, — деди Исо.

У ер қалин майсазор эди. Одамларнинг ҳаммаси ерга ўтиришди. Оломон орасида тахминан беш мингга яқин эркак бор эди. <sup>11</sup> Исо нонларни олиб, шукrona дуосини ўқиди. Сўнг ўтирганларнинг ҳаммасига тарқатди\*. Балиқларни ҳам худди шундай қилди. Одамлар истаганларича едилар.

<sup>12</sup> Ҳаммалари еб тўйғанларидан кейин, Исо шогирдларига шундай деди:

— Ортиб қолган нон бурдаларини йиғиб олинглар, исроф бўлмасин.

<sup>13</sup> Шогирдлар ейилган бешта арпа нондан ортиб қолган бурдаларни йиғиб олишди, ўн иккита сават тўлди. <sup>14</sup> Шунда одамлар Исонинг қилган мўъжизали аломатини кўриб:

— Ҳақиқатан ҳам дунёга келиши керак бўлган пайғамбар\* мана шу Киши экан, — дедилар. <sup>15</sup> Улар Исони зўрлик билан шоҳ қилиб кўтармоқчи бўлдилар. Буни билган Исо ёлғиз Ўзи тоқقا чиқиб кетди.

### Исо сув устида юради

<sup>16</sup> Кечки пайт Исонинг шогирдлари кўл бўйига бордилар. <sup>17</sup> Қоронғи тушган, Исо эса ҳали ҳам уларнинг олдига келмаган эди. Шогирдлар қайиққа тушиб, кўлнинг нариги томонидаги\* Кафарнаҳумга қараб йўл олдилар. <sup>18</sup> Кучли шамол эсиб, кўл тўлқинланиб кетаётган эди. <sup>19</sup> Улар қирғоқдан беш чақиримча\* масофани сузганларидан кейин, кўл юзида юриб келаётган Исони кўришди. У қайиққа яқинлашаётган эди, шогирдлар қаттиқ ваҳимага тушиши.

<sup>20</sup> — Кўрқманглар, бу Менман! — деди уларга Исо.

<sup>21</sup> Улар Исони қайиққа олмоқчи бўлдилар. Ўша заҳоти қайиқ улар бораётган қирғоққа етиб тўхтади.

### Исо — ҳаёт нони

<sup>22</sup> Эртаси куни халқ Исони қидира бошлади. Одамлар у ерда фақат бир қайиқ борлигини ва шогирдлар Исони қолдириб, ўзлари қайиқда сузид кетганларини билишарди. <sup>23</sup> Шу пайт Тибериасдан\* бошқа қайиқлар келиб қолди. Қайиқлар тўхтаган жой Раббимиз Исо Ўз шукrona дуосини ўқиган ва халқ нон еган ерга

яқын эди.<sup>24</sup> Одамлар Исо билан шогирдларининг у ерда йўқлигини кўргач, қайиқларга тушиб, Исони қидириб Кафарнаҳумга сузив келишди.<sup>25</sup> Улар Исони кўлнинг нариги бўйидан\* топиб, Ундан сўрашди:

— Устоз, Сиз қачон бу ерга келдингиз?

<sup>26</sup> Исо уларга шундай жавоб берди:

— Сизларга чинини айтайн: сизлар мўъжизали аломатларни кўрганингиз учун эмас, балки нон еб тўйганингиз учун Мени қидиряпсизлар.<sup>27</sup> Сиз ўткинчи озуқа учун эмас, абадий ҳаётга бошловчи боқий озуқа учун ҳаракат қилинглар. Бундай озуқани сизларга Инсон Ўғли беради. Зотан, Отамиз Худонинг Ўзи бу вазифа учун Уни маъқул деб топди.

<sup>28</sup> Одамлар Исола шундай савол беришди:

— Худога маъқул ишларни бажариш учун нима қилишимиз керак?

<sup>29</sup> Исо деди:

— Худога маъқул иш қилмоқчи бўлсангизлар, Худо юборган Зотга ишонинглар.

<sup>30</sup> Улар Исола жавобан шундай дедилар:

— Сизга ишонишимиз учун бирорта аломат кўрсатинг. Қани, биз учун нима иш қиласиз?<sup>31</sup> Ахир, ота-боболаримиз саҳрода манна\* еганлар. Муқаддас битикларда: “Худо уларга есин деб, осмондан нон берди”\*, деб ёзилган-ку.

<sup>32</sup> Исо уларга деди:

— Сизларга чинини айтайн, сизларга осмондан нон берган Мусо эмас. Осмондан тушган ҳақиқий нонни сизларга Менинг Отам беради.<sup>33</sup> Отам Худо берадиган нон осмондан тушиб, дунёга ҳаёт баҳш этади.

<sup>34</sup> Одамлар Исола шундай дедилар:

— Ҳазрат, бундай нонни бизга доим бериб туринг!

<sup>35</sup> Исо жавобан деди:

— Мен ҳаёт нониман. Менинг олдимга келган одам сира оч қолмайди, Менга ишонган одам ҳеч қачон чанқамайди.<sup>36</sup> Аммо Мен сизларга айтганимдай, сизлар Мени кўрган бўлсангизлар ҳам, ишонмаяпсизлар.<sup>37</sup> Самовий Отам Менга берган ҳар бир одам Менинг олдимга келади. Олдимга келган биронта одамни Мен асло ҳайдаб юбормайман.<sup>38</sup> Мен Ўз иродамни эмас, балки Мени юборган Отамнинг иродасини адо этиш учун осмондан тушганман.<sup>39</sup> Отамнинг иродаси шундан иборатки, У Менга берганлардан биронтасининг ҳам йўқолишига Мен йўл қўймаслигим керак, балки охиратда уларнинг ҳаммасини тирилтиришим керак.<sup>40</sup> Ҳа, Ўғилга кўз тиккан ва Унга ишонган ҳар бир одам абадий ҳаётга эга бўлиши Отамнинг иродасидир. Мен бундай одамларни охиратда тирилтираман.

<sup>41</sup> Исо: “Мен осмондан тушган нонман” дегани учун яҳудийлар Ундан норози бўла бошлишди.<sup>42</sup> Улар ўзаро шундай деб айтишарди:

— Бу Юсуфнинг ўғли Исо-ку! Ота-онасини танимиз, қандай қилиб: “Мен осмондан тушдим”, деб айтишга ҳадди сиғди?!

<sup>43</sup> — Бундай гапларингизни бас қилинглар! — деди уларга Исо.<sup>44</sup> — Агар Мени юборган Ота бирорни жалб қилмаса, у Менга келолмайди. Олдимга келган одамни эса Мен охиратда тирилтираман.<sup>45</sup> Пайғамбарлар битикларида: “Уларнинг ҳаммасига Худо таълим беради”\*, деб ёзилган. Отага қулоқ солган, Ундан ўргангандан ҳар бир одам Менинг олдимга келади.<sup>46</sup> Аслида ҳеч ким ҳеч қачон самовий Отани кўрган эмас, биргина Худодан бўлган Зот Отани кўрган.

<sup>47</sup> Сизларга чинини айтаман: ким Менга ишонса, абадий ҳаётга эга бўлади.<sup>48</sup> Мен ҳаёт нониман.<sup>49</sup> Ота-боболарингиз саҳрода манна егандилар, шунга қарамай ўлиб кетдилар.<sup>50</sup> Аммо осмондан тушадиган бу нон эса шундай хислатга эгаки,

ундан еган одам ўлмайди.<sup>51</sup> Мен осмондан тушган ҳаётбахш нондирман. Бу нонни еган киши абадий яшайди. Дунёга ҳаёт бахшида этиш учун берадиган ноним Менинг танамдир.

<sup>52</sup> Шунда яхудийлар:

— У қандай қилиб бизга Ўзининг танасини едира олар экан? — деб ўзаро талашиб-тортиша бошладилар.<sup>53</sup> Исо уларга деди:

— Сизларга чинини айтаман: агар Инсон Ўғлининг танасини емасангизлар ва Унинг қонини ичмасангизлар, сизда ҳаёт бўлмайди.<sup>54</sup> Менинг танамни еган ва қонимни ичган одам эса абадий ҳаётга эгадир. Мен уни охиратда тирилтираман.<sup>55</sup> Менинг танам — ҳақиқий озуқа, қоним ҳақиқий ичимлиқдир.<sup>56</sup> Танамни еб, қонимни ичадиган одам Менда, Мен эса унда яшайман.<sup>57</sup> Модомики, Мени барҳаёт Ота юборган экан, Мен Ота туфайли яшайман. Менинг танамни еган ҳар бир одам эса Мен туфайли яшайди.<sup>58</sup> Осмондан тушган нон мана шудир. Бу нон ота-боболарингиз еган маннага ўхшамайди, улар манна еб ўлиб кетганлар. Мен берган нонни еган одам эса абадий яшайди.

### Абадий ҳаёт бахш этувчи сўзлар

<sup>59</sup> Исо бу сўзларни Кафарнаҳумдаги синагогада таълим бераётганда айтган эди. <sup>60</sup> Унинг кўплаб шогирдлари бу гапларни эшишиб:

— Қанчалик қаттиқ сўзлар! Буларни ким ҳазм қила олади?! — дейишар эди.

<sup>61</sup> Шогирдлари норози бўлғанларини Исо биларди, шунинг учун У шундай деди:

— Гапларим жиғингизга тегяптими?<sup>62</sup> Агар сизлар Инсон Ўғлининг асли келган жойига — осмонга кўтарилиб кетаётганини кўрсангизлар, нима дер экансизлар-а?!<sup>63</sup> Худонинг Руҳи ҳаёт бахш этади, инсоннинг кучи билан эса ҳеч нарсага эришиб бўлмайди. Сизларга айтган бу сўзларимни Менга Худонинг Руҳи берган, бу сўзларим сизларга ҳаёт ато қиласиди.<sup>64</sup> Шунга қарамай, орангизда Менга ишонмаганлар бор.

Ҳолбуки, Исо кимлар ишонмаганини ва ким Унга хиёнат қилишини олдиндан билар эди.

<sup>65</sup> Исо гапида давом этди:

— Шу сабабдан Мен сизларга: “Осмондаги Отам йўл қўймаса, ҳеч ким Менинг олдимга келолмайди”, — деган эдим.

<sup>66</sup> Ўша вақтдан бошлаб кўп шогирдлар Исодан юз ўгириб, Унга эргашмайдиган бўлдилар.<sup>67</sup> Шунда Исо ўн икки шогирдидан:

— Сизлар ҳам кетмоқчимисизлар? — деб сўради.

<sup>68</sup> Бутрус шундай жавоб берди:

— Ҳазрат, биз Сиздан бошқа кимга ҳам борар эдик?! Абадий ҳаёт бахш этувчи сўзлар Сизда-ку!<sup>69</sup> Сиз Худонинг Азизи\* эканингизга ишончимиз комил.

<sup>70</sup> Исо уларга деди:

— Мен ўн иккитангизни танлаб олдим. Лекин орангиздаги биттангиз иблисдир!

<sup>71</sup> У Шимён ўғли Яхудо Ишқариётни назарда тутган эди. Яхудо ўн икки шогирддан бири бўлса ҳам, кейинчалик Исола хиёнат қилди.

## 7-БОБ

### Исо ва укалари

<sup>1</sup> Шундан кейин Исо Жалила худудини кеза бошлади. У Яхудияни кезишни хоҳламаган эди, чунки у ердаги яхудийлар Уни ўлдиришга қасд қилган эдилар.

<sup>2</sup> Яхудийларнинг Чайла байрами\* яқинлашаётган эди. <sup>3</sup> Укалари Исола шундай

дайиши:

— Бу ердан чиқиб Яхудияга боринг. Қилаётган ишларингизни шогирдларингиз ҳам кўришсин.<sup>4</sup> Эл назарига тушаман деган биронта одам яширинча иш қилмайди-ку! Бундай ишларни қиласиз, Ўзингизни дунёга танинг!

<sup>5</sup> Ҳатто укалари ҳам Унга ишонмас эдилар. <sup>6</sup> Исо укаларига шундай деди:

— Менинг вақт-соатим ҳали келгани йўқ. Лекин сизлар учун ҳар вақт қулайдир. <sup>7</sup> Дунё сизлардан нафратлана олмайди, лекин Мендан нафратланади. Чунки Мен унинг қилмишлари ёмон эканлигини юзига соламан. <sup>8</sup> Майли, сизлар байрамга боринглар. Мен ҳозирча бу байрамга бормайман, чунки Менинг вақтим ҳали келгани йўқ.

<sup>9</sup> Шу сўзларни айтиб, Исо Жалилада қолди.

### Исо Куддусда Чайла байрамида

<sup>10</sup> Исонинг укалари байрамга кетганларидан кейин, Исонинг Ўзи ҳам ҳеч кимга билдиримай, яширинча байрамга борди. <sup>11</sup> Яхудийлар эса Исони байрамда қидирад, “У қаёқда?” деб сўрар эдилар. <sup>12</sup> Омма орасида Исо тўғрисида ҳар хил гап-сўзлар ёйилган эди. Баъзилар: “У яхши одам”, десалар, бошқалар: “Йўқ, У халқни йўлдан оздиряпти”, дайишарди. <sup>13</sup> Бироқ яхудийлардан қўрққанлари учун У ҳақда ҳеч ким очиқ гапирмас эди.

<sup>14</sup> Байрамнинг ярми ўтганда, Исо Маъбадга кириб, таълим берга бошлади.

<sup>15</sup> Уни эшитган яхудийлар ҳайрон қолиб дайиши:

— Бу Одам ўқимаган бўлса, қаердан шунча нарсани билади?!

<sup>16</sup> Исо уларга жавобан деди:

— Мен ўргатаётган таълимот Ўзимники эмас, балки Мени Юборганницидир.

<sup>17</sup> Ким Худонинг иродасини бажаришни истаса, бу таълимот Худоданми ёки Ўзимданми, билиб олади. <sup>18</sup> Ким ўз номидан гапирса, ўзига шуҳрат излайди. Ким уни юборганга шуҳрат изласа, ҳақиқатни сўзлайди, унинг дилида ҳийла бўлмайди. <sup>19</sup> Қонунни сизларга Мусо берди, шундай эмасми? Аммо бирортангиз қонунни бажармайсиз. Нега Мени ўлдирмоқчисизлар?

<sup>20</sup> — Сени жин урибди! Ким Сени ўлдирмоқчи экан? — деди халойик. <sup>21</sup> Исо эса Ўз сўзида давом этди:

— Мен Шаббат куни битта мўъжиза қилганим\* учун ҳаммаларингиз ҳайрон қоляпсизлар. <sup>22</sup> Ўзларингиз эса, Мусонинг қонунига амал қилайлик деб, Шаббат куни ўғил болани суннат қиласизлар-ку! Аслида, суннат одати\* Мусодан эмас, Иброҳим давридан қолган. <sup>23</sup> Мусонинг қонуни бузилмасин деб, сизлар ҳатто Шаббат куни ҳам ўғил болани суннат қилсангизлар, нега Мендан ғазабланасизлар?! Шаббат куни одамни бутунлай соғайтирганим учунми?!

<sup>24</sup> Юзаки хукм қилманглар, хукмингиз адолатли бўлсин.

### Исонинг кимлиги ҳақида гумонлар

<sup>25</sup> Баъзи Куддусликлар шундай дайишарди:

— Йўлбошчиларимиз ўлдирмоқчи бўлган Одам шу эмасми?<sup>26</sup> Мана, У ҳамманинг олдида сўзлаяпти, Унга қарши ҳеч ким ҳеч нарса демаяпти. Наҳотки йўлбошчиларимиз Уни Масиҳ деб тан олишган бўлса?!<sup>27</sup> Аммо бу Одамнинг қаерданлигини ҳаммамиз биламиз, Масиҳ келганда эса, Унинг қаерданлигини ҳеч ким билмайди.

<sup>28</sup> Исо Маъбадда таълим берар экан, баланд овозда шундай деди:

— Ҳа, сизлар Менинг кимлигимни ҳам, қаерданлигимни ҳам биласизлар. Лекин Мен Ўзимча келганим йўқ. Мени Юборган бор, сизлар эса Уни

танимайсизлар. У ҳақдир. <sup>29</sup> Мен Уни биламан, чунки Мен Унинг олдидан келганман, У Мени юборган.

<sup>30</sup> Бу гапи учун Исони қўлга олмоқчи бўлдилар. Бироқ ҳеч ким Унга қўл теккизмади, чунки Унинг вақт-соати ҳали келмаган эди. <sup>31</sup> Шу билан бирга, халқ орасидаги қўп одамлар Унга имон келтирди. Улар:

— Масиҳ келса ҳам, барибир бунчалик қўп мўъжизали аломатлар кўрсата олмайди! — дейишарди.

### Исони тутиб олмоқчилар

<sup>32</sup> Одамлар Исо тўғрисида шундай деб пичирлашаётганини фарзийлар эшитиб қолишиди. Шунда бош руҳонийлар\* билан фарзийлар Исони қўлга олиш учун Маъбад миршабларини\* юборишиди.

<sup>33</sup> Исо деди:

— Мен сизлар билан қисқа бир муддат бўлиб, яна Мени Юборганинг олдига қайтиб бораман. <sup>34</sup> Сизлар Мени излайсизлар-у, лекин тополмайсизлар. Мен борадиган жойга сизлар боролмайсизлар.

<sup>35</sup> Буни эшитган яҳудийлар ўзаро шундай деб айтишарди:

— У қаерга бормоқчики, биз Уни топа олмасак? Балки У бошқа юртларда яшайдиган яҳудийлар орасига бормоқчидир? Ғайрияҳудийларга\* ҳам таълим бермоқчидир? <sup>36</sup> “Сизлар Мени излайсиз-у, лекин тополмайсизлар, Мен борадиган жойга, сизлар боролмайсизлар” деган гаплари билан нима айтмоқчи экан?

### Ҳаётбахш сув ва Руҳ ҳақида

<sup>37</sup> Чайла байрамининг охирги, улуғ кунида Исо туриб, баланд овозда хитоб қилди:

— Ким чанқаган бўлса, Менинг олдимга келиб иксин. <sup>38</sup> Шунда Муқаддас битикларда айтилганидек, Менга ишонган одамнинг ичидан ҳаётбахш сув дарё бўлиб оқиб чиқади.

<sup>39</sup> Исо шундай деганда, Муқаддас Руҳни назарда тутган эди. Унга ишонганлар Руҳни қабул қилиб олишлари керак эди. Лекин Руҳ ҳануз берилмаган эди, чунки Исо ҳали улуғланмаган эди.

### Исо туфайли ҳалқ бўлинади

<sup>40</sup> Оломон ичидан баъзилари бу сўзларни эшитиб шундай дедилар:

— Ҳақиқатан ҳам бу Одам биз кутган пайғамбар\* экан.

<sup>41</sup> Бошқалари:

— Бу Масиҳ, — дейишса, яна бошқалари шундай дейишарди:

— Масиҳ Жалиладан келмайди-ку! <sup>42</sup> Муқаддас битикларда, Масиҳ Довуднинг уруғидан келиб чиқади, У Довуд яшаган Байтлаҳм қишлоғида туғилади, деб айтилмаганми?!\*

<sup>43</sup> Шу тариқа Исо туфайли ҳалқ иккига бўлинди. <sup>44</sup> Баъзилар Уни қўлга олмоқчи бўлишди, аммо ҳеч ким Унга қўл теккизмади.

<sup>45</sup> Шу пайт Маъбад миршаблари бош руҳонийларнинг ва фарзийларнинг олдига қайтиб келишди.

— Нега Уни олиб келмадингизлар? — деб сўрашди улардан.

<sup>46</sup> — Ҳеч ким ҳеч қачон бу Одамдай гапирмаган, — деди миршаблар.

<sup>47</sup> — Мабодо У сизларни ҳам йўлдан урмадими? — дейишди фарзийлар. <sup>48</sup> — Бош руҳонийлар билан фарзийлар орасида Унга ишонган биронта одам ҳам йўқ!

<sup>49</sup> Тавротни билмаган ўша қаланғи-қасанғилар эса шундоқ ҳам лаънат остида қолган!

<sup>50</sup> Шунда фарзийлардан бири, илгари Исонинг олдига борган Никодим\* шундай савол берди:

— Қонунимизга кўра, наҳотки биз одамни эшитмай туриб, унинг айбини топмасдан уни ҳукм қила олсак?!

— Сен ҳам Жалиладан бўлсанг керак-а? Муқаддас битикларни ўрганиб чиқ, Жалиладан пайғамбар чиқмаслиги аниқ, — дейишиди унга\*.

<sup>53</sup> Шундан кейин ҳаммалари уй-уйларига тарқалиб кетдилар.

## 8-БОБ

### Исо фоҳиша аёлни кечиради

<sup>1</sup> Исо Зайтун тоғи\* томон кетди. <sup>2</sup> Саҳарда яна Маъбадга қайтди. Бутун халқ Унинг олдига йиғилиб келди, У эса ўтириб, одамларга таълим бера бошлади. <sup>3</sup> Шу орада Таврот тафсирчилари\* билан фарзийлар бир аёлни олиб келишиди. Улар бу аёлни зино қилаётганда ушлаб олишган эди. Аёлни ҳамманинг олдига турғизиб, <sup>4</sup> шундай дейишиди:

— Устоз, бу аёл зино қилаётганда ушланди. <sup>5</sup> Мусо қонунда бундай аёлларни тошбўрон қилишни буюрган\*. Сиз нима дейсиз?

<sup>6</sup> Бу савол билан улар Исони тузоққа илинтириб, айлашга асос топмоқчи эдилар. Исо эса энгалиб бармоғи билан ерга ёза бошлади. <sup>7</sup> Улар бу саволни қайта-қайта сўрайвергандар учун, Исо ўрнидан туриб деди:

— Сизнинг орангизда ким бегуноҳ бўлса, ўша биринчи бўлиб аёлга тош отсин.

<sup>8</sup> Сўнг яна энгалиб, ерга ёзишни давом эттириди. <sup>9</sup> Улар бу гапни эшитиб\*, катталардан бошлаб ҳаммаси бирин-кетин кета бошлашиди. Охирида ёлғиз Исо билан Унинг олдида турган аёл қолди. <sup>10</sup> Исо ўрнидан туриб аёлга деди:

— Эй аёл, бошқалар қани? Ҳеч ким сени маҳкум қилмадими?

<sup>11</sup> — Ҳеч ким, Ҳазрат! — деб жавоб берди аёл.

Исо деди:

— Мен ҳам сени маҳкум қилмайман. Бор, бундан кейин бошқа гуноҳ қилма.

### Исо Масиҳ — оламнинг нури

<sup>12</sup> Исо яна халқа гапириб деди:

— Мен оламнинг нуриман. Кимки Менга эргашса, ҳеч қачон зулматда юрмайди, балки ҳаёт нурига эга бўлади.

<sup>13</sup> Фарзийлар Исонинг бу гапига эътиroz билдирилар:

— Сиз Ўзингизга Ўзингиз гувоҳлик беряпсиз. Бу гувоҳлигиниз ҳаққоний эмас.

<sup>14</sup> Исо шундай жавоб берди:

— Мен Ўзимга Ўзим гувоҳлик берсам ҳам, гувоҳлигим ҳаққонийдир. Чунки Мен қаердан келиб, қаерга кетаётганимни биламан. Сизлар эса Менинг қаердан келиб, қаерга кетаётганимни билмайсизлар. <sup>15</sup> Сизлар инсоний ўлчов билан ҳукм қиласизлар. Мен эса ҳеч кимни ҳукм қилмайман. <sup>16</sup> Борди-ю, Мен ҳукм қилсан ҳам, ҳукмим ҳаққонийдир. Чунки Мен Ўзим эмас, балки Мени юборган осмондаги Отам билан бирга ҳукм қиласаман. <sup>17</sup> Ўзларингизнинг Тавротингизда: “Икки гувоҳнинг шаҳодати ҳаққонийдир”\*, деб ёзилган-ку. <sup>18</sup> Шундай экан, битта гувоҳ Менман, иккинчиси Мени юборган Отадир.

<sup>19</sup> Шунда улар Исадан:

— Отангиз қаерда? — деб сўрадилар. У бунга жавобан деди:

— Сизлар Мени ҳам, Отамни ҳам танимайсизлар. Агар Мени таниганингизда эди, Отамни ҳам таниган бўлар эдингизлар.

<sup>20</sup> Бу сўзларни Исо Маъбадда таълим беради, хайр-эҳсон қутисининг олдида

айтди. Ҳеч ким Уни қўлга олмади, чунки Унинг вақт–соати ҳали келмаган эди.

### **Исони рад қилганларнинг қисмати**

<sup>21</sup> Исо уларга яна деди:

— Мен кетяпман. Сизлар Мени қидирасизлар ва гуноҳкор бўлиб ўласизлар. Мен борадиган жойга сизлар бора олмайсизлар.

<sup>22</sup> — Наҳотки У Ўзини Ўзи ўлдирса? “Мен борадиган жойга сизлар бора олмайсизлар”, деб айтяпти–ку, — дейишди ўзаро яхудийлар. <sup>23</sup> Исо уларга шундай деди:

— Сизлар бу дунёдансизлар, Мен эса юқориданман. Сизлар бу оламга мансубсизлар, Мен эса бу оламдан эмасман. <sup>24</sup> Шунинг учун сизларга: “Гуноҳкор бўлиб ўласизлар”, деб айтдим. Ҳа, агар Ўша Мен эканлигимга ишонмасангизлар, гуноҳкор бўлиб ўласизлар.

<sup>25</sup> — Сиз кимсиз? — деб сўраши Исодан. Исо шундай деди:

— Кимлигимни сизларга бошидан айтиб келяпман–ку! <sup>26</sup> Сизларни айблаб айтадиган гапим жуда кўп. Лекин Мени Юборган ҳақдир, Мен Ундан нима эшитган бўлсан, ўшани дунёга маълум қиласман.

<sup>27</sup> Улар эса Исо самовий Отаси ҳақида гапираётганини тушунмадилар. <sup>28</sup> Исо сўзида давом этди:

— Инсон Ўғлини юқорига кўтарганингизда\*, Ўша Мен эканлигимни билиб оласизлар. Ўшанда Мен Ўзимча ҳеч нарса қилмаганимни, фақат Отам ўргатган нарсаларни айтганимни тушуниб оласизлар. <sup>29</sup> Мени Юборган доимо Мен билан биргадир. У Мени ёлғиз ташлаб кетмаган. Зоро, Мен ҳар доим Унга маъқул бўлган ишларни қиласман.

<sup>30</sup> Исонинг айтган гапларини эшитган кўп одамлар Унга имон келтирдилар.

### **Озод қиладиган ҳақиқат**

<sup>31</sup> Шу вақт Исо Унга ишонган яхудийларга деди:

— Агар Менинг сўзларимга риоя қилсангизлар, ҳақиқий шогирдларим бўласизлар. <sup>32</sup> Сизлар ҳақиқатни билиб оласизлар, ҳақиқат эса сизларни озод қиласди.

<sup>33</sup> Улар шундай деб жавоб беришди:

— Биз Иброҳим наслимиз. Ҳеч қачон ҳеч кимга қул бўлмаганмиз. Қандай қилиб Сиз, “Озод бўласизлар”, деб айтяпсиз?

<sup>34</sup> Исо деди:

— Сизларга чинини айтайн: гуноҳ қилувчи ҳар бир киши гуноҳнинг қулидир.

<sup>35</sup> Қул ҳеч қачон хонадон аъзоси бўла олмайди, ўғил эса абадулабад ўз хонадонининг аъзосидир. <sup>36</sup> Шундай экан, агар Ўғил сизларни озод қилса, ҳақиқатан озод бўласизлар. <sup>37</sup> Иброҳим насли эканлигинги биламан. Бироқ Менинг жонимга қасд қилмоқчисизлар. Чунки Менинг сўзим қалбингиздан жой топмаган. <sup>38</sup> Мен Отанинг ҳузурида нима кўрган бўлсан, ўшани сизларга айтяпман. Сизлар эса ўз отангиздан ўрганганингизни қиляпсизлар.

### **Иброҳим болалари ва иблис болалари**

<sup>39</sup> Улар Исога шундай жавоб бердилар:

— Бизнинг отамиз Иброҳимдир.

Исо шундай деди:

— Агар Иброҳимнинг фарзандлари бўлганингизда эди, Иброҳимнинг қилган ишларини қилган бўлар эдингизлар. <sup>40</sup> Мен сизларга Худодан эшитган ҳақиқатни сўзлаб бердим, холос. Шундай бўлса–да, сизлар Мени ўлдирмоқчисизлар. Иброҳим бундай иш қилмаган. <sup>41</sup> Сизлар Иброҳимнинг эмас, ўз отангизнинг

ишларини қиляпсизлар.

— Ие, биз зинодан туғилмаганмиз. Бизнинг биттаю битта Отамиз — Худонинг Ўзи-ку! — деб жавоб беришди Исога.<sup>42</sup> Исо уларга шундай деди:

— Агар Отангиз Худо бўлганда эди, Мени яхши кўрган бўлар эдингиз, чунки Мен Худодан келиб, энди шу ерда турибман. Мен Ўзимча келганим йўқ, Мени У юборди.<sup>43</sup> Нега айтганларимни англамаяпсизлар?! Бунга сабаб — сўзларимни ҳазм қила олмаганингиз.<sup>44</sup> Сизларнинг отангиз Худо эмас, иблисдир. Сизлар ўз отангизнинг нафсу эҳтиросларини бажо қилишни хоҳлайсизлар. Азалданоқ иблис қотил эди. У ҳеч қачон ҳақиқат тарафдори бўлмаган, чунки унда ҳақиқат йўқ. У ёлғон сўзлаганда, ўзига хос сўзлайди. Чунки у ёлғончи, ёлғоннинг отасидир.

<sup>45</sup> Аммо Мен ҳақиқатни гапирганим учун Менга ишонмаяпсизлар.<sup>46</sup> Қайси бирингиз Мени бирон гуноҳда айблай оласиз? Агарда ҳақиқатни гапираётган бўлсан, нега Менга ишонмаяпсизлар?<sup>47</sup> Ким Худога тегишли бўлса, Худонинг сўзларига қулоқ солади. Сизлар эса Худога бегона бўлганингиз учун қулоқ солмаяпсизлар.

### Исо азалдан мавжуд

<sup>48</sup> Бунга жавобан яхудийлар шундай дедилар:

— Сиз Самарияликсиз-ку\*, Сизни жин урибди, деб тўғри айтган эканмиз!

<sup>49</sup> Исо деди:

— Мени жин ургани йўқ. Мен осмондаги Отамни ҳурмат қиласман. Сизлар эса Мени беобрў қиляпсизлар.<sup>50</sup> Мен Ўзимга обрў орттироқчи эмасман. Лекин обрўйимни кўтарадиган бор, Унинг Ўзи ҳукм қилади.<sup>51</sup> Сизларга чинини айтайн: ким Менинг сўзимга риоя қилса, ҳеч қачон ўлим кўрмайди.

<sup>52</sup> Шунда яхудийлар дедилар:

— Сизни жин урганини энди аниқ билиб олдик! Иброҳим ўлди, пайғамбарлар ҳам ўлиб кетишган. Сиз эса: “Ким Менинг сўзимга риоя қилса, ҳеч қачон ўлмайди”, деяпсиз-а?!<sup>53</sup> Наҳотки Сиз вафот этган отамиз Иброҳимдан ҳам устун бўлсангиз?! Пайғамбарлар ҳам ўлиб кетишган-ку! Сиз Ўзингизни ким деб ҳисоблайсиз ўзи?!

<sup>54</sup> Исо шундай жавоб берди:

— Агар Мен Ўзимни Ўзим мақтасам, мақтовларим бехудадир. Отамнинг Ўзи Мени мақтайди. Сизлар Уни Худойимиз деб атайсизлар,<sup>55</sup> аслида эса Уни танимайсизлар. Мен эса Уни биламан. Агар, Уни билмайман, десам, сизларга ўшаган ёлғончи бўламан. Мен Уни биламан ва Унинг сўзига риоя қиласман.

<sup>56</sup> Отангиз Иброҳим келган кунимни кутиб, хурсанд бўлган эди. Ўша кунни кўриб, қаттиқ қувонди.

<sup>57</sup> — Сиз ҳали эллик ёшга тўлмаган бўлсангиз, қандай қилиб Иброҳимни кўргансиз?! — дейишидя яхудийлар Унга.<sup>58</sup> Исо уларга шундай жавоб берди:

— Сизларга чинини айтайн: Иброҳим туғилмасдан олдин Мен бор бўлганман\*.

<sup>59</sup> Шунда Исони тошбўрон қилмоқчи бўлдилар. Исо эса яширинча Маъбаддан чиқиб кетди\*.

## 9-БОБ

### Исо тугма кўрга шифо беради

<sup>1</sup> Исо йўлда кетаётиб, бир тугма кўр одамни кўриб қолди. <sup>2</sup> Шогирдлари Исодан сўрадилар:

— Устоз, кимнинг гуноҳи унинг кўр бўлиб туғилишига сабабчи бўлди? Ўзиникими ёки ота-онасиникими?

<sup>3</sup> Исо шундай жавоб берди:

— Бу одамнинг гуноҳи ҳам, ота-онасининг гуноҳи ҳам бунга сабаб бўлмаган. Худонинг ишлари унда намоён бўлиши учун у кўр туғилган.<sup>4</sup> Кун ёруғ экан, Мени Юборганинг ишларини қилишимиз лозим. Ана тун келяпти, ўшанда ҳеч ким иш қила олмайди.<sup>5</sup> Мен оламда бор эканман, оламнинг нуридирман.

<sup>6</sup> Исо буларни айтди-ю, ерга тупурди, тупукдан лой қилиб, кўрнинг кўзларига суртди.<sup>7</sup> Сўнг унга:

— Бориб, Силоам ҳовузида ювингин, — деди. (Силоам “юборилган” демакдир.)

Кўр одам бориб ювинди ва кўра оладиган бўлиб қайтди.<sup>8</sup> Шунда унинг қўшнилари ва илгари унинг садақа сўраганини кўрган одамлар:

— Бу ҳалиги тиланчилик қилиб ўтирган одам эмасми? — деб сўрашарди.

<sup>9</sup> Баъзилар:

— Бу худди ўша, — десалар, бошқалар:

— Йўқ, ўшанга ўхшайди, холос, — дейишарди. Одамнинг ўзи эса:

— Ўша менман, — деб таъкидларди.

<sup>10</sup> — Ундай бўлса, кўзларинг қандай очилди? — деб сўрадилар.

<sup>11</sup> — Исо деган киши лой қилиб, кўзларимга суртди-ю, “Бориб, Силоам ҳовузида ювингин”, деди. Мен бориб ювиндим ва кўрадиган бўлиб қолдим, — деди шифо топган кўр.

<sup>12</sup> — Ўша Одам қани? — деб сўрадилар.

— Билмайман, — деб жавоб берди у.

### Фарзийлар соғайган кўрни сўроқ қилишади

<sup>13</sup> Илгари кўр бўлган ўша одамни фарзийларнинг олдига келтиришди.

<sup>14-15</sup> Фарзийлар ҳам бу одамдан кўзлари қандай очилганини сўрадилар.

— У кўзларимга лой суртди. Мен ювиндим-у, кўзларим кўрадиган бўлди, — деди ҳалиги одам.

Исо лой қилиб, кўрнинг кўзларини очган кун Шаббат куни эди. Шунинг учун <sup>16</sup> фарзийлардан баъзилари:

— Кўзларингни очган Одам Худодан эмас, чунки У Шаббат кунига риоя қилмаяпти\*, — дедилар. Бошқалари эса:

— Гуноҳкор одам бундай мўъжизали аломатларни қандай қила олади? — дейишиди. Шундай қилиб, ораларида келишмовчилик пайдо бўлди.

<sup>17</sup> Шунда фарзийлар кўр одамдан яна сўрадилар:

— У Киши ҳақида сен нима дейсан? У сенинг кўзларингни очди-ку!

— У пайғамбар, — деб жавоб берди кўр.

<sup>18</sup> Бироқ яхудийлар кўзлари очилган одамнинг ота-онасини чақиртиргунча, унинг илгари кўр бўлганига ва кўзлари очилганига ишонмадилар.<sup>19</sup> Улар кўрнинг ота-онасига шундай савол бердилар:

— Кўр туғилган, деб айтган ўғлингиз шуми? Хўш, энди қандай қилиб унинг кўзлари кўрятпи?

<sup>20</sup> Ота-онаси жавоб беришиди:

— Бу бизнинг ўғлимиз эканлигини биламиз. Унинг кўр туғилганини ҳам биламиз.<sup>21</sup> Лекин қандай қилиб кўзлари кўраётганини ва кўзларини ким очганини биз билмаймиз. У балоғатга етган, ўзидан сўранглар. Ўзи учун ўзи жавоб берсин.

<sup>22</sup> Кўрнинг ота-онаси яхудийлардан қўрқанлари учун шундай дедилар. Дин арбоблари бундан аввал, ким Исонинг Масиҳлигини тан олса, синагогадан четлаштирилсин, деб қарор қилган эдилар.<sup>23</sup> Ана шу сабабдан кўрнинг ота-онаси: “У балоғатга етган, ўзидан сўранглар”, деб айтишганди.

<sup>24</sup> Шундай қилиб, илгари кўр бўлган одамни иккинчи марта чақириб, дейиши: — Ростини айтаман, деб Худонинг номи билан қасам ич! Биз у Одамнинг гуноҳкорлигини биламиз.

<sup>25</sup> Кўр шундай жавоб берди:

— У гуноҳкорми, йўқми, мен билмайман. Шуни биламанки, мен кўр эдим, энди эса кўзларим кўряпти.

<sup>26</sup> — У сенга нима қилди? Кўзларингни қандай очди? — деб ундан сўрадилар.

<sup>27</sup> — Сизларга айтиб бердим-ку, аммо сизлар қулоқ солмадингизлар! Нега буни яна эшитмоқчисизлар?! Наҳотки сизлар ҳам Унинг шогирдлари бўлмоқчисизлар?! — деди у одам. <sup>28</sup> Яхудийлар эса уни ҳақоратлаб, дейиши:

— Сен ўзинг Унинг шогирдисан! Биз эса Мусонинг шогирдларимиз! <sup>29</sup> Мусога Худо гапирганини биламиз. Бу Киши-чи, Унинг қаерданлигини ҳам билмаймиз.

<sup>30</sup> Кўзи очилган одам шундай жавоб берди:

— Ана шуниси жуда ажабланарли-да! Сизлар Унинг қаерданлигини билмайсизлар, У эса кўзларимни очди! <sup>31</sup> Гуноҳкорларга Худо қулоқ солмаслигини биламиз. Унинг иродасига амал қилган тақводорларга эса Худо қулоқ солади.

<sup>32</sup> Туғма кўрнинг кўзларини бирор киши очгани ҳаётда эшитилмаган гап. <sup>33</sup> Агар у Киши Худодан бўлмаганда эди, ҳеч нарса қилолмасди.

<sup>34</sup> Яхудийлар бунга жавобан:

— Сен бутунлай гуноҳ ичида туғилгансан, энди бизга ақл ўргатяпсанми?! — дейишиди-да, уни синагогадан ҳайдаб чиқаришди.

### Қалби кўрлар

<sup>35</sup> Ўша одамнинг ҳайдаб чиқарилганлигини Исо эшитди-ю, уни қидириб топди.

— Сен Инсон Ўғлига\* ишонасанми? — деб сўради ундан.

<sup>36</sup> У одам эса Исога деди:

— Ҳазрат, У кимдирки, мен Унга ишонсам?

<sup>37</sup> — Уни кўриб турибсан, У билан гаплашиб турибсан, — деди Исо. <sup>38</sup> Шунда у одам:

— Ишонаман, ё Раббий, — деди-да, Исога сажда қилди.

<sup>39</sup> Исо:

— Кўрлар кўрсин, кўзи очиқлар эса кўр бўлсин деб, Мен бу дунёни ҳукм қилгани келганман, — деди.

<sup>40</sup> Унинг атрофида баъзи фарзийлар турган эди. Улар бу гапни эшитгач:

— Наҳотки бизлар ҳам кўр бўлсак? — деб сўраши. <sup>41</sup> Исо уларга деди:

— Агар кўр бўлганингизда, гуноҳда айбланмас эдингиз. Лекин сизлар “Кўзларимиз кўряпти” деганингиз учун гуноҳингиз ўз бўйнингизда қолади.

## 10-БОБ

### Исо — яхши чўпон

<sup>1</sup> Исо деди: “Сизларга чинини айтайн: ким қўй қўрасига эшиқдан кирмай, бошқа йўлдан ошиб тушса, у ўғри ва босқинчидир. <sup>2</sup> Эшиқдан кирган одам эса қўйларнинг чўпонидир. <sup>3</sup> Қоровул унга эшикни очиб беради. Қўйлар унинг овозига қулоқ солади. У эса ўз қўйларини номма-ном чақириб, ташқарига олиб чиқади. <sup>4</sup> У ўз қўйларини қўрадан олиб чиққанда, уларнинг олдида бораверади. Қўйлар эса унга эргашади, чунки улар чўпоннинг овозини биладилар. <sup>5</sup> Бегона кишига эса эргашмайдилар. Аксинча, бегонанинг овозини танимай, ундан қочадилар.”

<sup>6</sup> Исо бу матални айтиб берганда, тингловчилар У нима демоқчи эканлигини түшүнмадилар. <sup>7</sup> Шу сабабдан Исо яна деди: “Сизларга чинини айтай: Мен қўйлар учун эшикман. <sup>8</sup> Мендан олдин келганларнинг ҳаммаси ўғри ва босқинчи эдилар. Лекин қўйлар уларга қулоқ солмадилар. <sup>9</sup> Мен эшикман. Ким Мен орқали кирса, нажот топади. У кириб чиқиб, яйлов ҳам топади. <sup>10</sup> Ўғри фақат ўғирлаш, бўғизлаш, барбод қилиш учун келади. Мен эса уларга ҳаёт, фаровон ҳаёт бериш учун келганман.

<sup>11</sup> Мен яхши чўпонман. Яхши чўпон қўйлари учун жонини фидо қиласди.

<sup>12</sup> Ёлланган одам эса қўйларнинг на чўпони, на эгасидир. У бўрининг келганини кўргач, қўйларни ташлаб қочади. Бўри эса қўйларни талаб, тумтарақай қиласди.

<sup>13</sup> Ёлланган одам шунчаки ёлланган бўлгани учун ва қўйлар ҳақида қайғурмагани учун қочади.

<sup>14-15</sup> Мен яхши чўпонман. Осмондаги Отам Мени ва Мен Отамни билганимдай, Мен қўйларимни биламан, улар ҳам Мени биладилар. Мен қўйларим учун жонимни фидо қиласман. <sup>16</sup> Бу қўрада бўлмаган бошқа қўйларим ҳам бор. Уларни ҳам олиб келишим керак. Улар ҳам Менинг овозимга қулоқ солади, шунда бир сурув, бир чўпон бўлади. <sup>17</sup> Мен жонимни қайтиб олиш учун уни фидо қиласман, шу боис Отам Мени яхши кўради. <sup>18</sup> Ҳеч ким жонимни Мендан тортиб ололмайди. Мен Ўз ихтиёрим билан уни фидо қиласман. Жонимни беришга ва уни қайтариб олишга ҳокимиятим бор. Буни Менга Отам буюрган.”

<sup>19</sup> Исонинг бу сўзлари туфайли, яхудийлар орасида яна келишмовчилик келиб чиқди. <sup>20</sup> Ораларидан кўпчилик:

— Уни жин урибди, У ақлдан озган! Нега Унга қулоқ соляпсизлар? — дер эдилар. <sup>21</sup> Бошқалари эса:

— Бу жин урганнинг сўзлари эмас. Жин кўр одамнинг қўзларини оча олармиди?! — деб айтишарди.

### Исони рад қилишади

<sup>22</sup> Ўша вақтда Қуддусда Маъбадни бағишлиш байрами\* нишонланаётган эди. Қиши фасли эди. <sup>23</sup> Исо Маъбадда Сулаймон айвони\* деган жойда айланиб юрар эди. <sup>24</sup> Яхудийлар Унинг атрофини ўраб олдилар.

— Қачонгача бизни иккилантирасиз? Агар Масих бўлсангиз, бизга очиғини айтинг, — дейишди.

<sup>25</sup> Исо уларга жавоб берди:

— Мен сизларга айтдим, аммо сизлар ишонмаяпсизлар. Осмондаги Отам номидан қилаётган ишларим кимлигимни кўрсатиб турибди. <sup>26</sup> Сизлар эса ишонмаяпсизлар, чунки сизлар Менинг қўйларимдан эмассизлар. <sup>27</sup> Менинг қўйларим овозимга қулоқ солади. Мен уларни танийман, улар эса Менга эргашиб юришади. <sup>28</sup> Мен уларга абадий ҳаёт бераман, улар ҳеч қачон ҳалок бўлмайдилар. Ҳеч ким уларни Менинг қўлимдан тортиб ололмайди. <sup>29</sup> Уларни Менга берган Отам ҳаммадан буюқdir. Отамнинг қўлидан уларни тортиб олишга ҳеч кимнинг кучи етмайди. <sup>30</sup> Мен ва Отам бирмиз.

<sup>31</sup> Яхудийлар яна Исони тошбўрон қилмоқчи бўлдилар.

<sup>32</sup> — Мен сизларга Ота буюрган кўп хайрли ишларни кўрсатдим, уларнинг қайси бири учун Мени тошбўрон қилмоқчисизлар? — деб сўради Исо.

<sup>33</sup> Яхудийлар Унга шундай дейишди:

— Хайрли ишингиз учун эмас, куфлигингиз учун Сизни тошбўрон қилмоқчимиз. Сиз одам бўла туриб Ўзингизни Худо деяпсиз!

<sup>34</sup> Исо шундай жавоб қайтарди:

— Сизлар ўзларингиз доим ўқийдиган Муқаддас битикларда\*: “Айтдимки,

ҳаммангиз худоларсиз”\*, деб ёзилган эмасми?!<sup>35</sup> Ўзларингиз биласизлар: Муқаддас битикларни ўзгартириб бўлмайди. Худонинг каломини олган одамлар “худолар” деб аталган-ку!<sup>36</sup> Мени эса Отам Ўзи учун ажратиб олиб, дунёга юборган. Мен “Худонинг Ўғлимани” деганим учун куфрик қилган бўламанми?!<sup>37</sup> Агар Мен Отамнинг ишларини қилмаётган бўлсан, Менга ишонмай қўя қолинглар.<sup>38</sup> Борди-ю, Унинг ишларини қилаётган бўлсан, Менга ишонмасангиз ҳам, қилаётган ишларимга ишонинглар. Шунда Ота Менда ва Мен Отада эканимни билиб, англаб оласизлар.

<sup>39</sup> Улар яна Исони ушлаб олишга ҳаракат қилдилар, аммо Исо уларнинг чангалидан қутулиб қолди.

<sup>40</sup> Сўнг Исо Иордан дарёсининг шарқ томонига, илгари Яхё одамларни чўмдириб юрган жойга қайтиб бориб, у ерда қолди.<sup>41</sup> Унинг олдига қўп одамлар келишарди. Улар шундай деб айтишарди: “Яхё ҳеч қандай мўъжизали аломат кўрсатмаган эди, лекин Яхёнинг бу Одам ҳақида айтган ҳамма гапи тўғри чиқди.”<sup>42</sup> Шундай қилиб, ўша ердаги қўп одамлар Исога ишондилар.

## 11-БОБ

### Лазарнинг ўлими

<sup>1</sup> Байтания қишлоғида\* Лазар исмли бир одам касал бўлиб ётган эди. Марям ва унинг опаси Марта ҳам шу қишлоқда яшар эдилар.<sup>2</sup> Кейинчалик Раббимиз Исога атири мой суртган ва Унинг оёқларини сочи билан артиб қуритган ўша Марям эди\*. Касал ётган Лазар эса Маряннинг акаси эди.

<sup>3</sup> Опа-сингил Исога:

— Ҳазрат, Сизнинг азиз дўстингиз касал, — деган хабар юборишиди.<sup>4</sup> Исо буни эшитиб, шундай деди:

— Бу касаллик ўлим билан яқунланмайди, балки Худонинг улуғланишига ва шу орқали Худо Ўғлининг\* улуғланишига сабаб бўлади.

<sup>5</sup> Исо Мартани, унинг синглисини ва Лазарни яхши кўрар эди.<sup>6</sup> Аммо Лазарнинг хаста эканини билса ҳам, турган жойида яна икки кун қолди.<sup>7</sup> Шундан сўнг У шогирдларига:

— Яхудияга қайтиб борайлик, — деди.

<sup>8</sup> Шогирдлари эса шундай дедилар:

— Устоз, яқиндагина яхудийлар Сизни тошбўрон қилмоқчи эдилар-ку! Энди яна у ерга бормоқчимисиз?

<sup>9</sup> Исо жавоб берди:

— Кундуз ўн икки соатдан иборат эмасми?! Ким кундузи юрса, қоқилмайди, чунки бу дунёнинг нурини кўради.<sup>10</sup> Кечаси юрган эса қоқилади, чунки унинг ўзида нур йўқ.

<sup>11</sup> Бу сўзларини айтиб бўлиб, уларга яна деди:

— Дўстимиз Лазар ухлаб қолди. Мен уни уйғотгани кетяпман.

<sup>12</sup> — Ҳазрат, агар ухлаётган бўлса, тузалиб кетади, — деди шогирдлари.

<sup>13</sup> Исо Лазарнинг ўлимини назарда тутган эди. Шогирдлар эса Исо одатдаги уйқу тўғрисида гапирди, деб ўйладилар.<sup>14</sup> Кейин Исо уларга очиғини айтди:

— Лазар вафот этди.<sup>15</sup> Мен унинг ёнида бўлмаганимдан хурсандман, чунки бу вазият сизларнинг ишонишинингизга имкон беради. Қани, энди унинг олдига борайлик.

<sup>16</sup> Шунда Тўма, яъни Дишимус\* бошқа шогирдларга:

— Қани, юринглар, биз ҳам Исо билан ўламиз! — деди.

### Исо — тириклик манбай

<sup>17</sup> Исо у ерга етиб бориб билдики, Лазарнинг қабрга қўйилганига тўрт кун бўлган экан. <sup>18</sup> Байтания қишлоғи Қуддусдан бор-йўғи уч чақиримча\* масофада жойлашган эди. <sup>19</sup> Қуддусдаги кўп яхудийлар Марта билан Марямнинг олдига акасининг вафоти муносабати ила тасалли бериш учун борган эдилар. <sup>20</sup> Марта Исонинг келаётганини эшитиб, Уни кутиб олгани чиқди. Марям эса уйда қолди.

<sup>21</sup> — Ҳазрат! — деди Марта Исога. — Агар Сиз бу ерда бўлганингизда эди, акам ўлмаган бўларди. <sup>22</sup> Аммо ҳозир ҳам биламан, Сиз Худодан нима сўрасангиз, Худо Сизга беради.

<sup>23</sup> — Сенинг аканг тирилади, — деди Исо.

<sup>24</sup> — Биламан, охиратда ўликлар тирилганда тирилади, — деди Марта. <sup>25</sup> Исо унга деди:

— Мен тирилиш ва ҳаётдирман. Менга ишонган одам ўлса ҳам яшайди.

<sup>26</sup> Кимда-ким Менга ишониб яшаса, то абад ўлмайди. Бунга ишонасанми?

<sup>27</sup> — Ҳа, Ҳазрат, — деди Марта, — Сиз дунёга келадиган Масих, Худонинг Ўғли эканингизга ишонаман.

<sup>28</sup> Марта шундай деди-ю, бориб синглиси Марямни чақирди. Унга секингина деди:

— Устоз шу ерда, У сени чақиряпти.

<sup>29</sup> Марям буни эшитгач, шошиб ўрнидан турди-да, Исонинг олдига кетди.

<sup>30</sup> Исо ҳали қишлоққа кирмаган, ҳануз Марта Уни кутиб олган жойда эди. <sup>31</sup> Марям билан уйда бўлган ва унга тасалли бераётган одамлар унинг шошилиб ўрнидан туриб ташқарига чиққанини кўришди. Марям йиғи-сиғи қилгани қабрга кетяпти, деб ўйлаб, унинг орқасидан кетишиди.

<sup>32</sup> Марям Исо турган ерга етиб келиб, Уни кўрди-ю, оёғига йиқилиб деди:

— Ҳазрат! Агар Сиз шу ерда бўлганингизда эди, менинг акам ўлмаган бўларди!

<sup>33</sup> Марям ҳам, у билан келганлар ҳам йиғлаётган эдилар. Исо буни кўриб, қаттиқ изтиробга тушди, кўнгли ўртаниб кетди.

<sup>34</sup> — Уни қаерга қўйдингизлар? — деб сўради.

— Юринг, Ҳазрат, кўрасиз! — дедилар.

<sup>35</sup> Исонинг кўзларидан дув-дув ёш оқди. <sup>36</sup> Ўша ердаги одамлар:

— Қаранглар, уни қанчалик яхши кўрар экан! — дейишди. <sup>37</sup> Улардан баъзилари эса шундай дейишди:

— У кўрнинг кўзларини очган. Лазарни ҳам ўлимдан олиб қолса бўлмасми?!?

### Исо Лазарни тирилтиради

<sup>38</sup> Исо тағин қаттиқ изтироб чекиб, қабр олдига келди. Қабр бир ғор бўлиб, оғзи тош билан ёпилган эди. <sup>39</sup> Исо:

— Тошни олиб ташланглар! — деди. Мархумнинг синглиси Марта Унга деди:

— Ҳазрат, жасад ҳидланиб қолган-ку! Ахир, қабрга қўйилганига тўрт кун бўлди!

<sup>40</sup> — Агар ишонсанг, Худонинг улуғворлигини кўрасан, деб сенга айтмаганимидим?! — деди Исо.

<sup>41</sup> Тошни олиб ташладилар. Исо эса осмонга кўз тикиб, деди:

— Эй Ота! Мени эшитганинг учун Сенга шукурлар айтаман. <sup>42</sup> Сен Мени доимо эшитишингни биламан. Лекин бу сўзларни шу ерда турган халқ учун айтипман, токи Мени Сен юборганингга улар ишонсин.

<sup>43</sup> Шундай деди-ю, баланд овоз билан хитоб қилди:

— Лазар, ташқарига чиқ!

<sup>44</sup> Шу пайт қўлу оёқлари кафанланган, юзи рўмол билан ўралган марҳум чиқиб

келди.

— Кафанини ечинглар, уни қўйиб юборинглар, — деди Исо одамларга.

### **Исони ўлдириш режаси**

<sup>45</sup> Марямни йўқлагани келган одамларнинг кўпчилиги Исонинг қилган ишини кўриб, Унга ишониши. <sup>46</sup> Аммо баъзилари фарзийларнинг олдига бориб, Исонинг қилганларини айтиб бериши.

<sup>47</sup> Шундан кейин бош руҳонийлар ва фарзийлар Олий кенгаш\* чақириб, дейишиди:

— Нима қиласиз? Бу Одам жуда кўп мўъжизали аломатлар кўрсатиб юриби-ку! <sup>48</sup> Буни давом этишига йўл қўйсак, ҳамма Унга ишониб кетади. Римликлар келиб, Маъбадимизни ҳам, халқимизни ҳам хонавайрон қиласидилар.

<sup>49</sup> Улардан бири, ўша йили олий руҳоний бўлган Каяфас\* сўз олди:

— Сизлар ҳеч нарсани билмайсизлар! <sup>50</sup> Бутун халқ ҳалок бўлгандан кўра, битта одамнинг халқ учун ўлиши ўзингиз учун яхшироқ-ку! Наҳотки буни тушунмасангизлар?!

<sup>51</sup> Бу сўзларни у ўзидан-ўзи айтмаган эди. Балки ўша йили олий руҳоний сифатида Исонинг халқ учун ўлишини башорат қилган эди. <sup>52</sup> Исо нафақат яхудий халқи учун, балки Худонинг тарқоқ бўлган ҳамма фарзандларини\* бирлаштириш учун ўлиши керак эди.

<sup>53</sup> Шундай қилиб, ўша кундан бошлаб, Исони ўлдиришга тил бириктиридилар.

<sup>54</sup> Исо эса энди яхудийлар орасида очиқчасига юрмайдиган бўлди. У чўл яқинидаги Эфрайим шаҳрига\* бориб, Ўз шогирдлари билан ўша ерда қолди.

<sup>55</sup> Яхудийларнинг Фисих байрами яқинлашаётган эди. Мамлакатнинг ҳамма томонидан одамлар байрамдан олдин покланиш учун Куддусга бориши. <sup>56</sup> Шу вақтда Исони изладилар. Маъбадда йиғилиб турганлар ўзаро: “Нима деб ўйлайсизлар? У байрамга келадими?” деб сўрашди. <sup>57</sup> Бош руҳонийлар ва фарзийлар эса Исони қўлга олмоқчи бўлиб, шундай буйруқ берган эдилар: “Ким Исонинг қаердалигини билиб қолса, хабар қиласин.”

## **12-БОБ**

### **Марям Исога атири мой суртади**

<sup>1</sup> Фисих байрамидан олти кун олдин Исо Лазарнинг қишлоғи Байтанияга\* борди. Исо ўша Лазарни ўлиқдан тирилтирган эди. <sup>2</sup> Ўша ерда Исога зиёфат ҳозирладилар. Марта хизмат қилиб юрган эди, Лазар эса Исо ва меҳмонлар билан бирга дастурхон олдида ёнбошлигаран эди. <sup>3</sup> Шу пайт Марям бир шиша\* тоза, қимматбаҳо сунбул мойини\* олиб келиб, Исонинг оёқларига суртди, сўнг соchlари билан артди. Уй атири мойнинг хушбўй ҳидига тўлиб кетди.

<sup>4</sup> Исонинг шогирдларидан бири, Унга хиёнат қиласидиган Яхудо Ишқариёт деди:

<sup>5</sup> — Бу мойни уч юз кумуш тангага\* сотиб, камбағалларга бўлиб берса бўлмасмиди?!

<sup>6</sup> У шу гапни камбағалларга қайғургани учун эмас, балки ўғри бўлгани учун айтди. Пул қутиси Яхудонинг назоратида эди, қутига солинадиган пулдан у ўғирлаб туради. <sup>7</sup> Исо шундай деди:

— Марямни тинч қўйинглар! Зотан, у Мени дағн кунимга тайёрлади\*.

<sup>8</sup> Камбағаллар ҳар доим сизлар билан бирга бўлади. Мен эса ҳар доим ҳам сизлар билан бирга бўлмайман.

<sup>9</sup> Бир талай яхудийлар Исонинг Байтанияда эканлигини билиб келишиди. Улар нафақат Исони, балки Исо ўлиқдан тирилтирган Лазарни ҳам кўришни

истардилар.<sup>10</sup> Бош руҳонийлар Лазарни ҳам ўлдиришни режалаштирган эдилар.

<sup>11</sup> Чунки кўп яхудийлар Лазар туфайли Исо томонига ўтиб, Унга имон келтираётган эдилар.

### Исо Қуддусга тантанали равища киради

<sup>12</sup> Эртаси куни байрамга борган бир талай халойиқ Исонинг Қуддусга келаётганини эшишиб қолди.<sup>13</sup> Улар пальма дарахти шохларидан\* олишди, Уни қарши олгани чиқиб, шундай деб ҳайқиришарди:

“Тасанно!  
Эгамиз номидан келаётган Инсон барака топсин!\*  
Исройлнинг шоҳи муборак бўлсин!”

<sup>14</sup> Исо бир хўтикни топиб, унга минди, худди Муқаддас битикларда ёзилгандай:

“Эй Қуддус ҳалқи\*, қўрқма!  
Мана, Шоҳингиз хўтикни миниб келяпти.”\*

<sup>15</sup> Исонинг шогирдлари аввал буни тушунмадилар. Исо улуғлангандан кейингина улар бу сўзларнинг У ҳақда ёзилганини ва ҳалқ худди ёзилганидек қилганини эсладилар.<sup>17</sup> Исо Лазарни қабрдан чақириб тирилтирганига гувоҳ бўлган оломон Исога эргашиб, бу ҳақда ҳаммага айтарди.<sup>18</sup> Исонинг қилган бу мўъжизали аломати ҳақида эшиктган кўп одамлар Уни кутиб олгани чиққан эдилар.

<sup>19</sup> Фарзийлар эса бир-бирига:  
— Қаранглар, қўлимиздан ҳеч нарса келмади. Бутун дунё Унинг ортидан бормоқда! — дейишарди.

### Исо Ўз ўлими ҳақида гапиради

<sup>20</sup> Худога сажда қилиш учун байрамга келганлар орасида бъязи ғайрияхудийлар\* бор эди.<sup>21</sup> Улар Филиппнинг олдига бориб (Филип Жалиланинг Байтсайда шахридан эди) шундай деб айтишди:

— Тақсир, биз Исони қўрмоқчимиз.

<sup>22</sup> Филип бориб, бу ҳақда Эндрусга айтди. Сўнг иккалови Исонинг олдига бориб, Унга айтишди.<sup>23</sup> Исо уларга шундай жавоб берди:

— Инсон Ўғли улуғланадиган вақт-соати келди.<sup>24</sup> Сизларга чинини айтайин: агар буғдойнинг дони ерга тушиб ўлмаса, у бир донлигича қолади. Агарда ўлса, кўп ҳосил беради.<sup>25</sup> Ким ўз жонини севса, уни йўқотади. Ким бу дунёда ўз жонидан воз кечса, уни абадий ҳаёт учун сақлаб қолади.<sup>26</sup> Ким Менга хизмат қилмоқчи бўлса, орқамдан юрсин. Мен қаерда бўлсан, хизматчим ҳам ўша ерда бўлсин. Менга хизмат қилган одамни осмондаги Отам ҳурмат қиласи.<sup>27</sup> Энди эса юрагим сиқилиб кетяпти. Нима ҳам дер эдим?! “Эй Ота, бу вақт-соатдан Мени сақла”, деб айта олармидим?! Мен шу вақт-соат учун келганман-ку!<sup>28</sup> Эй Ота, Ўз номингни улуғлагин!

Исо шундай дейиши биланоқ осмондан:

— Мен номимни улуғладим, бундан кейин ҳам улуғлайман, — деган садо келди.<sup>29</sup> У ерда турган оломон бу садони эшишиб, момақалдироқ деб ўйлади. Бошқалар эса:

— Унга фаришта гапиреди! — дейишди.

<sup>30</sup> Бунга жавобан Исо деди:

— Бу садо Мен учун эмас, сизлар учун бўлди. <sup>31</sup> Энди бу дунё ҳукм қилинади, бу дунёнинг ёвуз ҳукмдори\* ҳайдаб чиқарилади. <sup>32</sup> Мен ердан юқорига кўтарилиганимда, ҳаммани Ўзимга жалб қиласман.

<sup>33</sup> Исо бу сўзларни қай йўл билан ўлишини билдириш учун айтди.

<sup>34</sup> Халқ бунга жавобан деди:

— Биз Тавротдан, Масих абадий яшайди, деб эшиганимиз. Қандай қилиб Сен, Инсон Ўғли юқорига кўтарилиши керак, деб айтапсан? Инсон Ўғли ким ўзи?

<sup>35</sup> Исо уларга деди:

— Нур яна қисқа бир муддат сизлар билан бўлади. Нур борида юринглар, тағин зулмат сизларни қамраб олмасин. Зулматда юрадиган киши қаерга кетаётганини билмайди. <sup>36</sup> Нур ҳануз сизлар билан экан, нурга ишонинглар, шунда нур фарзандлари бўласизлар.

Буларни айтиб бўлгач, Исо узоқлашиб, халқдан яширинди.

### Халқнинг ўжарлиги ва имонсизлиги

<sup>37</sup> Исо халқнинг кўз ўнгидаги шунчага кўп мўъжизали аломатлар яратган бўлса ҳам, улар Исога ишонмас эдилар. <sup>38</sup> Шу тариқа Ишаё пайғамбарнинг сўзи бажо бўлди:

“Эй Эгамиз, бизнинг хабаримизга ким ишонди?  
Сенинг қудратли кучинг кимга аён бўлди?”\*

<sup>39</sup> Ҳақиқатан ҳам, улар ишона олмадилар. Негаки, Ишаё улар ҳақида яна шундай деб айтганди:

<sup>40</sup> “Эгамиз уларнинг кўзларини кўр қилди,  
Ақлларини ўтмас қилди.  
Токи кўзлари билан кўрмасинлар,  
Ақллари билан англамасинлар,  
Тағин Менга қайтиб, шифо топмасинлар.”\*

<sup>41</sup> Ишаё Масихнинг улуғворлигини кўргани учун бу сўзларни айтган эди.

<sup>42</sup> Шунга қарамай, кўп яхудий йўлбошчилари ҳам Исога имон келтирдилар. Лекин улар фарзийлар туфайли буни очиқчасига тан олмас эдилар, чунки синагогадан ҳайдалишдан қўрқардилар. <sup>43</sup> Ахир, улар Худонинг мақтовидан кўра, инсоннинг мақтовини яхши кўрардилар.

<sup>44</sup> Исо хитоб қилиб деди:

— Менга ишонган одам Менга эмас, балки Мени Юборганга ишонган бўлади.

<sup>45</sup> Мени кўрган одам Мени Юборганни кўрган бўлади. <sup>46</sup> Менга ишонган биронта одам зулматда қолмасин деб, Мен дунёга нур бўлиб келдим. <sup>47</sup> Агар ким Менинг сўзларимни эшитиб, риоя қилмаса\*, Мен уни ҳукм қилмайман. Мен дунёни ҳукм қилиш учун эмас, нажот бериш учун келганман. <sup>48</sup> Мени рад қилиб, сўзларимни қабул қилмаган одамни ҳукм қилувчи бор. Ундей одамни охиратда Мен эмас, айтган сўзим ҳукм қиласми. <sup>49</sup> Зотан, Мен Ўзимча гапирганим йўқ. Мени юборган самовий Ота нима айтишимни, қандай гапиришимни Менга амр этган. <sup>50</sup> Унинг амри эса абадий ҳаёт беришини биламан. Хуллас, нима айтиётган бўлсам, Отам Менга айтгандай сизларга айтяпман.

## 13-БОБ

### **Исо Ўз шогирдларининг оёқларини ювади**

<sup>1</sup> Фисих байрамига оз қолган эди. Исо бу дунёни тарк этиб, осмондаги Отаси олдига борадиган вақт-соати келганини билар эди. У дунёдаги Ўзиникиларни яхши кўрар эди, уларни охиригача яхши кўрди.

<sup>2</sup> Кечки овқат пайти эди. Шимўн ўғли Яхудо Ишқариётнинг дилига иблис аллақачон Исога хиёнат қилиш ниятини соглан эди. <sup>3</sup> Исо эса Отаси ҳамма нарсани Унинг қўлига берганини билар эди, У Худодан келиб, яна Худонинг олдига қайтаётганини ҳам билар эди.

<sup>4</sup> Шундай қилиб, Исо дастурхондан туриб, устки кийимини ечиб ташлади. Сочиқни олиб белига боғлади. <sup>5</sup> Кейин тогорага сув қуиб, шогирдларининг оёқларини ювишга тушди. Белига боғлаган сочиқ билан уларнинг оёқларини артиб қурилди.

<sup>6</sup> Исо Бутруснинг\* олдига келди.

— Ҳазрат, наҳот оёқларимни Сиз ювсангиз?! — деди Бутрус.

<sup>7</sup> — Ҳозир нима қилаётганимни сен билмайсан, кейин тушуниб оласан, — деди Исо унга жавобан.

<sup>8</sup> — Менинг оёқларимни икки дунёда ҳам ювмайсиз! — деди Бутрус.

— Агар оёқларингни ювмасам, Менга қарашли бўлмайсан, — деди Исо.

<sup>9</sup> Шунда Бутрус деди:

— Ҳазрат, нафақат оёқларимни, қўлларим билан бошимни ҳам ювиб қўйинг!

<sup>10</sup> Исо унга деди:

— Чўмилган одам фақат оёғини ювса бас, у тамоман покдир. Сизлар ҳам поксизлар, аммо ҳаммангиз эмас.

<sup>11</sup> Исо Ўзига хоинлик қиласидиган одамни билар эди, шунинг учун: “Ҳаммангиз ҳам пок эмассизлар”, деди.

<sup>12</sup> Шогирдларининг оёқларини ювиб бўлгач, Исо устки кийимини кийиб, яна дастурхон олдига ёнбошлади. Сўнг шогирдларидан сўради:

— Ҳозир нима қилганимни тушундиларингми? <sup>13</sup> Сизлар Мени “Устоз”, “Ҳазрат” деб чақирасизлар ва тўғри қиласизлар, чунки Мен худди шундайман.

<sup>14</sup> Агар Мен Ҳазратингиз ва Устозингиз бўла туриб оёқларингизни ювган бўлсам, сизлар ҳам бир-бирингизнинг оёқларингизни ювишингиз шарт. <sup>15</sup> Мен сизларга нима қилган бўлсам, сизлар ҳам ўшани қилишингиз керак. Мен сизларга ўрнак кўрсатдим. <sup>16</sup> Сизларга чинини айтайн: қул ўз хўжайинидан устун эмас, элчи ҳам уни юборгандан устун эмас. <sup>17</sup> Агар гапимни уқсан бўлсангиз, бунга амал қилинглар, шунда баҳтли бўласизлар!

### **Яҳудонинг Исога хиёнати ҳақида каромат**

<sup>18</sup> Исо гапида давом этди:

— Менинг гапларим ҳаммангизга тегишли эмас. Мен кимларни танлаганимни биламан. Муқаддас битикларда: “Нонимни еган киши Менга қарши бош кўтарди”\*, деб айтилган. Бу сўзлар бажо бўлиши керак. <sup>19</sup> Мен буни сизларга ҳозирдан, юз бермасдан олдин, айтиб қўйяпман. Токи юз берганда, Масиҳ Мен эканлигимга\* ишонинглар. <sup>20</sup> Сизларга чинини айтайн: ким Мен юборган одамни қабул қиласа, Мени қабул қилган бўлади. Мени қабул қилган эса Мени Юборганини қабул қилган бўлади.

<sup>21</sup> Исо қаттиқ изтироб чекиб, деди:

— Сизларга чинини айтайн, орангиздан биттаси Менга хиёнат қиласи.

<sup>22</sup> Шогирдлари эса У кимни назарда тутаётганини билмай, гангиб бир-бирига

қараб турар эдилар.<sup>23</sup> Шогирдларидан бири Исонинг ёнида ёнбошлаган эди. У Исонинг севикли шогирди\* эди.<sup>24</sup> Бутрус ўша шогирдга: “Исо ким ҳақида гапирияпти, сўра-чи”, деб имо-ишора қилди.<sup>25</sup> Шунда у энганиб, Исодан:

— Ҳазрат, у ким? — деб сўради.<sup>26</sup> Исо жавоб берди:

— Мен бир бурда нонни косага ботириб кимга берсам, у ўшадир, — деди. Сўнг бурда нонни ботириб, Шимўн ўғли Яхудо Ишқариётга берди.<sup>27</sup> Яхудо бурдани олар-олмас, шайтон унинг ичига кириб олди.

— Қиладиганингни тезроқ қил, — деди унга Исо.

<sup>28</sup> Даствурхон атрофидагилардан ҳеч ким нима учун Исо бу сўзларни Яхудога айтганини тушунмади. <sup>29</sup> Пул қутиси Яхудода бўлгани сабабли, баъзилари: “Исо унга, байрам учун бизга керак бўладиган нарсаларни сотиб ол, деяпти ёки, камбағалларга бир нима бер, деяпти”, деб ўйлардилар. <sup>30</sup> Яхудо эса ўша бурда нонни олган заҳоти ташқарига чиқиб кетди. Тун эди.

### Бир-бирингизни севинглар

<sup>31</sup> Яхудо чиқиб кетгач, Исо деди:

— Инсон Ўғлининг улуғворлиги аён бўладиган вақти келди. У орқали Худонинг улуғворлиги аён бўлади.<sup>32</sup> Худонинг улуғворлиги Инсон Ўғли орқали аён бўлар экан, тез орада Худо Инсон Ўғлини Ўз улуғворлигига шерик қиласди.<sup>33</sup> Болаларим! Энди Мен сизлар билан узоқ бўлмайман. Мени қидирасизлар. Яхудийларга айтган эдим, сизларга ҳам айтяпман: Мен борадиган жойга сизлар боролмайсизлар.<sup>34</sup> Сизларга янги амр беряпман: бир-бирингизни севинглар. Мен сизларни қандай севган бўлсан, сизлар ҳам бир-бирингизни шундай севинглар.<sup>35</sup> Агар бир-бирингизни севсангиз, сизлар Менинг шогирдларим эканингизни ҳамма шундан билиб олади.

### Бутруснинг Исодан тониши ҳақида каромат

<sup>36</sup> Бутрус Исола деди:

— Ҳазрат, Сиз қаерга кетяпсиз?

— Ҳозир Мен борадиган жойга сен орқамдан боролмайсан, кейинчалик борасан, — деди унга Исо.

<sup>37</sup> Бутрус сўради:

— Ҳазрат, нега ҳозир орқангиздан боролмас эканман? Мен Сиз учун жонимни беришга тайёрман!

<sup>38</sup> Исо жавоб берди:

— Сен ростдан ҳам Мен учун жонингни беришга тайёрмисан?! Сенга чинини айтаман, хўroz қичқирмасданоқ, сен уч марта Мендан тонасан!

## 14-БОБ

### Исо йўл, ҳақиқат ва ҳаётдир

<sup>1</sup> Исо шогирдларига деди:

— Юрагингиз сиқилмасин. Худога ишонинг, Менга ҳам ишонинг!<sup>2</sup> Отам Худонинг уйида маскан кўп. Шундай бўлмаганда эди, сизларга буларни айтиб ўтирган бўлардим. Мен сизларга жой тайёрлагани кетяпман.<sup>3</sup> Мен бориб сизларга жой тайёрлайман-у, сизларни Ўзим билан олиб кетгани келаман. Токи Мен бўлган жойда сизлар ҳам бўлинглар.<sup>4</sup> Мен борадиган жойга олиб борадиган йўлни сизлар биласизлар.

<sup>5</sup> — Ҳазрат! — деди Унга Тўма, — Қаерга боришингизни билмасак, йўлни қаердан биламиш?

<sup>6</sup> Исо унга деди:

— Мен йўл, ҳақиқат ва ҳаётдирман. Отанинг олдига олиб борадиган Мендан бошқа йўл йўқ. <sup>7</sup> Агар Мени таниб-билсангиз, Отамни ҳам таниб-биласизлар\*. Ҳа, Уни биласиз, чунки Уни кўрдингиз.

<sup>8</sup> Филип Исога деди:

— Ҳазрат, бизга Отани кўрсатинг, шунинг ўзи бизга кифоя!

<sup>9</sup> — Филип, — деди унга Исо, — Мен шунча вақтдан бери сизлар билан биргаман. Наҳотки Мени таниб-бilmасанг?! Мени кўрган одам Отани кўрган бўлади. Шундай экан, қандай қилиб сен: “Отани бизга кўрсатинг”, деяпсан? <sup>10</sup> Мен Отада, Ота эса Менда эканлигига наҳотки ишонмасанг?! Мен сизларга айтган сўзларни Ўзимдан тўқиб гапирмаяпман. Аксинча, Менда яшаган Отам Мен орқали Ўз ишларини бажармоқда. <sup>11</sup> Мен Отамда ва Отам Менда эканлигига ишонинглар. Агар ишонмасангизлар, ҳеч бўлмаса, қилган ишларим туфайли ишонинглар.

<sup>12</sup> Сизларга чинини айтайин: Менга ишонган одам Мен қилган ишларни қилади. Булардан ҳам буюкроқ ишларни қилади, чунки Мен Отанинг олдига кетяпман.

<sup>13</sup> Сизлар Менинг номимдан сўраган ҳамма нарсани Мен бажо келтираман, токи Ота Ўз Ўғли орқали улуғлансин. <sup>14</sup> Ҳа, сизлар Менинг номим билан Мендан сўраган ҳар қандай нарсани бажо келтираман.

### Муқаддас Рухни юбориш ваъдаси

<sup>15</sup> Исо уларга деди: “Агар Мени севсангизлар, амрларимга амал қиласизлар.

<sup>16</sup> Мен осмондаги Отага мурожаат қиламан ва У сизлар билан то абад қоладиган бошқа Ҳомийни\* юборади. <sup>17</sup> Бу Ҳомий — Ҳақиқат Рухидир. Бу дунёга тегишли бўлганлар Уни қабул қила олмайдилар, чунки Уни кўрмайдилар ҳам, билмайдилар ҳам. Сизлар эса Уни биласизлар, чунки У сизлар билан яшамоқда, У ичингида бўлади. <sup>18</sup> Мен сизларни етим қолдирмайман, яна олдингизга қайтиб келаман. <sup>19</sup> Бир оздан кейин дунё Мени бошқа кўрмайди. Аммо сизлар Мени кўрасизлар. Мен барҳаёт бўлганим учун сизлар ҳам яшайсизлар. <sup>20</sup> Мен Отамда эканимни, сизлар Менда ва Мен сизларда эканимни ўша куни англаб оласизлар. <sup>21</sup> Менинг амрларимни билиб, уларга амал қилган киши Мени севади. Ким Мени севса, Отам ҳам уни севади. Мен ҳам уни севаман ва Ўзимни унга аён қиламан.”

<sup>22</sup> Ишқариёт бўлмаган бошқа Яхудо Исога деди: “Ҳазрат, нега Ўзингизни дунёга аён қилмай, бизга аён қилмоқчисиз?”

<sup>23</sup> Исо унга шундай жавоб берди: “Ким Мени севса, Менинг сўзимга амал қилади. Отам ҳам уни севади. Биз унинг олдига келиб, у билан бирга яшаймиз.

<sup>24</sup> Мени яхши кўрмаган киши сўзларимга амал қилмайди. Сизлар эшитган сўз Менини эмас, балки Мени юборган Отаникидир.

<sup>25</sup> Мен сизлар билан эканман, буларни айтдим. <sup>26</sup> Отам Менинг номимдан юборадиган Ҳомий\*, яъни Муқаддас Рух сизларга ҳаммасини ўргатади. Мен сизларга айтган ҳамма сўзларимни У ёдингизга солади.

<sup>27</sup> Мен сизларга тинчликни қолдиряпман. Ўз тинчлигимни сизларга беряпман. Мен бераётган тинчлик дунё берадиган тинчликка ўхшамайди. Юрагингиз сиқилмасин, қўрқманглар. <sup>28</sup> Сизларга айтганимни эшитдингизлар: Мен кетиб, яна олдингизга қайтиб келаман. Агар Мени яхши кўрганингизда эди, самовий Отанинг олдига кетаётганимдан қувонган бўлар эдингизлар. Зеро, Ота Мендан улуғdir. <sup>29</sup> Бу ҳодисалар содир бўлмасдан олдин сизларга айтдим. Токи содир бўлганда ишонинглар. <sup>30</sup> Сизлар билан сўзлашибга деярли вақтим қолмади. Чунки бу дунёнинг ёвуз хукмдори\* келяпти. У Менга хукмини ўтказа олмайди. <sup>31</sup> Лекин дунё билсинки, Мен Отани севаман, Ота Менга неки буюрган бўлса, худди шуни бажараман.

Қани, туринглар, бу ердан кета қолайлик.”

## 15-БОБ

### Ток ва унинг новдалари ҳақида масал

<sup>1</sup> Исо шогирдларига деди: “Мен ҳақиқий токман, осмондаги Отам эса боғбондир. <sup>2</sup> Ҳосил бермайдиган ҳар бир новдамни У кесиб ташлайди. Ҳосил берадиган ҳар бир новдани эса, яна кўпроқ ҳосил берсин деб, хомток қилиб тозалайди. <sup>3</sup> Мен сизга айтган сўзим орқали сизлар аллақачон тозаланиб бўлгансизлар. <sup>4</sup> Мен билан алоқада бўлинглар, шунда Мен сизлар билан алоқада бўламан. Токка уланмаган новда ўз-ўзидан ҳосил беролмайди. Шу сингари, сизлар ҳам Мен билан алоқада бўлмасангизлар, ҳосил беролмайсизлар.

<sup>5</sup> Мен — ток, сизлар эса новдасизлар. Агар Менда бўлсангизлар ва Мен сизларда бўлсам, кўп ҳосил берасизлар. Менсиз ҳеч нарса қилолмайсизлар. <sup>6</sup> Ким Мен билан алоқани узса, новда каби, ташлаб юборилади ва қурийди. Бундай новдаларни эса йиғиб, ўтга ташлаб ёндиришади. <sup>7</sup> Агар сиз Мен билан алоқада бўлиб, сўзларимни қалбингизга жо қилсангизлар, истаганингизни сўранглар, сизга берилади. <sup>8</sup> Сизлар кўп ҳосил бериб, Менинг шогирдларим эканлигингиизни исботлайсиз. Бу орқали Отам улуғланади.

### Севги ҳақида

<sup>9</sup> Осмондаги Отам Мени қандай севган бўлса, Мен ҳам сизларни шундай севдим. Севгимга содик қолинглар. <sup>10</sup> Мен Отамнинг амрларига амал қилиб, Унинг севгисига содик қолганман. Худди шу сингари, сизлар ҳам, Менинг амрларимга амал қилсангизлар, севгимга содик қоласизлар.

<sup>11</sup> Менинг шодлигим қалбингизни тўлдирсин деб, сизларга бу сўзларни айтдим. <sup>12</sup> Менинг амрим шу: Мен сизларни қандай севган бўлсам, сизлар ҳам бир-бирингизни шундай севинглар. <sup>13</sup> Ким ўз жонини дўстлари учун фидо қилса, бундан ортиқ севги йўқ. <sup>14</sup> Агар сизлар амрларимни бажо келтирсангизлар, Менинг дўстларим бўласизлар. <sup>15</sup> Мен сизларни энди қул деб атамайман. Қул хўжайини нима қилишини билмайди. Сизларни дўстларим дейман, чунки Отамдан эшитган ҳамма нарсани сизларга айтдим.

<sup>16</sup> Сизлар Мени эмас, Мен сизларни танладим. Мен сизларни: «Бориб ҳосил берсин, ҳосили боқий бўлсин», деб танладим. Шунда Менинг номимдан Отадан нима сўрасангизлар, У сизларга беради.

<sup>17</sup> Хуллас, сизларга амрим шу: бир-бирингизни севинглар!

### Дунёнинг нафрати

<sup>18</sup> Агар дунё сизлардан нафратланаётган бўлса, билингки, сизлардан илгари Мендан нафратланган. <sup>19</sup> Сизлар бу дунёга тегишли бўлганингизда эди, дунё сизларни ўзиники каби севар эди. Сизлар эса бу дунёга тегишли эмассизлар. Мен сизларни бу дунёдан танлаб олдим. Ана шу сабабдан дунё сизлардан нафратланади. <sup>20</sup> Қул ўз хўжайинидан устун эмас деган сўзимни\* эсланглар. Агар Мени қувғин қилган бўлсалар, сизларни ҳам қувғин қиласилар. Агар Менинг сўзларимга риоя қилган бўлсалар, сизларникига ҳам риоя қиласилар.

<sup>21</sup> Одамлар буларни сизларга Менинг номим туфайли қиласилар. Ахир, улар Мени Юборганни танимайдилар. <sup>22</sup> Агар Мен келиб, уларга гапирмаганимда эди, улар Менга ишонмаганлари учун гуноҳда айбланмас эдилар. Энди бўлса гуноҳларини оқлаш учун баҳона топа олмайдилар. <sup>23</sup> Мендан нафратланган одам осмондаги Отамдан ҳам нафратланади. <sup>24</sup> Агар Мен улар орасида бошқа ҳеч ким

қилмаган мўъжизаларни қилмаганимда эди, улар гуноҳда айбланмас эдилар. Энди бўлса мўъжизаларимни кўрдилар-у, Мендан ҳам, Отамдан ҳам нафратландилар.<sup>25</sup> Бу эса Тавротдаги: «Мендан сабабсиз нафрат этганлар»\* деган сўзлар бажо бўлиши учун содир бўлди.

<sup>26</sup> Мен сизларга Отамдан юборадиган Ҳомий\*, яъни Отамдан чиқадиган Ҳақиқат Руҳи келганда Мен тўғримда гувоҳлик беради.<sup>27</sup> Сизлар ҳам гувоҳлик берасизлар, чунки бошданоқ Мен билан бирга бўлгансизлар.

## 16-БОБ

### Муқаддас Руҳнинг фаолияти

<sup>1</sup> Мен бу гапларни сизлар тўғри йўлдан озманлар, деб айтдим. <sup>2</sup> Сизларни синағогалардан ҳайдаб юборадилар. Ҳатто шундай замон келадики, сизларни ўлдираётган ҳар бир киши бу билан Худога хизмат қиляпман, деб ўйлади. <sup>3</sup> Улар бу ишларни самовий Отамни ва Мени танимаганлари учун қиласидилар. <sup>4</sup> Буларни сизларга ҳозирдан айтиб қўйяпман, токи ўша вақт-соат келганда, сўзларимни эсга олинглар.

Сизларга буларни бошданоқ айтишимга ҳожат йўқ эди, чунки Ўзим сизлар билан бирга эдим. <sup>5</sup> Энди эса Мени Юборганинг олдига кетяпман. Биронтангиз Мендан: «Қаерга кетяпсан?» деб сўрамаяпсиз. <sup>6</sup> Буларни айтганим учун дилингиз ғам-қайғуга ботган. <sup>7</sup> Аммо сизларга ҳақиқатни айтаман, Менинг кетишим сизлар учун яхшироқдир. Агар Мен кетмасам, Ҳомий\* келмайди. Агарда кетсам, Уни олдингизга юбораман. <sup>8</sup> У келганда дунёга гуноҳ, адолат ва ҳукм тўғрисидаги ҳақиқатни аён қиласиди. <sup>9</sup> Гуноҳ тўғрисидаги ҳақиқат шундан иборатки, одамлар Менга ишонмайдилар. <sup>10</sup> Адолат тўғрисидаги ҳақиқат шуки, Ота Мени оқлайди. Мен Отанинг олдига кетяпман ва сизлар Мени бошқа кўрмайсизлар. <sup>11</sup> Ҳукм тўғрисидаги ҳақиқат шундан иборатки, ҳукм чиқариб бўлинган, бу дунёнинг ёвуз ҳукмдори\* маҳкум қилинган.

<sup>12</sup> Сизларга яна айтадиган гапларим кўп, лекин энди ичингизга сиғдиролмайсизлар. <sup>13</sup> Ҳақиқат Руҳи келиб, сизларни тўлиқ ҳақиқат сари бошлайди. У Ўзича гапирмайди, неки эшитса, ўшани сўзлаб беради, У юз берадиган воқеалар ҳақида сизларга хабар қиласиди. <sup>14</sup> У Мендан эшитган нарсаларни сизларга маълум қиласиди, шу орқали Мени улуғлайди. <sup>15</sup> Отанинг бор нарсаси Меникидир. Ана шу сабабдан, Руҳ Мендан эшитган нарсаларни сизларга маълум қиласиди, деб айтдим. <sup>16</sup> Сизлар билан бирга узоқ вақт бўлмайман, лекин кўп ўтмай сизлар Мени яна кўрасизлар\*.”

### Қайғунгиз шодликка айланади

<sup>17</sup> Шу пайтда Исонинг шогирдлари бир-бирига деди: “Қизиқ, У бизга ўзи нима айтмоқчи?! «Сизлар билан бирга узоқ вақт бўлмайман, лекин кўп ўтмай сизлар Мени яна кўрасизлар», деди. «Отанинг олдига кетяпман», деб айтди. <sup>18</sup> «Сизлар билан бирга узоқ вақт бўлмайман» дейиши билан нима демоқчи экан, тушунмадик.”

<sup>19</sup> Исо шогирдларининг савол бермоқчи бўлганларини билиб, деди: “«Сизлар билан бирга узоқ вақт бўлмайман, лекин кўп ўтмай сизлар Мени яна кўрасизлар», деб айтган гапимнинг маъносини муҳокама қиляпсизларми? <sup>20</sup> Сизларга чинини айтайн: сизлар йиғлаб, дод-фарёд қиласизлар, дунё эса қувонади. Сизлар қайғурасиз, лекин қайғунгиз шодликка айланади. <sup>21</sup> Ойи тўлган аёл дард билан туғади. Аммо бола туғилгандан кейин, дунёга одамзод келди, деб аёл қувонади. Қувонганидан у чеккан дардини унутиб юборади. <sup>22</sup> Шунга ўхшаб сизлар ҳам

ҳозир ғам–қайғу чекяпсизлар. Лекин Мен сизларни яна қўраман. Шунда юрагингиз қувончга тўлади. Қувончингизни сизлардан ҳеч ким тортиб олмайди.

<sup>23</sup> Ўша куни Мендан ҳеч нарса сўрамайсизлар. Сизларга чинини айтайн: Менинг номимдан осмондаги Отамдан нима сўрасангизлар, У сизларга беради.

<sup>24</sup> Шу пайтгача Менинг номим билан Отадан ҳеч нарса сўрамадингизлар. Сўранглар, оласизлар ва қалбингиш шодликка тўлади.

### Исо дунёдан устун

<sup>25</sup> Шу вақтгача сизларга маталлар орқали гапириб келдим. Лекин шундай вақт келадики, Мен сизларга Отам ҳақида маталлар орқали эмас, очиқдан–очиқ гапираман. <sup>26</sup> Ўша куни ўзларингиз Отадан истаганингизни Менинг номимдан сўрайсизлар. Менинг сизлар учун Отадан илтимос қилишимнинг ҳожати бўлмайди. <sup>27</sup> Зотан, Отанинг Ўзи сизларни севади, чунки сизлар Мени яхши қўриб, Худодан келганимга ишондингизлар. <sup>28</sup> Мен Отамдан чиқиб, дунёга келдим. Энди дунёни тарк этиб, Отамнинг олдига кетяпман.”

<sup>29</sup> Шогирдлар Исола шундай дейишди:

— Мана, ҳозир Сиз матал ишлатмай, очиқ сўзлаяпсиз. <sup>30</sup> Ҳамма нарсани билишингизни энди тушундик. Саволга ҳам ўрин йўқ. Сиз Худодан келганингизга энди ишондик.

<sup>31</sup> Исо деди:

— Энди ростдан ҳам ишоняпсизларми? <sup>32</sup> Шундай вақт келадики, ҳатто келди ҳам, сизлар тарқалиб, ҳар бирингиз ин–инингизга кириб кетасиз. Мени ёлғиз қолдирасизлар. Бироқ Мен ёлғиз эмасман, чунки Отам Мен биландир. <sup>33</sup> Мен туфайли хотиржам бўлишингиз учун буларни сизларга айтдим. Дунёда қайғу–алам чекасизлар. Лекин дадил бўлинглар, Мен дунёни енгдим.

## 17–БОБ

### Исо Ўз шогирдлари учун ибодат қиласи

<sup>1</sup> Шу гаплардан кейин Исо кўзларини осмонга тикиб, деди: “Эй Ота! Вақт–соати келди. Ўғлинг Сени улуғлаши учун Ўғлингни улуғлагин. <sup>2</sup> Сен Унга бутун инсоният устидан ҳокимият бердинг. Токи Унга берилган ҳар бир инсонга У абадий ҳаёт ато қилсин. <sup>3</sup> Абадий ҳаёт эса Сени — ягона ҳақ Худони ҳамда Сен юборган Исо Масиҳни таниб–билишдан иборатдир.

<sup>4</sup> Сен Менга топширган ишни тугатиб, ер юзида Сени улуғладим. <sup>5</sup> Дунё яратилишидан аввал Мен Сенинг хузурингда улуғвор эдим. Энди, эй Ота, ўша улуғворликни Ўз хузурингда Менга яна ато қилгин.

<sup>6</sup> Сен дунёдан Менга берган одамларга Сени танитдим. Улар Сенини эдилар ва Сен уларни Менга бердинг. Улар Сенинг сўзингга амал қилдилар. <sup>7</sup> Сен Менга берган ҳамма нарса Сендан эканлигини улар энди билиб олдилар. <sup>8</sup> Чунки Сен Менга айтган сўзларингни Мен уларга айтдим. Улар сўзларингни қабул қилиб, Мен Сендан келганимни аниқ тушундилар. Мени Сен юборганингга ишондилар.

<sup>9</sup> Мен улар учун илтижо қиласман. Дунё учун эмас, балки Сен Менга берган одамлар учун илтижо қиласман. Ахир, улар Сенинидир. <sup>10</sup> Зотан, Менини бўлган ҳамма — Сенини, Сенини эса Менинидир. Менинг улуғворлигим улар орқали аён бўлмоқда.

<sup>11</sup> Мен бу дунёда ортиқ қолмайман, Сенинг олдингга қайтиб кетяпман. Улар эса бу дунёда қоладилар. Эй Муқаддас Ота! Менга берган Ўз номинг қудрати илиа уларни омон сақла\*. Токи улар ҳам Биздай бир бўлсинлар. <sup>12</sup> Мен улар билан бирга бўлганимда, Менга берган номинг қудрати илиа уларни омон сақладим.

Уларни асрадим\*, биронтаси йўқолмади. Фақат Муқаддас битикларда айтилганлар\* бажо бўлиши учун ҳалокатга маҳкум бўлган одам\* нобуд бўлди.

<sup>13</sup> Энди эса Сенинг олдингга кетяпман. Менинг шодлигим уларнинг қалбини тўлдирсинг деб, буларни ҳали дунёда бўлганимда айтипман. <sup>14</sup> Мен уларга Сенинг сўзларингни айтдим. Бу дунёга тегишли бўлганлар улардан нафратланади. Чunksи Мен бу дунёдан бўлмаганим каби, улар ҳам бу дунёдан эмаслар. <sup>15</sup> Энди уларни дунёдан олишингни эмас, балки ёвуз шайтондан сақлашингни сўрайапман. <sup>16</sup> Мен бу дунёдан бўлмаганим каби, улар ҳам бу дунёдан эмаслар. <sup>17</sup> Сенинг каломинг ҳақиқатдир. Ҳақиқат орқали уларни Ўзинг учун ажратиб олгин. <sup>18</sup> Сен Мени дунёга юборганингдай, Мен ҳам уларни дунёга юбордим. <sup>19</sup> Уларни деб Ўзимни Сенга бағишиладим, токи улар ҳам ҳақиқат орқали ўзларини Сенга бағишиласинлар.

<sup>20</sup> Мен нафақат улар учун илтижо қиляпман, балки уларнинг сўзи орқали Менга имон келтирадиганлар учун ҳам илтижо қиляпман: <sup>21</sup> ҳаммалари бир бўлишсин. Эй Ота, Сен Менда ва Мен Сенда бўлганимдай, улар ҳам Бизда бўлишсин. Шу тариқа Мени Сен юборганингга дунё ишонсин. <sup>22</sup> Сен Менга ато қилган улуғворликни уларга бердим, токи Биз бир бўлганимиздек, улар ҳам бир бўлишсин. <sup>23</sup> Мен улардаман, Сен эса Мендасан. Шундай экан, улар мукаммал бирлиқда бўлсинлар. Токи, Мени Сен юборганингни дунё билсин. Мени қандай севсанг, Меникilarни ҳам шундай севганингни дунё кўрсин.

<sup>24</sup> Эй Ота! Сен Менга берган одамлар Мен билан бир жойда бўлишини хоҳлайман. Сен Менга ато қилган улуғворликни улар ҳам кўрсин, чunksи оламни яратмасингдан олдин Сен Мени яхши кўрар эдинг. <sup>25</sup> Эй одил Ота! Дунё Сени билмаса ҳам, Мен Сени биламан. Бу одамлар ҳам Мени Сен юборганингни билиб олдилар. <sup>26</sup> Уларга Сенинг кимлигингни аён қилдим ва аён қилишни давом эттиравераман. Токи, Менга бўлган севгинг уларнинг юракларида жо бўлсин, Мен ҳам уларда бўлайин.”

## 18-БОБ

### Исо ҳибсга олинади

<sup>1</sup> Бу сўзларни айтгандан сўнг, Исо Ўз шогирдлари билан у ердан чиқиб, Қидрон сойлигининг\* нариги томонига ўтди. Ўша ерда бир боғ бор эди. Исо шогирдлари билан боқقا кирди. <sup>2</sup> Хоин Яхудо ҳам ўша жойни билар эди, чunksи Исо шогирдлари билан у ерда тез–тез учрашиб турагар эди. <sup>3</sup> Шундай қилиб, Яхудо бир бўлинма Рим аскарларини ҳамда бош руҳонийлар ва фарзийлар томонидан юборилган Маъбад миршабларини\* бошлаб, у ерга келди. Қўлларида машъалаю фонулслар, қурол–яроғлар бор эди.

<sup>4</sup> Исо бошидан кечадиган ҳамма нарсани билар эди. У одамларга пешвоз чиқиб, сўради:

— Кимни қидиряпсизлар?

<sup>5</sup> — Носиралик Исони, — деб жавоб беришди улар.

— Ўша Менман, — деди Исо.

Хоин Яхудо уларнинг орасида турган эди. <sup>6</sup> Исо “Ўша Менман” дейиши биланоқ улар орқага тисарилиб, ерга йиқилишиди. <sup>7</sup> Исо улардан яна сўради:

— Кимни қидиряпсизлар?

— Носиралик Исони, — дедилар.

<sup>8</sup> — Сизларга айтдим–ку, Ўша Менман, — деди уларга Исо. — Агар Мени қидираётган бўлсангизлар, буларни қўйиб юборинглар, кетаверишсин.

<sup>9</sup> Шу йўсин Исонинг илгари: “Ота, Сен Менга берган одамлардан ҳеч бирининг йўқолишига йўл қўймадим\*” деган сўзлари бажо бўлди.

<sup>10</sup> Шу онда Бутруслар ёнидаги қиличини қинидан суғурди-да, олий руҳонийнинг хизматкорига бир уриб, ўнг қулоғини кесиб ташлади. Хизматкорнинг исми Малхус эди.

<sup>11</sup> Исо Бутрусларга:

— Қиличинги қинига солиб қўй! Наҳотки Мен осмондаги Отам берган азоб косасидан\* ичмасам?! — деди.

<sup>12</sup> Шунда Рим аскарлари билан бўлинма қўмондони ва яхудий миршаблари Исони қўлга олиб, боғлашди. <sup>13</sup> Уни олдин Ханан олдига олиб боришиди. Ханан ўша йилги олий руҳоний бўлган Каяфаснинг қайнатаси эди\*. <sup>14</sup> Яхудийларга: “Халқ учун битта одамнинг ўлиши яхшироқ”, деб маслаҳат берган ўша Каяфас\* эди.

### **Бутрусларга**

<sup>15</sup> Исонинг орқасидан Бутрусларга яна бошқа бир шогирд эргашиб боришар эди. Бу шогирд олий руҳоний Хананинг\* таниши бўлиб, Исо билан бемалол олий руҳонийнинг ҳовлисига кирди. <sup>16</sup> Бутрусларга яна ташқарида, дарвоза олдидаги қолди. Олий руҳонийга таниш бўлган шогирд кейинроқ яна ташқарига чиқди-да, дарвозабон чўрига нимадир деб, Бутрусларга олиб кирди. <sup>17</sup> Шунда дарвозабон чўри Бутруслардан:

— Сиз ҳам у Одамнинг шогирдларидан эмасмисиз? — деб сўради.

— Йўқ! — деди Бутруслар.

<sup>18</sup> Ҳаво совуқ бўлгани учун у ерда турган хизматкорлар билан миршаблар кўмир ёқиб, исинаётган эдилар. Бутруслар ҳам уларнинг олдига бориб, исиниб турди.

### **Исо олий руҳоний Ханан олдидаги**

<sup>19</sup> Шу пайтда олий руҳоний Ханан Исони сўроқ қилаётган эди. Шогирдлари ва таълимотига тааллуқли саволлар берди. <sup>20</sup> Исо унга жавоб бериб деди:

— Мен элу оламга очиқ сўзладим. Ҳар доим яхудийлар йифиладиган синағогаларда ва Маъбадда таълим бериб юрдим, ҳеч яширинча гап айтмадим.

<sup>21</sup> Нега Мени сўроқ қиласиз? Гапларимни эшитган одамлардан сўранг. Нималар ҳақида гапирганимни улар билишади.

<sup>22</sup> Исо буларни айтиб бўлгач, ёнида турган Маъбад миршабларидан бири Исонинг юзига бир шапалоқ уриб, деди:

— Олий руҳонийга ҳам шундай жавоб берасанми?

<sup>23</sup> Исо бунга жавобан деди:

— Агар Мен нотўғри гапирган бўлсан, нотўғри жойини кўрсат. Агар тўғри гапирган бўлсан, нега Мени урасан?

<sup>24</sup> Шундан кейин Ханан Исони боғланган ҳолда олий руҳоний Каяфас\* ҳузурига юборди.

### **Бутрусларга**

<sup>25</sup> Бутрусларга яна тонади:

— Сен ҳам Унинг шогирдларидан эмасмисан? — деб сўради.

— Йўқ! — деб тонди у.

<sup>26</sup> Олий руҳонийнинг хизматкорларидан бири Бутрусларга яна тонади:

— Сени боғда У билан кўрдим, шекилли?

<sup>27</sup> Бутрусларга яна тонади. Нақ шу пайт хўрозда қичқирди.

### Исо Пилат ҳузурида

<sup>28</sup> Тонг отди. Яхудийлар Исони Каяфас ҳузуридан олиб чиқиб, ҳоким Пилатнинг<sup>\*</sup> саройига олиб бордилар. Ўзлари эса булғанишни истамай ҳукумат саройига кирмадилар<sup>\*,</sup> чунки булғанган одам Фисиҳ таомини<sup>\*</sup> ея олмасди. <sup>29</sup> Шу сабабли Пилат ташқарига, уларнинг олдига чиқди.

— Бу Одамни нимада айблаяпсизлар? — деб сўради.

<sup>30</sup> — Агар У жиноятчи бўлмагандан, Уни сизнинг қўлингизга топширмас эдик, — деб жавоб беришди улар.

<sup>31</sup> — Уни олиб кетиб, ўз қонунингиз бўйича хукм қилаверинглар, — деди Пилат.

— Бизга ҳеч кимни қатл қилишга ижозат берилмаган, — дейишди унга яхудийлар.

<sup>32</sup> Исо Ўзининг қандай ўлиши ҳақида айтган сўzlари амалга ошиши учун<sup>\*</sup> бу воқеа содир бўлди.

<sup>33</sup> Шунда Пилат яна саройга кирди ва Исони чақиртириб:

— Сен яхудийларнинг Шоҳимисан? — деб сўради.

<sup>34</sup> — Ўзингиз қизиқиб сўраяпсизми, ёки бошқалар сизга Мен тўғримда айтишдими? — деб сўради Исо.

<sup>35</sup> Пилат деди:

— Нима, мен яхудиймидим?! Ўз халқинг, бош руҳонийларинг Сени менга топширишди. Сен нима иш қилиб қўйдинг?

<sup>36</sup> Исо жавоб берди:

— Менинг Шоҳлигим бу дунёдан эмас. Агар Шоҳлигим бу дунёдан бўлганда эди, яхудийларнинг қўлига тушмаслигим учун Менинг хизматкорларим қурашар эдилар. Бироқ Менинг Шоҳлигим бу ердан эмас.

<sup>37</sup> — Демак, Сен Шоҳ экансан-да?! — деди Пилат.

— Шоҳ эканимни ўзингиз айтдингиз, — деди Исо. — Мен ҳақиқат тўғрисида шоҳидлик қилмоқ учун туғилганман, ана шу мақсадда оламга келдим. Ҳақиқат тарафида бўлган ҳар бир одам Менга қулоқ солади.

<sup>38</sup> — Ҳақиқат ўзи нима? — деб сўради Пилат. Шундай деди-ю, яна ташқарига, яхудийларнинг олдига чиқди.

— Мен Ундан ҳеч қандай айб топмадим, — деди уларга. <sup>39</sup> — Сизларнинг бир одатингиз бор-ку, ҳар Фисиҳ байрамида сизлар учун бир маҳбусни озод қиласар эдим. Шунга кўра, сизлар учун яхудийларнинг Шоҳини озод қилишимни истайсизларми?

<sup>40</sup> — Уни эмас, Бараббасни озод қилинг! — деб бақирди улар.

Бараббас эса исёнда иштирок этганди.

## 19-БОБ

### Исо ўлимга хукм қилинади

<sup>1</sup> Шундан кейин Пилат<sup>\*</sup> Исони олиб кетишни ва қамчилатишини буюрди. <sup>2</sup> Рим аскарлари тиканлардан тож ўриб, Исонинг бошига қўйдилар, устига сафсар тўн кийдирдилар. <sup>3</sup> Исонинг олдига қайта-қайта келиб:

— Яшавор-э, яхудийларнинг Шоҳи! — деб, Уни тарсакилар эдилар.

<sup>4</sup> Пилат яна ташқарига чиқиб, яхудийларга хитоб қилди:

— Мана, Уни олдингизга чиқаряпман, билиб қўйинглар, мен Ундан ҳеч қандай айб тополмадим!

<sup>5</sup> Шу пайт бошида тиканли тож, эгнида сафсар тўн билан Исо ташқарига чиқди.

— Мана, у Одам! — деди Пилат уларга.<sup>6</sup> Бош руҳонийлар ва Маъбад миршаблари\* Исони кўриб, бақиришиди:

— Хочга михлансин! Хочга михлансин!

— Уни сизлар олиб хочга михланглар! Мен Ундан ҳеч қандай айб тополмадим, — деди Пилат уларга.<sup>7</sup> Яхудийлар унга жавобан:

— Бизда қонун бор, қонунимизга кўра\*, У ўлиши керак, чунки У Ўзини Худонинг Ўғли\* деб айтяпти, — дедилар.

<sup>8</sup> Пилат буни эшитгач, юраги орқага тортиб кетди. <sup>9</sup> Қайтадан хукумат саройига кириб, Исадан:

— Сен қаердансан? — деб сўради. Исо унга жавоб бермади.

<sup>10</sup> — Менга жавоб бермайсанми?! — деди Пилат. — Сени озод қилишга ёки хочга михлашга менда ҳокимият борлигини билмайсанми?!

<sup>11</sup> Исо жавоб берди:

— Агар Худо йўл қўймаганда эди, сиз Менга ҳеч қандай ҳукмингизни ўтказа олмас эдингиз. Шу сабабдан Мени сизнинг қўлингизга тутиб берган одамнинг гуноҳи сизнинг гуноҳингиздан каттароқ.

<sup>12</sup> Шундан кейин Пилат Исони қўйиб юборишга чора излай бошлади. Аммо яхудийлар шундай деб қичқиришиди:

— Агар Уни қўйиб юборсангиз, сиз Қайсарнинг\* дўсти эмассиз. Ўзини шоҳ дейдиган ҳар бир киши Қайсарга қарши чиққан бўлади!

<sup>13</sup> Пилат бу сўзни эшитгач, Исони ташқарига олиб чиқди ва Тош супа деб ном олган жойдаги ҳукм курсисига ўтирди (бу жойнинг орамийча\* номи Габбата эди).

<sup>14</sup> Ўша куни Фисих байрами\* арафаси, туш маҳали\* эди. Пилат яхудийларга хитоб қилди:

— Мана, Шоҳингиз!

<sup>15</sup> — Йўқ қилинг Уни, йўқ қилинг! Хочга михланг! — деб бақирди улар.

— Сизларнинг Шоҳингизни хочга михлаб қўяйми? — деб сўради Пилат.

— Қайсардан бошқа шоҳимиз йўқ, — дейишиди бош руҳонийлар.

<sup>16</sup> Охири Пилат Исони хочга михлаш учун аскарларига топширди. Улар эса Исони олиб кетдилар.

### Исони хочга михлашади

<sup>17</sup> Исо Ўз хочини\* кўтариб, шаҳар ташқарисидаги Бош суяги деган жойга келди (бу жойнинг орамийча номи Гўлгота эди). <sup>18</sup> У ерда Исони хочга михлаб қўйдилар. У билан бирга яна иккита одамни ҳам хочга михладилар. Уларнинг бири Исонинг бу томонида, бошқаси у томонида, Исо эса ўртада эди. <sup>19</sup> Пилат бир лавҳага: “Яхудийларнинг Шоҳи Носиралик Исо” деган сўзларни ёзиб, лавҳани хочга остириб қўйди.

<sup>20</sup> Исо хочга михланган жой шаҳарга яқин бўлгани учун, бу лавҳани кўп яхудийлар ўқидилар. Лавҳа орамий, лотин ва юнон тилларида ёзилган эди.

<sup>21</sup> Яхудий бош руҳонийлари эса Пилатга бориб шундай дедилар:

— “Яхудийларнинг Шоҳи” деб ёзманг, балки “Бу Одам яхудийларнинг Шоҳи бўлишга даъвогарлик қилган” деб ёзинг.

<sup>22</sup> — Мен қандай ёзган бўлсам, шундайлигича қолсин, — деди Пилат.

<sup>23</sup> Аскарлар Исони хочга михлаб бўлиб, Унинг кийимларини олдилар.

Кийимларини тўрт бўлакка бўлиб, ҳар бир аскарга бердилар. Ички кўйлагини ҳам олдилар. Ички кўйлак бошдан-оёқ чоксиз бир тўқима эди. <sup>24</sup> Аскарлар бир-бирига:

— Буни йиртмайлик, бу учун қуръа ташлаймиз, кимга тушса, ўшаники бўлсин, — дейишиди.

Шу тариқа Мұқаддас битиклардаги қүйидаги сўзлар бажо бўлди:

“Кийимларимни улар ўзаро бўлишган,  
Либосим учун қуръа ташлашган.”\*

Аскарлар худди шундай қилдилар.

<sup>25</sup> Исонинг хочи ёнида Унинг онаси ва холаси, Клопаснинг хотини Марям ҳамда Магдалалик\* Марям тураг эдилар. <sup>26</sup> Исо онасини ва онаси ёнида турган севикли шогирдини\* кўрди. Исо онасига:

— Мана бу сизнинг ўғлингиз! — деди. <sup>27</sup> Кейин шогирдига қараб:

— Мана бу сенинг онанг! — деди.

Ўша вақтдан бошлаб шогирд Марямни ўз уйига олди.

### Исо жон беради

<sup>28</sup> Исо ҳамма ишларини тугатганини биларди. Мұқаддас битиклар\* бажо бўлсин деб, У:

— Чанқадим! — деди.

<sup>29</sup> Бу ерда арzon шаробга\* тўла бир идиш турган эди. Аскарлар шаробга шимгични ботирдилар-да, таёқнинг\* учига илиб, Исонинг оғзига олиб бордилар.

<sup>30</sup> Исо шаробни татиб кўргач:

— Амалга ошди! — деди-ю, бошини эгиб, жон берди.

<sup>31</sup> Ўша куни Шаббат арафаси эди. Эртанги Шаббат куни ниҳоятда табаррук кун\* ҳисоблангани учун, яхудийлар жасадларни хочда қолдиришни истамадилар. Улар Пилатнинг олдига бориб, хочга михланган одамларнинг болдириларини синдириб ташлаб\*, хочдан туширишни сўрадилар. <sup>32</sup> Шунда аскарлар бориб, Исо билан бирга хочга михланган биринчи, сўнгра иккинчи одамнинг болдириларини синдириб ташладилар. <sup>33</sup> Исонинг олдига келиб, Унинг ўлиб бўлганини кўрдилар. Шунинг учун болдириларини синдирамадилар. <sup>34</sup> Лекин аскарлардан бири Исонинг биқинини найза билан тешди, шу заҳоти Унинг биқинидан қон билан сув оқиб чиқди. <sup>35</sup> Бу ҳодисани кўрган киши\*, сизлар ҳам ишонинглар деб, гувоҳлик бериб келмоқда. Унинг гувоҳлиги ҳақиқатдир, у ҳақиқат айттаётганини билади. <sup>36</sup> Бу ҳодиса Мұқаддас битиклардаги: “Биронта ҳам суяги синдирилмайди”\* деган сўзлар амалга ошиши учун рўй берди. <sup>37</sup> Мұқаддас битикларнинг бошқа бир жойида шундай дейилган: “Улар ўzlари найза санчган Одамга қарайдилар.”\*

### Исо дафн қилинади

<sup>38</sup> Аrimateylik\* Юсуф Исонинг шогирди эди, лекин яхудийлардан қўрқсанни учун буни яшириб юрар эди. Исо ўлгандан кейин Юсуф Пилатдан Исонинг жасадини хочдан тушириб олишни илтимос қилди. Пилат ижозат берди. Шунда Юсуф бориб, Исонинг жасадини хочдан тушириб олди. <sup>39</sup> Илгари Исонинг олдига кечаси борган Никодим\* ҳам Юсуф билан бирга эди. Никодим икки пуд\* мирра\* ва алоэ мойларининг қоришмасини олиб келганди. <sup>40</sup> Улар иккови Исонинг жасадини олиб, яхудийларнинг дафн одатларига кўра, бу муаттар моддаларни суртиб, уни кафанладилар. <sup>41</sup> Исо хочга михланган жойнинг яқинида бир боғ бор эди. У боғда ҳали ҳеч ким қўйилмаган янги бир қабр бор эди. <sup>42</sup> Ўша кун яхудийларнинг Шаббат арафаси бўлгани учун улар, бу жой яқинроқ, деб Исонинг жасадини ўша қабрга қўйдилар.

## 20-БОБ

### **Исо тирилади**

<sup>1</sup> Якшанба куни эрта сахарда, кун ёришмасдан, Магдалалик\* Марям қабрнинг олдига келиб, қабр оғзидағи тошнинг ағдарилганини кўрди. <sup>2</sup> Сўнг у югуриб, Бутрус\* ва Исонинг севикли шогирди\* олдига бориб деди:

— Ҳазратимизнинг жасадини қабрдан олиб кетишибди. Уни қаерга қўйишганини билмаймиз.

<sup>3</sup> Бутрус ва бошқа шогирд қабр томон жўнашди. <sup>4</sup> Иккови бирга югуриб кетишиди. Аммо у шогирд Бутрусадан тезроқ югуриб, қабрга биринчи бўлиб етиб келди. <sup>5</sup> У энгашиб ичкарига қаради-да, у ерда ётган кафанин кўрди. Лекин қабрга кирмади. <sup>6</sup> Унинг орқасидан Бутрус етиб келиб, қабрга кирди. У ерда ётган кафани <sup>7</sup> ва Исонинг бошига ўралган рўмолни кўрди. Аммо рўмол кафан билан бирга эмас, алоҳида жойга йиғишириб қўйилган эди. <sup>8</sup> Шунда аввал келган шогирд ҳам қабрга кирди. Кўргандан кейингина ишонч ҳосил қилди. <sup>9</sup> Чунки улар Муқаддас битиклардаги, Исо ўлиқдан тирилиши керак деган сўзларни шу пайтгача тушунмаган эдилар.

### **Исо Марямга зоҳир бўлади**

<sup>10</sup> Шундан сўнг шогирдлар яна ўз уйларига қайтиб кетдилар. <sup>11</sup> Марям эса қабрнинг ташқарисида турганича, йиғлар эди. Йиғлаётуб, бир эгилиб қабр ичига қаради. <sup>12</sup> Шунда оқ кийим кийган икки фариштани кўриб қолди. Бири Исонинг жасади ётган жойнинг бош томонида, иккинчиси эса оёқ томонида ўтирган эди.

<sup>13</sup> Улар Марямга:

— Эй аёл, нега йиғлаяпсан? — дейишиди.

— Ҳазратимнинг жасадини олиб кетишибди, Уни қаерга қўйишганини билмайман, — деди у. <sup>14</sup> Шундай деди-ю, орқасига бурилиб, у ерда турган Исони кўрди. Лекин Унинг Исо эканлигини билмади.

<sup>15</sup> — Эй аёл, нега йиғлаяпсан? Кимни қидиряпсан? — деб сўради ундан Исо. Марям Уни боғбон деб ўйлади. Унга шундай деди:

— Тақсир, агар Уни сиз олиб кетган бўлсангиз, қаерга қўйганингизни менга айтинг, мен бориб Уни олай.

<sup>16</sup> Исо унга:

— Марям! — деди.

Марям Исола қайрилиб қаради-да, орамийчалаб\*:

— Равваний! — деди. (Равваний “устозим” демакдир.)

<sup>17</sup> — Мени ушлаб турма! — деди Исо Марямга. — Мен самовий Отанинг олдига чиқиб кетяпман. Сен бориб биродарларимга гапларимни етказ: “Мен Отамнинг олдига чиқиб кетяпман. У сизларнинг ҳам Отангиздир. У Менинг Худойим ва сизларнинг Худойингиздир.”

<sup>18</sup> Шунда Магдалалик Марям шогирдларнинг олдига бориб:

— Мен Раббимиз Исони кўрдим! — деди. Сўнг Исонинг унга айтган гапларини уларга етказди.

### **Исо шогирдларига зоҳир бўлади**

<sup>19</sup> Ўша якшанба куни оқшомда шогирдлар тўпланган эдилар. Улар яхудийлардан қўрқиб, уйнинг эшикларини қулфлаб олган эдилар. Шу пайт Исо келди, ўрталарида туриб шогирдларига:

— Сизларга тинчлик бўлсин! — деди. <sup>20</sup> Сўнг уларга қўлларини\* ва биқинини кўрсатди. Шогирдлар Раббимиз Исони кўриб, хурсанд бўлиб кетдилар.

<sup>21</sup> Исо яна уларга деди:

— Сизларга тинчлик бўлсин! Осмондаги Отам Мени дунёга юборгани сингари, Мен ҳам сизларни дунёга юборяпман.

<sup>22</sup> Шундай деб, уларнинг устига пуллади-да:

— Муқаддас Рухни қабул қилинглар, — деди. <sup>23</sup> — Сизлар кимнинг гуноҳларини кечирсангизлар, у кечирилади. Кимнинг гуноҳларини кечирмасангизлар, у кечиримсиз қолаверади.

### Исо билан Тўма

<sup>24</sup> Исо келганда ўн икки шогирдан бири Тўма, яъни Дишимус\* шогирдлар орасида йўқ эди. <sup>25</sup> Бошқа шогирдлар унга:

— Биз Раббимиз Исони кўрдик, — дейишди. Тўма уларга шундай деди:

— Унинг қўлларидағи мих чандиқларини ўзим кўрмагунимча, мих чандиқларига бармоғимни теккизмагунимча, биқинига қўлим билан тегиб кўрмагунимча ишонмайман.

<sup>26</sup> Кейинги якшанба куни Исонинг шогирдлари яна уйда тўпланган эдилар. Бу сафар Тўма ҳам улар билан бирга эди. Унинг эшиклари қулф эди. Шунга қарамай Исо кирди, ўрталарида туриб:

— Сизларга тинчлик бўлсин! — деди. <sup>27</sup> Кейин Тўмага қараб:

— Бармоғингни бу ёқса теккиз! Кўлларимни кўр. Кўлингни узатиб, биқинимга тегиб кўр. Иккиланишни бас қил, ишон! — деди. <sup>28</sup> Тўма Исола:

— Ё Раббим, Худойим! — деди. <sup>29</sup> Исо унга шундай деди:

— Сен Мени кўрганинг учун ишондинг. Мени кўрмай ишонганлар нақадар баҳтлидир!

### Китобнинг моҳияти

<sup>30</sup> Исонинг бу китоб таркибида киритилмаган яна кўп мўъжизали аломатларига шогирдлар гувоҳ бўлганлар. <sup>31</sup> Китобга киритилган мўъжизалар эса сизлар учун ёзилган. Токи сизлар Исонинг Масих, Худонинг Ўғли\* эканлигига ишониб, бу имонингиз туфайли ҳаётга эга бўлинглар.

## 21-БОБ

### Исо кўл бўйида зоҳир бўлади

<sup>1</sup> Бу ҳодисалардан кейин Исо Жалила кўли\* бўйида яна шогирдларига зоҳир бўлди. Бу шундай рўй берди: <sup>2</sup> Бутрус\*, Тўма, яъни Дишимус\*, Жалиладаги Каъна қишлоғидан бўлган Натанил, Забадиёнинг ўғиллари\* ва бошқа икки шогирд — ҳаммалари бирга йиғилган эдилар. <sup>3</sup> Бутрус ёнидагиларга:

— Мен кетдим, балиқ тутаман, — деди.

— Биз ҳам сен билан борамиз, — дейишди улар. Сўнг қайиқقا тушиб, жўнаб кетишиди. Лекин ўша кеча ҳеч нарса тутишолмади.

<sup>4</sup> Кун ёришганда, Исо қирғоқда турган эди. Шогирдлари эса Унинг Исо эканлигини билмадилар.

<sup>5</sup> — Йигитлар, балиғингиз борми? — деб сўради Исо улардан.

— Йўқ, — деб жавоб берди улар.

<sup>6</sup> — Тўрингизни қайиқнинг ўнг томонига ташланглар, шунда тутасизлар, — деди Исо.

Улар тўрни ташладилар. Балиқ кўплигидан уни тортиб ололмадилар. <sup>7</sup> Шу пайт Исонинг севикли шогирди\*:

— Бу Раббимиз Исо-ку! — деди Бутрусга. Бутрус буни эшитиши биланоқ, узун

кўйлагининг этакларини белига қистирди-ю, кўлга сакради.<sup>8</sup> Бошқа шогирдлар эса балиқ тўла тўрни судраганча, қайиқда келдилар. Улар қуруқликка яқин, тахминан икки юз тирсак\* масофада әдилар.<sup>9</sup> Қирғоққа чиққанларида, нонни ва ёнган кўмир устида пишаётган балиқни кўрдилар.

<sup>10</sup> Исо уларга:

— Ҳозир тутган балиғингиздан олиб келинглар, — деди. <sup>11</sup> Бутрус бориб, тўрни қирғоққа тортиб чиқарди. Тўр катта балиқларга тўла эди. Ҳаммаси бўлиб 153 та балиқ бор эди. Балиқлар кўплигига қарамасдан, тўр йиртилмади.

<sup>12</sup> Исо шогирдларига:

— Қани, келинглар, нонушта қилиб олинглар, — деди. Улардан ҳеч бири: “Сиз кимсиз?” деб сўрашга ботинолмади, чунки Унинг Раббимиз Исо эканлигини билар әдилар. <sup>13</sup> Исо уларнинг олдига бориб, нондан берди, балиқдан ҳам берди.

<sup>14</sup> Шу йўсин Исо тирилгандан кейин учинчи марта шогирдларига зоҳир бўлди.

### Исонинг Бутрусга саволи

<sup>15</sup> Исо нонуштадан кейин Шимўн Бутрусдан\* сўради:

— Юҳанно\* ўғли Шимўн, сен Мени улардан қўпроқ яхши кўрасанми?

— Ҳа, Раббим! Мен Сени яхши кўришимни Ўзинг биласан-ку, — деди Унга Бутрус.

— Кўзиларимни ўтлат, — деди унга Исо.

<sup>16</sup> Исо иккинчи марта Бутрусдан сўради:

— Юҳанно ўғли Шимўн, сен Мени яхши кўрасанми?

— Ҳа, Раббим! Сени яхши кўришимни Ўзинг биласан-ку, — деди Бутрус Унга.

— Кўйларимни боқ, — деди унга Исо.

<sup>17</sup> Сўнг учинчи марта Бутрусдан сўради:

— Юҳанно ўғли Шимўн, сен Мени яхши кўрасанми?

Исо учинчи марта яна шу саволни бергани учун Бутрус хафа бўлди.

— Раббим! Сен ҳамма нарсани биласан, мен Сени яхши кўришимни ҳам биласан, — деди Бутрус. Исо унга шундай деди:

— Кўйларимни ўтлат! <sup>18</sup> Сенга чинини айтайин: ёш бўлганингда камарингни ўзинг боғлар эдинг, хоҳлаган жойингга борар эдинг. Қариганингда эса қўлларингни узатасан, бошқа бирор сени боғлайди, сени хоҳламаган жойингга олиб боради.

<sup>19</sup> Исо бу сўзлар орқали Бутруснинг қай йўл билан ўлиб, Худони улуғлашини билдири\*. Сўнгра унга:

— Ортимдан юр! — деди.

### Исо ва Унинг севикли шогирди

<sup>20</sup> Бутрус бурилиб, Исонинг севикли шогирди\* орқаларидан эргашиб келаётганини кўрди. Бу шогирди кечки зиёфатда энгашиб, Исодан: “Ҳазрат, Сизни ким тутиб беради?” — деб сўраган эди. <sup>21</sup> Бутрус уни кўриб, Исодан:

— Раббим, унинг тақдири нима бўлади? — деб сўради. <sup>22</sup> Исо унга:

— Мен келгунимгача унинг тирик қолишини истасам, бундан сенга нима?! Сен ортимдан юравер, — деди.

<sup>23</sup> Шундай қилиб, имонлилар орасида бу шогирд ўлмайди деган гап-сўз тарқалиб кетди. Ҳолбуки, Исо уни ўлмайди, демаганди. У фақат: “Агар Мен келгунимгача унинг тирик қолишини истасам, бундан сенга нима?!” — деб айтган эди.

### Хотима

<sup>24</sup> Ана шу шогирд бу ҳодисаларнинг ҳаммасига гувоҳ бўлиб, уларни ёзиб олган.

Унинг гувоҳлиги ҳақиқат эканлигини биламиз.<sup>25</sup> Исо яна кўп бошқа ишлар қилган. Булар бирма-бир ёзиб чиқилганда эди, ёзилган китоблар оламга ҳам сиғмас эди, деб ўйлайман\*.

## ИЗОҲЛАР

*Худонинг Ўғли* — Исо Масиҳнинг унвони. Тўлиқроқ маълумотга эга бўлиш учун луғатдаги ХУДОНИНГ ЎҒЛИ иборасига қаранг.

**1:1 Калом** — юонча матнда *логос*. Бу юонча сўз яхудийлар учун ҳам, юонлар учун ҳам муҳим аҳамиятга эга. Юон файласуфлари бу сўзни ишлатганларида нафақат оғиздан чиққан сўзни, балки ҳали тилга олинмаган, хаёлдаги фикрни ҳам назарда тутганлар. Улар бу сўзни коинотга нисбатан ишлатганларида, бутун коинотни бошқарib турган, борлиқ асосидаги илоҳий онгни назарда тутганлар. Баъзи юонлар *логос* сўзини коинот манбаи ва ижодкори бўлган бош Худога нисбатан ишлатганлар. Кўп юонзабон яхудийлар *логос* сўзини Худонинг донолигига ёки Худонинг каломига нисбатан ишлатганлар, баъзан эса Худонинг бу дунёдаги ишларини амалга оширадиган илоҳий зот тимсолида тасаввур қилганлар. Шулардан кўриниб турибдики, Юҳанно бу ўринда яхудийларга ҳам, юонларга ҳам тушунарли бўлган сўзни ишлатган.

**1:3 Бутун борлиқ Калом орқали яратилган** — Забур 32:6, 9, Колосаликлар 1:15-17, Ибронийлар 1:2-3 га қаранг.

**1:9 Ҳар бир одамни ёритадиган ҳақиқий Нур дунёга келаётган эди** — ёки *Бу Нур ҳақиқий Нур эди, У дунёга келган ҳар бир одамни ёритарди*. Бу ўриндаги юонча гапни юқоридагидай икки хил маънода тушуниш мумкин, аммо китобнинг кейинги оятларидан кўриш мумкинки, муаллиф дунёга келаётган ибораси остида, ҳақиқий Нурга, яъни Исо Масиҳга ишора қилган (12:46 га қаранг, яна 6:14, 9:39, 11:27, 16:28 га қаранг).

**1:13 ...Табиий йўл билан эмас...** — юонча матнда ...*Қондан эмас....* Ота-онадан туғилишга ишора.

**1:14 яшади** — бу ўринда ишлатилган юонча сўз чодир ўрнатиш маъносини ифодалаб, Эски Аҳддаги Муқаддас чодирни, Худо Ўз халқи орасида яшайдиган жойни эслатади (*Чиқиш 25:8* га қаранг).

**1:14 Ота** — Худога ишора. Бу унвон Муқаддас Китобдаги бошқа ҳамма китобларга қараганда Юҳанно китобида кўп ишлатилган. Тўлиқроқ маълумотга эга бўлиш учун луғатдаги ХУДОНИНГ НОМЛАРИ ибораси остида берилган ОТА сўзига қаранг.

**1:14 Ўғил** — Исо Масиҳнинг унвони. Тўлиқроқ маълумотга эга бўлиш учун луғатдаги ХУДОНИНГ ЎҒЛИ иборасига қаранг.

**1:18 Самовий Отанинг бағридаги, Аслида Худо бўлган ягона Ўғил** — юонча матндан. Баъзи юон қўлёзмаларида *самовий Отанинг бағридаги ягона Ўғил*.

**1:19-20 руҳоний** — Куддусдаги Маъбадда хизмат қиласидиган эътиборли дин раҳнамоси. Тўлиқроқ маълумотга эга бўлиш учун луғатдаги РУҲОНИЙ сўзига қаранг.

**1:19-20 леви** — Куддусдаги Маъбадда руҳонийга хизмат қилишда ёрдам берадиган одам. Тўлиқроқ маълумотга эга бўлиш учун луғатдаги ЛЕВИ, ЛЕВИЛАР сўзига қаранг.

**1:19-20 Maciҳ** — бу унвонни яхудийлар келажакда уларни душманларидан қутқарадиган ва бутун ер юзидағи халқлар устидан хукмронлик қиласидиган инсонга нисбатан ишлатганлар. Эски Аҳдда Масиҳнинг қиласидиган ишлари ҳақида

башоратлар ёзилган. Янги Аҳдга кўра Раббимиз Исо ўша Масиҳдир. Тўлиқроқ маълумотга эга бўлиш учун луғатдаги МАСИҲ сўзига қаранг.

**1:21 Илёс** — Эски Аҳд даврида яшаган энг буюк пайғамбарлардан бири.

Яхудийлар Илёснинг қайтиб келишини интизорлик билан кутишарди (Малаки 4:5-6 га қаранг).

**1:21 Биз кутаётган пайғамбармисан?** — Мусо Истроил халқига, Худо сизлар учун менга ўхшаган пайғамбар юборади, бу пайғамбар ўз орангиздан келиб чиқади, деб айтган эди (Қонунлар 18:15-19 га қаранг). Кўп яхудийлар бу пайғамбар дунёнинг сўнгги дамларида келиб, уларни золимлардан қутқаришига ишонардилар. Мусонинг башорати Исо Масиҳда рўёбга чиқди (Ҳаворийлар 3:17-26 га қаранг).

**1:23 Ишаё пайғамбар айтганидай...** — муаллиф бу ўринда Ишаё 40:3 нинг қадимиююнонча таржимасидан фойдаланган.

**1:24 Фарзийлар** — яхудийларнинг муҳим бир диний мазҳаби. Фарзийлар Таврот қонунларига қатъий риоя қиласардилар, оғзаки равишда тарқалган урф-одатларга ҳамда покланиш удумларига изчил амал қиласардилар. Тўлиқроқ маълумотга эга бўлиш учун луғатдаги ФАРЗИЙ сўзига қаранг.

**1:24 Фарзийлар томонидан юборилган бу одамлар...** — ёки Баъзи фарзийлар ҳам юборилган эдилар. Улар....

**1:27 У менинг ортимдан келяпти...** — юонча матндан. Баъзи юон қўлёзмаларида У менинг ортимдан келяпти, лекин мендан илгари бор бўлган.

**1:28 Байтания** — юонча матндан. Баъзи юон қўлёзмаларида Байтавара. Бу оятдаги Байтания қишлоғи Марям ва Мартанинг акаси Лазар яшаган, Қуддус ёнидаги Байтания эмас (11:1 га қаранг).

**1:34 Худонинг Ўғли** — Исо Масиҳнинг унвони. Тўлиқроқ маълумотга эга бўлиш учун луғатдаги ХУДОНИНГ ЎҒЛИ иборасига қаранг.

**1:38 Раввий** — орамийча сўз. Баъзи китобхонлар орамий тилини билмаганлари учун, муаллиф мана шу сўзнинг маъносини тушунтириб ўтган. Китобнинг бошқа жойларида орамийча Раввий сўзи Устоз деб таржима қилинган.

**1:39 соат тўрт** — юонча матнда ўнинчи соат, яхудийларнинг урф-одатига кўра, куннинг бу пайти ўша соат билан белгиланар эди.

**1:40 Шимўн** — юонча матнда Шимўн Бутрус. Бутрус исмини унга Исо Масиҳ берган эди (шу бобнинг 42-оятига қаранг). Баъзан у ҳақда сўз юритилганда, иккала исм ҳам биргаликда ишлатилади.

**1:42 Юҳанно** — юонча матндан. Баъзи юон қўлёзмаларида бу исмнинг бошқа варианти Юнус.

**1:42 Кифас** — орамийча исм.

**1:45 Натанил** — анъанага кўра, Бартоломейнинг яна бир исми. Бартоломей ўн икки ҳаворийдан бири эди (Матто 10:3, Марк 3:18, Луқо 6:14 га қаранг). Бу орамийча исмнинг маъноси Толомей ўғли деганидир.

**1:45 ...Таврот китобида...пайғамбарлар...ўзларининг битикларида...** — одатда яхудийлар, Эски Аҳд тўплами уч қисмдан иборат, деб айтадилар. Бу уч қисм қўйидагилардир: Таврот (Мусонинг қонуни деган ном билан ҳам юритилади), Пайғамбарлар битиклари (унинг таркибига баъзи тарихий китоблар ҳам кирган) ва Битиклар (Забур бу қисмнинг биринчи китобидир). Яхудийлар баъзан

дастлабки икки қисм “Таврот ва Пайғамбарлар битиклари” деганда бутун Эски Аҳд тўпламини назарда тутадилар.

**1:47 ...Исроилнинг ҳақиқий авлоди...ҳийла деган нарсани билмайди — бу ўринда Ёкуб ва ҳийла сўзларига сўз ўйини ишлатилган бўлиши мумкин, чунки Ёкуб исми “ҳийла, ёлғон” маъноси билдирадиган сўздан келиб чиққан (Ибтидо 25:26 изоҳига қаранг). Таржимада айтиб ўтилган Исроил Ёкубнинг иккинчи исми эди. Худо Ёкубга Исроил деб исм беришдан олдин, Ёкуб акаси Эсовни ва ўз отаси Исҳоқни алдаган эди.**

**1:51 Инсон Ўғли — Исо Масих қўпинча Ўзига нисбатан ишлатган унвон. Тўлиқроқ маълумотга эга бўлиш учун луғатдаги ИНСОН ЎҒЛИ иборасига қаранг.**

**1:51 ...сизлар...қўрасизлар — яхудийларнинг бобокалони Ёкуб акаси Эсовдан қочаётган пайтда шунга ўхшаган туш кўрган эди (Ибтидо 28:10-15 га қаранг). Бу оятда Исо Ўзининг ҳокимияти осмондан берилганини, У орқали Худо Ўзини ер юзида танитишини ва Ёкубга тушида берган ваъдасини бажаришини назарда тутади.**

**2:6 ўн-ўн икки челак — юононча матнда икки-уч ўлчов, тахминан 80-120 литрга тўғри келади.**

**2:13 Фисиҳ байрами — Фисиҳ зиёфатига ва ундан кейин етти кун давомида нишонланадиган Хамиртурушсиз нон байрамига ишора. Бу байрамлар Исроил халқининг Мисрдаги қулликдан озод бўлиши муносабати билан нишонланар эди (Чиқиш 12:1-42, 13:3-10 га қаранг).**

**2:14 саррофлар — пул айирбошловчилар. Улар Рим ва Юонон тангаларини яхудийларнинг шақалига алмаштирганлар. Маъбад солифини тўлаш ва қурбонлик қилинадиган ҳайвонларни сотиб олиш учун шақал ишлатилган.**

**2:17 Забур 68:10 га қаранг.**

**2:20 Бу Маъбад қирқ олти йилдан бери қуриляпти... — Буюк Ҳирод (милоддан олдинги 37-4 йилларда ҳукмронлик қилган) Маъбадни милоддан олдинги 19 йилда қайта қуришни бошлаган ва қурилиш ишлари Исо Масих даврида ҳам давом этётган эди.**

**3:3 қайтадан — бу ўринда ишлатилган юононча сўз қайтадан ёки юқоридан деган маъноларни билдиради. Муаллиф бу иккала маънони ҳам назарда тутган бўлиши мумкин. Бу юононча сўз шу бобнинг 7, 31-оятларида ҳам ишлатилган.**

**3:3 Худонинг Шоҳлиги — Худонинг ҳозирги пайтда инсонлар ҳаётидаги ҳукмронлиги ва охиратда ҳар бир яратилган мавжудотнинг янгиланишига ишора. Тўлиқроқ маълумотга эга бўлиш учун луғатдаги ХУДОНИНГ ШОҲЛИГИ иборасига қаранг.**

**3:13 Осмондан тушган... — юононча матндан. Баъзи юонон қўлёзмаларида осмонда истиқомат қиласиган ва осмондан тушган.**

**3:14 бронза илон — Саҳрода 21:4-9 га қаранг.**

**3:14 Инсон Ўғли ҳам худди шундай юқорига қўтарилиши керак... — Исонинг хочдаги ўлимига ишора (12:31-33 га қаранг).**

**3:15 ...имонга келган ҳар бир киши У орқали абадий ҳаётга эга бўлади — юононча матндан. Баъзи юонон қўлёзмаларида Унга ишонган ҳеч бир киши ҳалок бўлмайди, балки абадий ҳаётга эга бўлади.**

**3:16 Зоро... — шу бобнинг 16-21-оятлари Исонинг гаплари бўлиши мумкин ёки**

Юҳанно Исонинг сўзларидан хулоса чиқариб ёзаётган бўлиши мумкин.

**3:23 ...Салейм...Эйнон ери...** — уларнинг қаерда жойлашгани баҳсли.

**3:24 ...Яхё зиндонга ташланишдан олдин...** — Марк 6:17-18 га қаранг.

**3:31 Юқоридан...** — шу бобнинг 31-36-оятлари Яхёнинг гаплари бўлиши мумкин ёки Юҳанно Яхёнинг сўзларидан хулоса чиқариб ёзаётган бўлиши ҳам мумкин.

**3:36 Худонинг Ўғли** — Исо Масиҳнинг увони. Тўлиқроқ маълумотга эга бўлиш учун луғатдаги ХУДОНИНГ ЎҒЛИ иборасига қаранг.

**4:5 Сихар...Ёқуб** — Сихар шаҳри Шакам яқинида бўлган. Иброҳимнинг набираси Ёқуб Шакамга яқин жойдан ер сотиб олган эди (Ибитдо 33:18-19 га қаранг).

Кейинчалик бу ер Юсуфнинг авлодларига улуш қилиб берилган (Ёшуа 24:32 га қаранг).

**4:6 туш пайти** — юонча матнда олтинчи соат, яхудийларнинг урф-одатига кўра, куннинг бу пайти ўша соат билан белгиланаар эди.

**4:9 ...Самариялик аёл бўлсам, қандай қилиб мендан сув сўрашга журъат этдингиз?!** — яхудийлар Самарияликлардан ҳазар қилишар эди. Тўлиқроқ маълумотга эга бўлиш учун луғатдаги САМАРИЯЛИК сўзига қаранг. Эркак кишининг бегона аёл билан гаплашиши ҳам одатий ҳол эмас эди (шу бобнинг 27-оятига қаранг).

**4:19 Ҳазрат** — юонча матнда қуриос. Бу ўринда обрў-эътиборли инсонга нисбатан ишлатиладиган сўз сифатида қўлланган (шу бобнинг 11, 15-оятларида тақсир сўзи билан таржима қилинган). Тўлиқроқ маълумотга эга бўлиш учун луғатдаги ХУДОНИНГ НОМЛАРИ ибораси остида берилган РАББИЙ, РАББИМ, РАББИМИЗ... сўзига қаранг.

**4:20 бу тоғ** — Гаризим тоғи назарда тутилган. Худога сажда қилишга энг муносиб жой қаерда эканлиги ҳақида яхудийлар ва Самарияликлар ўртасида анчадан бери қизғин баҳс бораради. Самарияликларнинг айтиши бўйича, Худога сажда қилиш учун энг муносиб бўлган жой Қуддусдаги Сион тоғи эмас, балки улар табаррук ҳисоблаган Гаризим тоғидир. Аёл “ота-боболаримиз” деганда ўша ерда қурбонгоҳ қурган ва Худога сажда қилган Иброҳим ва Ёқубни назарда тутган (Ибитдо 12:6-7, 33:18-20 га қаранг). Самарияликларнинг Тавротига кўра, Мусо халқقا Эбал тоғида эмас, балки Гаризим тоғида қурбонгоҳ қуришни буюрганди (Қонунлар 27:2-7 га қаранг). Самарияликлар ўзларининг бу қарашларини мана шу оятлар билан асосламоқчи бўлардилар. Улар тахминан милоддан олдинги 400 йилда Гаризим тоғида маъбад қурганлар. Бу маъбадни яхудийлар тахминан милоддан олдинги 128 йилда бузиб ташлаганлар. Бунинг оқибатида яхудийлар ва Самарияликлар орасидаги душманлик янада кучайган.

**4:22 Сизлар...кимга сажда қилаётганингизни билмайсизлар...** —

Самарияликларнинг Худо ҳақидаги тушунчаси чекланганди, чунки улар Эски Аҳдни тўлиғича қабул қилмасдилар. Уларнинг Муқаддас битиклари фақатгина Тавротдан иборат эди.

**4:42 ...оламнинг Нажоткори эканлигига амин бўлдик** — юонча матндан. Баъзи юон қўллэзмаларида оламнинг Нажоткори — *Масиҳ эканлигига амин бўлдик*.

**4:46 сарой амалдори** — Ҳирод Антипаснинг амалдорларидан бири бўлиши мумкин. Ҳирод Антипас Жалила ва Перея худудларида ҳукмронлик қилган.

**4:52 соат бирларда** — юонча матнда еттинчи соат, яхудийларнинг урф-одатига кўра, куннинг бу пайти ўша соат билан белгиланаар эди.

**5:2 орамийча** — бу ўринда ишлатилган юононча сўз иброний тилини ёки орамий тилини билдириши мумкин. Ўша пайтда қадимги Фаластинда яшаган яхудийлар одатда орамий тилида гаплашар эдилар.

**5:2 Байтзада** — юононча матндан. Баъзи юонон қўлёзмаларида *Байтҳасда*.

**5:3-4** Юононча матндан. Баъзи юонон қўлёзмаларида қуйидаги сўзлар 3-оятнинг охири ва 4-оятни ташкил этиб, қўшимча қилинганд: *Улар сувнинг қимирлашини интизор бўлиб кутар эди.* <sup>4</sup> Чунки Эгамизнинг бир фариштаси гоҳ-гоҳ ҳовузга тушиб, сувни ҳаракатга келтирас эди. *Сув қимирлаши билан ҳовузга биринчи бўлиб ким тушса, ҳар қандай хасталикдан халос бўлар эди.*

**5:10 Шу куни тўшакни кўтариб юриш қонунда ман этилган!** — фарзийлар Тавротдаги қонунни (Чиқиш 34:21, Еремиё 17:21-22, Нахимиё 13:15 га қаранг) ўзларича жиддий шарҳлаб, ҳатто инсон ҳаётига оид икир-чикирларни ҳам қонун даражасига кўтарғанлар. Шунинг учун улар соғайиб кетган одам қилган ишни Шаббат кунига хилоф иш деб ҳисоблаганлар. Яна Матто 12:9-12 га қаранг.

**5:16 Юононча матндан.** Баъзи юонон қўлёзмаларида қуйидаги сўзлар оятга қўшимча қилинганд: *ва Уни ўлдириш йўлини излай бошладилар.*

**5:25 Худо Ўғли** — Исо Масиҳнинг унвони. Тўлиқроқ маълумотга эга бўлиш учун луғатдаги ХУДОНИНГ ЎҒЛИ иборасига қаранг.

**5:39 Муқаддас битиклар** — одатда Эски Аҳд китоблари тўплами шу ном билан аталади.

**6:1 ...Жалила кўлининг нариги қирғоғига...** — бу ибора кўлнинг ўша қирғоғидаги бошқа бир жойга қайиқ билан сузуб боришни ҳам билдириши мумкин. Исо айнан қаерда оломонга таом етказиб бергани аниқ эмас. Анъянага қўра, Исо бир неча минг кишини тўйдирган бу жой кўлнинг шимоли-фарб томонида, Жалиладаги Байтсайдага яқин эди.

**6:7 икки юз кумуш танга** — юононча матнда икки юз динор. Динор Рим кумуш тангаси бўлиб, мардикорнинг бир қунлик иш ҳақи эди.

**6:8 Бутрус** — юононча матнда *Шимўн Бутрус* (шу бобнинг 68-оятида ҳам бор). 1:40 изоҳига қаранг.

**6:11 ...ўтирганларнинг ҳаммасига тарқатди** — юононча матндан. Баъзи юонон қўлёзмаларида шогирдоларига, шогирдолар эса ўтирганларнинг ҳаммасига тарқатди.

**6:14 дунёга келиши керак бўлган пайғамбар** — 1:21 нинг иккинчи изоҳига қаранг.

**6:17 кўлнинг нариги томони** — шу бобнинг 1-ояти изоҳига қаранг.

**6:19 беш чақиримча** — юононча матнда 25-30 стадион, тахминан 5-6 километрга тўғри келади.

**6:23 Тиберияс** — Жалила кўлнинг ғарбий қирғоғида жойлашган шаҳар.

**6:25 кўлнинг нариги бўйи** — шу бобнинг 1-ояти изоҳига қаранг.

**6:31 манна** — Исройл халқи Мисрдан чиққандан кейин то Канъон юртига киргунча, Худо уларга етказиб турган маҳсус егулик. Манна, Шаббат кунидан ташқари, ҳар куни кечаси ерга ёғиларди, одамлар саҳарда туриб, уни йиғиб олишарди (Чиқиш 16:13-35, Ёшуа 5:12 га қаранг).

**6:31 Забур** 77:24 га қаранг.

**6:45 Ишаё** 54:13 га қаранг.

**6:69** *Худонинг Азизи* — юононча матндан. Баъзи юонон қўлёзмаларида *Masih* — барҳаёт *Худонинг Ўғли*.

**7:2** *Чайла байрами* — бу байрам кузда йифим-терим тугаган пайтга тўғри келади.

**7:21** *Мен Шаббат қуни битта мўъжисиза қилганим...* — 5:1-18 га қаранг.

**7:22** *суннат одати* — суннат Худонинг Иброҳим ва унинг авлоди билан қилган аҳд белгиси эди (Ибитидо 17:9-14 га қаранг). Суннат яхудийларнинг Худога содиқлигини ва Унинг танлаган халқига тегишли эканини қўрсатади.

**7:32** *бош руҳонийлар* — жамиятнинг бошқа эътиборли одамлари қаторида Олий кенгаш аъзолари эдилар. Олий кенгаш яхудийларнинг сиёсий ва диний кенгаси эди. Тўлиқроқ маълумотга эга бўлиш учун луғатдаги БОШ РУҲОНИЙЛАР иборасига қаранг.

**7:32** *Маъбад миришаблари* — Маъбадни қўриқлаш ва у ерда тартиб сақлаш учун масъул бўлган яхудий ҳарбийлари.

**7:35** ...*бошқа юртларда...Гайрияхудийларга...* — юононча матнда ...*юононлар орасида...Юононларга....* Ўша даврда *юононлар* сўзи нафақат миллати юонон бўлган, балки юонон тилида сўзлашувчи, юонон урф-одатларига риоя қилувчи одамларга нисбатан ҳам ишлатилган. Бу ўринда яхудийларнинг Худосига сажда қилган файрияхудийлар назарда тутилган бўлиши мумкин (12:20 га ва ўша оятнинг изоҳига қаранг).

**7:40** *биз қутган пайғамбар* — 1:21 нинг иккинчи изоҳига қаранг.

**7:42** *Муқаддас битикларда...деб айтимаганми?!* — Михо 5:2 га қаранг.

**7:50** *Никодим* — 3:1-15 га қаранг.

**7:52** Юҳанно китобининг энг қадимги юонон қўлёзмалари ва таржималари 7:53-8:11 ни ўз ичига олмаган.

**8:1** *Зайтун тоғи* — Қуддус шаҳрининг шарқий девори бўйлаб ўтган Қидрон сойлигининг нариги томонидаги тепалик.

**8:3** *Таврот тафсирчилари* — Мусонинг қонунини жуда яхши билган зиёли одамлар. Тўлиқроқ маълумотга эга бўлиш учун луғатдаги ТАВРОТ ТАФСИРЧИСИ иборасига қаранг.

**8:5** *Мусо қонунда...буюрган* — Қонунлар 22:22-24 га қаранг.

**8:9** ...*бу гапни эшишиб...* — юононча матндан. Баъзи юонон қўлёзмаларида *бу гапни эшишиб, вижданан фош бўлишиди*.

**8:17** Қонунлар 19:15 га қаранг.

**8:28** *Инсон Ўғлини юқорига қўттарганингизда...* — Исонинг хочдаги ўлимига ишора (3:14, 12:31-33 га қаранг).

**8:48** *Самариялик* — яхудийлар Самарияликлардан ҳазар қилишар эди. Бу ўринда камситиш ниятида ишлатилган. Тўлиқроқ маълумотга эга бўлиш учун луғатдаги САМАРИЯЛИК сўзига қаранг.

**8:58** ...*Иброҳим туғилмасдан олдин Мен бор бўлганман* — Исонинг бу гапини яхудийлар куфрлик деб ҳисоблаб, уни тошбўрон қилмоқчи бўлдилар, чунки фақатгина Худо Ўзи ҳақида шундай деб айта оларди (Чиқиш 3:14, Ишаё 41:4 га қаранг).

**8:59** Юононча матндан. Баъзи юонон қўлёзмаларида қуйидаги сўзлар оятга қўшимча қилинган: *У уларнинг орасидан ўтиб кетди, ҳеч ким буни сезмади.*

**9:16 ...У Шаббат кунига риоя қилмаяпти...** — фарзийлар Тавротдаги қонунни (Чиқиш 34:21 га қаранг) ўzlарича жиддий шарҳлаб, ҳатто инсон ҳаётига оид икир-чикирларни ҳам қонун даражасига кўтарганлар. Шунинг учун улар Исо қилган ишни Шаббат кунига хилоф иш деб ҳисоблаганлар.

**9:35 Инсон Ўғли** — юонча матндан. Баъзи юон юлони қўлёзмаларида *Худонинг Ўғли*.

**10:22 Маъбадни бағишилаш байрами** — бу байрамнинг яна бир номи Ханука. Ханука байрами Хислав ойида — иброний календарининг тўққизинчи ойи, 25 кунида бошланиб, 8 кун нишонланарди. Ҳозирги календарга кўра, бу ой тахминан ноябрнинг ўртасидан бошланади. Маъбад Антиох IV томонидан ҳаром қилингандан кейин (Дониёр 9:27 нинг охирги изоҳига қаранг), яхудий ватанпарвари Яхудо Маккавей томонидан милоддан олдинги 165 йилда ўз ҳолига келтирилиб, Худога бағишиланган. Маъбаднинг тикланиши ва Худога бағишиланниши Ханука байрами давомида нишонланарди.

**10:23 Сулаймон айвони** — олди очиқ, кенг жой. Бу айвон Маъбад ҳовлисининг шарқий девори бўйлаб қурилган бўлиши мумкин. Унинг қатор баланд устунлари бўлган. Шоҳ Ҳирод қурдирган бу Маъбаднинг лойиҳаси ва расми луғатдан кейин илова қилинган “Расмлар ва лойиҳалар” бўлимида берилган.

**10:34 Муқаддас битиклар** — юонча матнда қонун. Баъзан Эски Аҳд китоблари тўпламига нисбатан қонун сўзи ишлатилган.

**10:34 Забур 81:6 оятга ва Забур 81:1 нинг иккинчи изоҳига қаранг.**

**10:36 Худонинг Ўғли** — Исо Масиҳнинг унвони. Тўлиқроқ маълумотга эга бўлиш учун луғатдаги ХУДОНИНГ ЎҒЛИ иборасига қаранг.

**11:1 Байтания қишлоғи** — Куддус шаҳрининг шарқий девори бўйлаб ўтган Қидрон сойлигининг нариги томонида жойлашган эди.

**11:2 ...ўша Марям эди** — 12:1-8 га қаранг.

**11:4 Худо Ўғли** — Исо Масиҳнинг унвони. Тўлиқроқ маълумотга эга бўлиш учун луғатдаги ХУДОНИНГ ЎҒЛИ иборасига қаранг.

**11:16 Тўма, яъни Дишимус** — унинг орамийча исми Тўма, юончаси Дишимус эди. Иккала тилда ҳам бу исмларнинг маъноси — эгизак.

**11:18 уч чақиримча** — юонча матнда ўн беш стадион, тахминан 3 километрга тўғри келади.

**11:47 Олий кенгаши** — яхудийларнинг сиёсий ва диний кенгаши. Тўлиқроқ маълумотга эга бўлиш учун луғатдаги ОЛИЙ КЕНГАШ иборасига қаранг.

**11:49 Каяфас** — 18:13 изоҳига қаранг.

**11:52 Худонинг тарқоқ бўлган ҳамма фарзандлари** — Исо Масиҳга имон келтирадиганларнинг ҳаммасига ишора (1:11-12 га қаранг).

**11:54 Эфрайим шаҳри** — Ўфра номи билан ҳам машхур бўлган, Куддусдан қарийб 24 километр шимоли-шарқда жойлашган шаҳар назарда тутилган бўлса керак.

**12:1 Байтания** — 11:1 изоҳига қаранг.

**12:3 бир шиша** — юонча матнда литра, тахминан ярим литрга тўғри келади.

**12:3 сунбул мойи** — яна бир номи нард. Бу мой қуюқ, оч жигар ранг, жуда ҳам қиммат, жуда хушбўй бўлган.

**12:5 уч юз қумуш танга** — юонча матнда уч юз динор. Динор Рим қумуш тангаси бўлиб, мардикорнинг бир кунлик иш ҳақи эди.

**12:7** ...у Мени дафн қунимга тайёрлади — яхудийларнинг урф-одатига кўра, жасад дафн қилинишидан олдин унга хушбўй ҳидли зираворлар ва мойлар суртилар эди (Луқо 23:55-56, Юҳанно 19:38-40 га қаранг). Марям қилган ишининг маъносини ўзи тушунганми ёки йўқми, аниқ эмас, аммо унинг бу ҳаракати Исонинг ўлими яқинлашиб қолганини билдиради.

**12:13** пальма дарахти шоҳлари — ҳаёт ва нажот рамзи бўлиб, ғолиб лашкарбошига ёки шоҳга ҳурмат-эҳтиром кўрсатишда фойдаланилган.

**12:13** Эгамиз номидан келаётган Инсон барака топсин! — Забур 117:26 га қаранг.

**12:15** Қуддус халқи — юононча матнда қиз Сион, Қуддус аҳлига нисбатан қўлланган шеърий усул. Қуддусдаги Маъбад қурилган тепалик Сион тоғи деб аталган. Эски Аҳддаги шеърий парчаларда ва пайғамбарлар битикларида Сион сўзи кўпинча Қуддус шаҳрига ёки Худонинг халқига нисбатан ишлатилган. Тўлиқроқ маълумотга эга бўлиш учун луғатдаги СИОН сўзига қаранг.

**12:15** Закариё 9:9 га қаранг.

**12:20** ғайрияхудийлар — юононча матнда юононлар (7:35 изоҳига қаранг). Бу ўринда яхудийларнинг Худосига сажда қиласидиган, аммо яхудийларнинг маданияти ва урф-одатларини тўлиқ қабул қиласидиган одамлар назарда тутилган бўлиши мумкин.

**12:31** бу дунёning ёвуз ҳукмдори — яъни шайтон.

**12:38** Ишаё 53:1 га қаранг.

**12:40** Ишаё 6:10 га қаранг.

**12:47** ...риоя қиласаса... — юононча матндан. Баъзи юонон қўлёзмаларида ишонмаса.

**13:6** Бутрус — юононча матнда Шимўн Бутрус (шу бобнинг 9, 24, 36-оятларида ҳам бор). 1:40 изоҳига қаранг.

**13:18** Забур 40:10 га қаранг.

**13:19** *Масиҳ* Мен эканлигим — ёки *Мен ўша эканлигим*, яъни Худо томонидан юборилган, Муқаддас битикларда башорат қилинганидай, хиёнат қурбони бўладиган Масиҳ.

**13:23** Исонинг севикли шогирди — яъни Юҳанно.

**14:7** ...таниб-биласизлар — юононча матндан. Баъзи юонон қўлёзмаларида таниб-билган бўлардингиз.

**14:16** Ҳомий — Муқаддас Рӯҳнинг унвони. Бу ўринда ишлатилган юононча сўз бирортасига ёрдам бериш учун доим унинг ёнида бўладиган инсонни ёки Зотни билдиради. Бу сўзни *шафоат қилувчи, насиҳатгўй, мададкор, юпатувчи* деб таржима қиласа ҳам бўлади. Бу юононча сўз юқоридаги сўзларга қараганда кенгроқ маънога эга бўлгани учун, ўзбек тилига Ҳомий деб таржима қилинган.

**14:26** Ҳомий — шу бобнинг 16-ояти изоҳига қаранг.

**14:30** бу дунёning ёвуз ҳукмдори — яъни шайтон.

**15:20** деган сўзим — 13:12-17 га қаранг.

**15:25** Забур 34:19, 68:5 га қаранг.

**15:26** Ҳомий — 14:16 изоҳига қаранг.

**16:7** Ҳомий — 14:16 изоҳига қаранг.

**16:11** бу дунёning ёвуз ҳукмдори — яъни шайтон.

**16:16** Юонча матндан. Баъзи юон юнинг қўлёзмаларида қуйидаги сўзлар Исонинг гапига қўшимча қилинган: чунки *Мен Отамнинг олдига кетяпман.*

**17:11** *Менга берган Ўз номинг қудрати ила уларни омон сақла* — юонча матндан. Баъзи юон юнинг қўлёзмаларида *Ўз номинг қудрати ила Менга берганларингни омон сақла.*

**17:12** ...*Менга берган номинг қудрати ила уларни омон сақладим. Уларни асрэдим...* — юонча матндан. Баъзи юон юнинг қўлёзмаларида ...*номинг қудрати ила уларни омон сақладим. Сен Менга берганларни асрэдим....*

**17:12** *Муқаддас битикларда айтилганлар* — 13:18-19 га ва Ҳаворийлар 1:15-20 га қаранг.

**17:12** ҳалокатга маҳкум бўлган одам — Исога хиёнат қилган Яхудо назарда тутилган.

**18:1** *Қидрон сойлиги* — Қуддус шахридан шарқда, шаҳар билан Зайтун тоғи оралиғидан ўтган.

**18:3** *Маъбад мишиблари* — 7:32 нинг иккинчи изоҳига қаранг.

**18:9** *Сен Менга берган одамлардан ҳеч бирининг ўйқолишига йўл қўймадим* — 6:39, 17:12 га қаранг.

**18:10** *Бутрус* — юонча матнда Шимўн Бутрус (шу бобнинг 15, 25-оятларида ҳам бор). 1:40 изоҳига қаранг.

**18:11** *азоб косаси* — юонча матнда коса, Исонинг азоблари ва хочдаги ўлимiga ишора. “Косадан ичмоқ” ибораси азоб-уқубат тортиб, жазо олиш маъносини билдиради (мисол учун, Забур 74:9, Ишаё 51:17, Еремиё 25:15 га қаранг).

**18:13** *Ханан...Каяфаснинг қайнатаси эди* — Ханан милодий 6-15 йилларда олий руҳоний бўлиб хизмат қилган. Рим ҳукумати уни бу лавозимдан четлатгандан кейин, унинг ўрнини куёви Каяфас эгаллаб, милодий 18-37 йилларда олий руҳоний бўлиб хизмат қилди. Ханан ўз вазифасидан четлатилганига қарамай, ҳалқ уни ҳамон олий руҳоний деб биларди, у яхудийлар жамиятида юксак эътибор ва нуфузга эга эди (Луқо 3:2 га қаранг).

**18:14** *ўша Каяфас* — 11:49-50 га қаранг.

**18:15** *олий руҳоний Ханан* — шу бобнинг 13-ояти изоҳига қаранг.

**18:24** *олий руҳоний Каяфас* — шу бобнинг 13-ояти изоҳига қаранг.

**18:28** *ҳоким Пилат* — Рим ҳукумати томонидан Яхудия вилоятига тайинланган ҳоким.

**18:28** ...*булғанишини истамай ҳуқумат саройига кирмадилар* — яхудийларнинг таълимотига кўра, ғайрияхудийларнинг уйига кириш уларни ҳаром қилиб қўярди.

**18:28** *Фисиҳ таоми* — бир кун олдин, яъни Нисон ойининг ўн тўртинчи куни Фисиҳ зиёфатида ейиладиган таом эмас. Янги Аҳдда “Фисиҳ” номи остида Фисиҳ зиёфати ва ундан кейин етти кун давомида нишонланадиган Хамиртурушсиз нон байрами назарда тутилган. Хамиртурушсиз нон байрами давомида бошқа таомлар ҳам тановул қилинарди, мазкур оятда ўша таомларга ишора қилинган. Тўлиқроқ маълумотга эга бўлиш учун БАЙРАМЛАР сўзи остида берилган ФИСИҲ, ЗИЁФАТИ ва ХАМИРТУРУШСИЗ НОН БАЙРАМИ ибораларига қаранг.

**18:32** *Исо...айтган сўзлари амалга ошиши учун...* — Исо, юқорига кўтарилеман,

деганда, Ўзининг хочга михланишини назарда тутган эди (3:14, 8:28, 12:31-33 га қаранг). Рим қонунларига кўра, фақатгина Рим ҳукмдори жиноятчини ўлимга ҳукм қила олар эди. Одатда, жамиятдаги паст табақа ёки ҳукумат душмани ҳисобланган одамлар хочга михланиш йўли билан жазоланар эди.

**19:1 Пилат** — 18:28 нинг биринчи изоҳига қаранг.

**19:6 Маъбад миришаблари** — 7:32 нинг иккинчи изоҳига қаранг.

**19:7 ...қонунимизга кўра...** — Левилар 24:16 га қаранг.

**19:7 Худонинг Ўғли** — Исо Масихнинг унвони. Тўлиқроқ маълумотга эга бўлиш учун луғатдаги ХУДОНИНГ ЎҒЛИ иборасига қаранг.

**19:12 Қайсар** — барча Рим императорларига берилган унвон. Бу ўринда Қайсар Тиберийга ишора қилинган. У милодий 14-37 йилларда ҳукмронлик қилган.

**19:13 орамийча** — 5:2 нинг биринчи изоҳига қаранг.

**19:14 Фисиҳ байрами** — Нисон ойининг ўн бешинчи кунида бошланадиган “Хамиртурушсиз нон байрами”га ишора. Янги Аҳдда “Фисиҳ байрами” номи остида Фисиҳ зиёфати ва ундан кейин етти кун давомида нишонланадиган Хамиртурушсиз нон байрами назарда тутилган. Яхудийларнинг урф-одатига кўра, янги кун қуёш ботгандан кейин бошланар эди. Шунинг учун бу оятда Юҳанно Хамиртурушсиз нон байрамидан олдинги кунни, яъни Нисон ойининг ўн тўртинчи куни қуёш ботмасдан олдинги пайтни назарда тутган. Замонавий кун ҳисобига кўра, бу пайт жума кунининг қуёш ботмасдан олдинги вақтига тўғри келади. Фисиҳ зиёфати Нисон ойининг ўн тўртинчи куни бошланганда, яъни пайшанба куни қуёш ботгандан кейин, кечқурун ейиларди. Тўлиқроқ маълумотга эга бўлиш учун БАЙРАМЛАР сўзи остида берилган ФИСИҲ ЗИЁФАТИ ва ХАМИРТУРУШСИЗ НОН БАЙРАМИ ибораларига қаранг.

**19:14 туши маҳали** — юонча матнда олтинчи соат, яхудийларнинг урф-одатига кўра, куннинг бу пайти ўша соат билан белгиланар эди.

**19:17 хоч** — бу ўринда хочнинг кўндаланг ёғочига ишора қилинган. Ўлимга маҳкум қилинган инсон бу ёғочни ҳукм ижро қилинадиган жойгача ўзи кўтариб бориши керак эди.

**19:24 Забур** 21:19 га қаранг.

**19:25 Магдала** — Жалила қўлининг ғарбий қирғоғидаги қишлоқ.

**19:26 севикли шогирд** — яъни Юҳанно.

**19:28 Муқаддас битиклар** — Забур 21:16, 68:22 га қаранг.

**19:29 арzon шароб** — бу ўринда ишлатилган юонча сўз авом ҳалқ кунда ичадиган нордон шаробга ишора қилади. Бу шароб Рим аскарлари учун ўша ерга олиб келинган бўлиши мумкин.

**19:29 таёқ** — юонча матнда иссон. Иссон бута бўлиб, унинг новдаси назарда тутилган.

**19:31 ниҳоятда табаррук кун** — ҳар бир Шаббат куни муқаддас ҳисобланарди. Бу йил Хамиртурушсиз нон байрамининг биринчи куни Шаббат кунига тўғри келгани учун бу кун ниҳоятда табаррук ҳисобланган.

**19:31 ...болдиrlарини синдириб ташлаб...** — хочга михланган одамлар нафас олиш учун оёқларини тираб тик турадилар. Улар тезроқ жон бериши учун, болдиrlари синдирилган.

**19:35** *Бу ҳодисани қўрган киши* — бу ерда муаллиф ўзига ишора қиляпти. Шу бобнинг 26-оятига ва ўша оятнинг изоҳига қаранг.

**19:36** Забур 33:21 га қаранг. Яна Саҳрода 9:12 га қаранг.

**19:37** Закариё 12:10 га қаранг.

**19:38** *Ариматея* — Қуддусдан 35 километр шимоли-ғарбда жойлашган шаҳар.

**19:39** *Никодим* — 3:1-15 га қаранг.

**19:39** *икки пуд* — юононча матнда *юз литра*, тахминан 34 килога тўғри келади.

**19:39** *мирра* — маълум бир дараҳтлар елимидан тайёрланган хушбўй мой.

**20:1** *Магдала* — Жалила қўлининг ғарбий қирғоғидаги қишлоқ.

**20:2** *Бутрус* — юононча матнда *Шимўн Бутрус* (шу бобнинг 6-оятида ҳам бор). 1:40 изоҳига қаранг.

**20:2** *Исонинг севикли шогирди* — яъни Юҳанно.

**20:16** *орамийча* — 5:2 нинг биринчи изоҳига қаранг.

**20:20** *қўллари* — юононча матндан. Қадимий славянча таржимада *қўл-оёқлари*.

**20:24** *Тўма, яъни Дидимус* — 11:16 изоҳига қаранг.

**20:31** *Худонинг ўғли* — Исо Масиҳнинг унвони. Тўлиқроқ маълумотга эга бўлиш учун луғатдаги ХУДОНИНГ ЎҒЛИ иборасига қаранг.

**21:1** *Жалила қўли* — юононча матнда *Тиберияс қўли*, Жалила қўлининг яна бир номи.

**21:2** *Бутрус* — юононча матнда *Шимўн Бутрус* (шу бобнинг 3, 7, 11-оятларида ҳам бор). 1:40 изоҳига қаранг.

**21:2** *Тўма, яъни Дидимус* — 11:16 изоҳига қаранг.

**21:2** *Забадиёнинг ўғиллари* — яъни Ёқуб ва Юҳанно.

**21:7** *Исонинг севикли шогирди* — яъни Юҳанно.

**21:8** *икки юз тирсак* — тахминан 90 метрга тўғри келади.

**21:15** *Шимўн Бутрус* — Исо Масиҳ Шимўнга Бутрус исмени берган эди (Марк 3:16, Луқо 6:14 га қаранг). Баъзан у ҳақда сўз юритилганда, иккала исм ҳам биргалиқда ишлатилади.

**21:15** *Юҳанно* — юононча матндан. Баъзи юонон қўлёзмаларида бу исмнинг бошқа варианти *Юнус*. Шу бобнинг 16, 17-оятларида ҳам бор.

**21:19** ...*Бутруснинг қай йўл билан ўлиб, Худони улуғлашини билдиреди* — бу гап Бутрус ўз имони учун қатл қилинишини англатади. Шу бобнинг 18-оятидаги “қўлларингни узатасан” сўзлари хочга михланишга ишора қилаётган бўлиши мумкин. Анъанага кўра, Бутрус оёғи осмондан қилиб хочга михланган.

**21:20** *Исонинг севикли шогирди* — яъни Юҳанно.

**21:25** Юононча матндан. Баъзи юонон қўлёзмаларида қуйидаги сўз оятга қўшимча қилинган: *омин*.